




Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
6046/A





Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
6046/A





Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
6046/A



Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
6046/A

A. XXIX. Sp.  
6046 / *Helicoverpa*  
6745 (5) *Helicoverpa*

Bull. 3

1309

in Libris  
J. H. F. F. F.  
Adversus



IDEA

50214 (1)

# MEDICI:

CVM TRACTATV DE  
SYMPTOMATIBVS CRV-  
DELISSIMIS, QVÆ SCARI-  
ficationi & cucurbitularum vsui Bru-  
næ incolis in Marchionatu Mo-  
rauiæ superuenerunt:

ET  
DE FEBRE EPIDEMIA ANNI  
*ab Incarnatione Seruatoris no-  
stri 1580.*

Autore

IOANNE SPORISCHIO AB  
Ottenbachavv, Medicinæ  
Doctore.




FRANCOFVRTI  
Apud hæredes And. Wecheli,  
M. D. LXXXII.

*Heinr. Kottendorff. N.D.*








IDEA MEDICI: AVTO-  
RE IOANNE SPORISCHIO

AB OTTENBACHAW, ME-  
*dicine Doctore.*

43



VICINQUE animum appli- *Qua in Ath-*  
cant palæstræ, vt boni athletæ *leta futuro*  
fiant, debet primò quidem ani- *requiratur.*  
mosi atque audaces esse: Timidi  
enim palæstræ inutiles sunt æ-  
què, ac imbecilles choreis. De-  
inde habitum corporis robustum atque agili-  
tate sua motui saltuque accommodatum ha-  
beant. Nimiùm enim obæsi ac crassi, quorum  
abdomen pinguedine turget, ad motus saltus-  
que, quos palæstræ studiũ requirit, inepti sunt,  
& statim fatigantur eam ob rem, quòd nò tam  
neruosi & robusti, quàm carnosi & imbecilles  
sunt. Tertiò ingenio admonitionis ac institu-  
tionis capaci præditi sunt. Bardi enim ac sto-  
lidi vt nulli negotio apti sunt: ita neque palæ-  
stræ præceptis aures dociles præbere, neq; exer-  
citijs convenientibus sese accommodare no-  
runt. Quartò teneantur studio desiderioque

A ij



# IDEA



*Exercitatio  
multum po-  
rest.*

percipiēdi leges, quas in motu corporis atque congressu cum suis ἀνταγωνισαῖς feriendo, ceden-  
do, instando, pungendo declinandove ictus ἀδελφικῶς observant: & à iuventute exercitatio-  
nes laboresque strenuè subeant. Sicuti solers cura & frequens exercitatio in omnibus o-  
mnium artium disciplinis plurimum præstare valent: ita in palæstræ studijs primas partes iure suo occupant. Quintò athletæ non vulgari, sed exercitato atque probato se erudiendos tradant: atque cum eodem intrepidè, audacter frequenterque congredi non erubescant, cū primū tyrocinia artis atque studij illius per-  
ceperint. Quod illi ipsi, qui palæstra iuvenes erudiunt atque exercent, à suis tyronibus tanto desiderant conatu ac labore, ut in congressu mutuo etiam commonitionibus audaciam atque animosos spiritus illis addant, & præterea hilari, audaci aliquàlitterque truci gestu illorū animis omnem timorem & trepidationem eximere studeant. Sextò plurimum temporis illi studio impendant, ut exercitijs confirmati intrepidè ἀνταγωνισαῖς suis sese opponere, cautos ubique se gerere, ferientes impedire, & deinde fortius ferire vel vi fraudève artificiosa repellere sciant. Haud aliter iuvenes, qui ad medicinæ studium animum suum vertere constituunt, principe loco instructos esse oportet natura, quæ sano existens corpore, inclinatione & impetu quodam heroico ad rerum, de quibus

*Quis me-  
dici futu-  
rus indigeat  
adminicu-  
lis.  
I. Natura.*



# M E D I C I.

bus medicina tractat, cognitionem ferri videatur. Sicuti enim iuuenis nullus quidquam laudabile, honorificum & vtile in eo studio efficit, ad quod naturalem affectionem minimè habet: Ita nullus ingenuorum iuuenum in cognitione mysteriorum, quæ ars difficilis, laboriosa & periculosa multa ac penè infinita continet, se quippiam effecturum speret, quod laude dignum, & tum sibi, tum alijs admodum vtile futurum sit, si neque impetum & inclinationem ad rerum naturalium, de quibus medicina potissimum tractat, cognitionem animum suum ita occupasse animaduenerit, ut totus ad id studium rapiatur: neque integra valetudine adiutus illi arti gnauiter inuigilare, & multum laboris, diligentiae atque temporis impendere valeat. Quemcunque verò natura impetu quodam agit in medici studij tractationem, hinc non modò breui temporis spacio in cognitione medicae artis feliciter progreditur & plurimum proficit, verum etiam prudenter se illius præceptionibus accommodat atque egregium quippiam actu exercitioque præstat. Deinde tum ingenio docili & ad perceptionem artis accommodato sit, tum etiam, præter honestatem vitæ ac morum, afferat animum liberaliter politum & egregiè instructum ijs disciplinis & linguis, quæ in medico viro necessario requiruntur. Inuita enim Minerva ac repugnante ingenio nihil magnopere dignum laude præstiterit ullus

*Diligentiam  
sine natura  
li inclinatione  
parum pro-  
desse.*



hominum, etiam si natura aut cognitionis cupiditate impulsus alicui disciplinæ sese addiceret, quæ ingenio illius contraria esset. Illois vè in quædam diuinæ artis mysteria adgredi non modò stolidi hominis, verùm etiam impudentis ac temerarij est, qui præsidij humanæ vitæ vtilibus & necessarijs audacter abuti, atque ijsdem vires vitamque ægrorum hominũ amplius oppugnare vel planè destruere, vt sæpissimè ab empiricis fit, audet. Huius farinæ homines plurimi in imperijs & rebus publicis hoc nostro æuo lenitate principum & magistratuum, qui prouida mentis solertis prudeptia vident omnia in peius de die in diem ruere atque paulatim ad interitum vergere: & ideo conuiuent ad prophanationẽ abusumque sacrarum artium, in quibus, secundum veram eterni Dei cognitionem & sanctissimum Numinis diuini cultum, tanquam in cardine, salus, integritas & propagatio humani generis voluitur: impunè nò modò feruntur, verùm etiam bonis ac eruditis viris, qui passim medicinam factitant, si non semper præferuntur, tamen sæpenumero æquales censentur. Plerique enim illorum, ut honestum suæ impudentiæ, audaciæ atque inscitæ prætextum habeant eruditorumque virorum integritatem atque scientiam eleuent, prauas sententias spargunt in vulgus, quod ex mentis impotentia & leuitate citius arripit fallacias & mendacia, quàm vera dicta & honesta vtilia-

*Empiricorũ  
calliditas.*



utiliaque monita, dum superbè & petulanter iactitant, quòd non tam medicæ artis peritia & medicamentorum noticia, siue etiam experientia necessaria, sit medico, quàm felicitas in agendo, quæ peculiariter etiam ijs contingere soleat, qui nullis liberalium artium disciplinis exculti sunt. Miseri autem homines, quicunque talia dicunt vel etiam approbant, ignorant eos tantùm feliciter agere, qui arte medendi instructi & experientia fulciti cū ratione prudenti agunt & certum operationibus suis scopum proponunt non modò, sed etiam virtute & auxilio DEI consequuntur: cæteros verò omnes infeliciter operari eam ob rem, quòd neque certum agendi modum teneant: neque medicinæ operationes ad certum finem dirigere valeant: neque sciant, qualis euentus operationes medicamentorum cōsequetur. Multi tamen ex plebe & quoque alij, qui tum auctoritate cæteris hominibus prævalent, tum non contemnendæ eruditionis opinionem apud imperitum vulgus habent, facilè sibi persuadere ac ab illius generis impostoribus imponere patiuntur, ut æstiment nihil esse discriminis inter eruditos, bonos fidelesque medicos, atque inter idiotas, circumforaneos & sycophantas ineptos. Tertium verò est, quod requiritur in iuvene, qui medicinæ studijs mentem suam exornare contendit, ut afferat avidum animum & quodammodo insatiabile desiderium co-

III.

*Cupido discendi.*

A iiij



gnosendi mysteria, quæ in arte hac, aliàs ab oculis & intelligentia hominum abstrusa, tum multa, tum valde recondita sunt. Illud enim perficiet, ut magno animo in honesto atque utili studio alacriter progrediatur, neque deterreatur vulgi imperiti obtrectionibus, quæ multorum iuuenum animos ab optimo honestissimoque instituto abducunt: neq; in curriculo cæpto succumbat territus difficultate, quæ huic studio, ut & cæteris disciplinis, quæ quippiam in se diuini, egregij & utilis negotij continent, cognata est, donec metam propositam, adiutore & ductore D E O, contingat.

IIII.  
*Doctores  
præstantes  
& fideles.*

Quartò non vulgares medicos, neque ἐμπειρικὸς indoctos sequatur, à quibus mysteria artis cognoscere, atq; eorundem vsum addiscere possit. Sed in eo loco, qui ingenijs clementia quadam cœli fauet & rei medicæ non modò materias multas suppeditat, verùm etiam exercitia quotidiana, facientibus medicinam exhibet, præceptores sibi tales eligit, qui κορυφαῖοι ob artis medicæ eximiam cognitionem & eiusdem celeberrimā felicissimamque exercitationem habentur: in docendo etiam fideles atque diligentes deprehenduntur. Ostentantes verò inanem eruditionē & nimis obscuram peneq; ridiculam subtilitatem in tradendis artis præceptis fugiat. Impostores enim illi fallaces nil quidquam solidæ eruditionis possident, & malitiosè iuuenum egregios conatus impediunt,  
ne ad



ne ad intima artium utilissimarum penetralia  
peruenire tempestiuè possint:

ἀπλῆς δ' ὁ μῦθος τῆς ἀληθείας ἔφυ,  
καὶ ποικίλων δὲ τ' ἀνδιχ' ἐρμηνευμάτων.

Ad hæc iuuenis, qui solidam medicæ artis  
cognitionem expetit, sibi ipsi ne utiquam deef- v.  
Diligentia,  
se debet, cum occasio discendi admodum an-  
ceps & in occipitio planè calua sit. Multi enim  
iuuenum ad exteras nationes profecti, ut in ce-  
lebris doctorum virorum frequentia, tanquam  
in emporio & mercatura bonarum artium, si-  
bi perfectam eruditionē auscultatione, lectio-  
ne, meditatione, inuestigatione & exercitatio-  
ne assidua comparent, atque in patriam regres-  
si illam vsibus publicis accommodent, rerum  
nō necessariarum cognitione occupantur: per  
egrinationibus curiosis tempus studijs accom-  
modatissimum terunt, & inanes atque vacui  
cum ætatis ac pecuniæ iactura, quam fecerunt,  
redeunt. Præstabilius autem esset ex doctrina Lib. 7. de Re  
pub.  
Platonis cuiuscunque facultatis studiosos φιλο-  
μαθεῖς, φιλικούς καὶ ζητητικούς illi rei incumbere,  
cuius gratia à pijs parentibus peregrè ablegan-  
tur magnisq; impensis aluntur, ne miserè spem  
eorum, seipsos, atque alios fallerent. πολὺ γὰρ  
κρεῖττον ( ut Isocrates in Helenæ encomio ait )  
ὅτι παρὰ τῶν χρησίμων ὁπρὸς αὐτὸν δόξαζειν, ἢ παρὰ τῶν ἀχρή-  
στων ἀκριβῶς ὁπρὸς αὐτὸν καὶ μικρὸν παρὰ τῶν μεγάλων,  
ἢ πλὺν διαφέρειν ἐν τοῖς μικροῖς καὶ τοῖς μηδὲν παρὰ τῶν βίον  
ὠφελεῖσι. Hac ratione solidum fundamentum



*Vana erudi-  
tionis opi-  
nio magnū  
malum.*

artis, cui animum applicuit, modò rectè fide-  
litéque tradatur, ponet: præcepta eius celeriter  
prompteque arripiet, firmiter retinebit & pru-  
denter in lucem vsumque hominum proferet:  
neque inaniscientiæ opinione tumidus sibi at-

que alijs malum afferet. Sicuti enim illa mul-  
torum hominum animos nimis occupat atque  
adeò inflat, ut iidem non agnoscant dona exi-  
mia, quibus diuina misericordia etiam alios ho-  
mines instruit; sed malum magnum in suo sinu  
foueant, ut testatur Isocrates his verbis, Οὐδὲν  
οἷμαι ποτὶς καὶ ἄλλοις ἀνθρώποις, ὅσον δόξα ψυχῆς: Ita  
tum impedit iuvenes, quò minùs ad absolu-  
tam eruditionem perueniant, tum eis incita-  
mento est, ut cum periculo ægrorū hominum  
& conscientię suæ læsione experimenta suæ  
artis antè facere in hominum corporibus au-  
deant, quàm artis præcepta integrè didicerunt.

*¶ I.  
Animus pa-  
tiens labo-  
ris.*

Sextò medicinæ studiosus laboris patientissi-  
mus sit, dum nō modò bonorum autorum, qui  
artem illam posteris tradiderunt, volumina e-  
uoluit & legendi, meditandi discendi que stu-  
dio recognoscit: verum etiam medicarum ma-  
terierum multam & veram cognitionem sibi  
in montibus, vallibus, fluminibus ac terræ me-  
atibus comparat. Sicuti enim in omnibus ne-  
gotijs industria utilior est, quàm ignauia, ut di-  
fertè testatur Hesiodus, cū ait, εὐθημερώην ἀπὶ τῆς  
ἀνθρώποις καὶ κακομερώην δὲ κακίστην: Ita curricu-  
lum medici studij neq; vulgarem diligentiam  
fert,



fert, neque somnolentum aut ignauum hominem requirit, sed alacrem, gnaum, sedulum & perferentem difficultates eò vsque, dum aliquantum spacij cursu suo perfecit. Tunc enim fastidiũ & difficultas omnis mutatur in iucundam oblectationẽ: & mysteria artis patefiunt ita, vt mens ingenui iuuenis detineatur atque deuinciatur omnino illis studijs. Afferat igitur animum ad labores, meditationes & inuestigationes earum rerum, quæ artem spectant & vsum peculiarem in vita humana habent, intrepidum atque alacrem. Quem confirmabit & *Inscitia magna dedecus.* in honesta contentione retinebit, si planè sibi persuaferit ingens dedecus ac iugum grauissimum esse cum multis incommodis coniunctũ tam præceptorũ vtilium, quàm necessariarum rerum ignorantiam: aduersus quam medico contendendum est non aliter, atque aduersus hostem maximum, cùm sit noxius mali reconditi thesaurus atq; quippiam ambiguo somnio non absimile habeat. Quoniam in multis hominibus, qui integro ac prudenti aliàs sunt animo, timiditatem agendi: in multis verò & ijs potissimũ, qui extrema improbitatis sunt, & neque D E V M neque hominum bonorum iudicia verentur, impudentem audaciam & temerariam occidendi homines licentiam parit. Solidam verò eruditionem, cui prudens animus adest, multum honoris, commoditatis & emolumenti afferre hominibus æquè ijs, qui



doctorum virorum consilijs parent, atque his, qui bonum tantum ab immortali D E O possident, tum quotidiana in vita ac societate hominum experientia cōprobat, tum hi senarij perspicuè & eleganter docent:

μη̄ πέφυκε πᾱσι παρδεία βροτῶς,  
ὥς ὁδὲν ἡ μάησις, αὐ̄ μὴ νῶς παρῇ.

Quibus omnium disciplinarum studiosi & medicæ artis alumni præcipuè monentur, ut ad perfectam præceptionum utilissimarum noticiam adiungere conentur animi prudentiam, qua sine præcepta ad usum transferre & alijs hominibus sibi que ipsis prodesse admodum difficile est. Futurus itaque medicus non solum eos frequenter legat autores, qui de medicis materijs diligenter, fideliter ac rectè scripserunt: sed etiam interdum diuertat ad lectionem aliorum autorum, qui utilia orbi Christiano monumenta literis consignarunt. Plura enim ex illorum lectione breui temporis spacio cognoscere attento lectori licet, quàm experientia nos per omnē vitam erudiret, etiam si per fragilitatem humanarum virium possemus hoc mundi senescentis æuo cōtingere ætatem Mathusalem vel Nestoris. Præterea non tantum se frequenter adiungat eruditis medicis, quando ægros homines inuisunt & consilia de morborum curationibus instituunt: sed paulatim etiam operi manum admoueat & in dubijs affectionibus monitus ductusq; exercitatorū medi-

*Experientia  
præceptis ad  
iungatur.*



medicorū sequatur. Adquirenda igitur animi prudentia, quæ magnum clementis D E I donum est, tum diligenti ac frequenti bonorum autorum lectione, tum exercitijs in vita humana occurrētibus. Διπλὸν γὰρ ὁρῶσιν οἱ μαθόντες ζῆμα. Ab hoc studio ne ignavia, alex intempestiuo lusu, comestationibus, deambulationibus, voluptatum illecebris vel inani persuasione sufficientis eruditionis abstrahatur vnquā, tum exemplum sapientissimi Solonis sibi ob oculos ponat, qui in extremo senectutis tremulæ constitutus limine adeò cupidus fuit discendi, vt admirandam animi affectionem erga doctrinam Philosophorū de animæ immortalitate differentium eleganti hoc versu exprefcit, Γηράσχω δὲ αἰεὶ πολλὰ διδασκόμενος: tum perpendat, quid doctorū virorum senectuti conuenire censeat Poëta Græcus, cū ait, Καλὸν καὶ πρὸ γέροντι μάναίνειν σφόδρα. Studium enim medicum tot ac tāta mysteria habet, vt nulla vnquā ætas, nullaque diligentia illi ad eorundem perceptionem sufficiat, qui sufficientem ex eo eruditionem ac laudem reportare laborat. Septimum itaque, quod medico futuro necessarium est, tempus atque opportuna & sufficiens occasio censetur. Non enim vnus atque alterius anni spacio artis medendi præcepta integrè cognoscuntur, cū illius cognitio talis in medico requiratur ab Hippocrate, vt animo medici à natura insita videatur & dextrè opportuneque

VII.

Tempus &amp; occasio.



*Curiostas  
impedimen-  
tum studii.*

matturos fructus ferat: Neque vnus atq; alterius acri fortuita curatio medicum exercitatu, consummatum, felicem atque celebrem facit.

Præterea medicinæ studiosum politicis domesticisve negotijs nimium impediri aut non necessarium disciplinarum cognitione tractationeq; plurimum distineri neutiquā decet. Qui enim pluriū negotiorū tricis inuoluuntur, neq; omnia simul rectè curare, neq; singulis tempestiuè conuenienterq; vacare possunt: sed turbato animo ab hoc ad aliud feruntur atq; nullum rectè perficiunt. Postquā autē medicus Dei optimi maximi beneficio in sua professione tantum progressus est: ut acri hominibus medicas manus adhibere & medicinā facititare possit: omnem lapidē mouebit, ut bene viuendo ac feliciter operando excellentem autoritatem & celebrem famā apud suos ciues & alios adquirat. Alioqui enim frustra se tempus ac studium

*Quales debent esse medici.*

impendisse medicinæ cognoscet. Ut itaq; illud facilius rectiusq; fiat, admodū necessarium esse censemus, ut omnium ætatum medici memori mente hæc præcepta, quæ ordine proponemus ex veterum medicorum placitis, circumferant atque ita ob oculos posita habeant, ut vitam & actiones suas toto vitæ suæ tempore ad illa instituire atq; regere enitantur, quantum humana fragilitas fieri permittit. Ita enim fiet, ut hoc nostro æuo, quo maximè illud Hippocratis usurpari posset, Οἱ ἰατροὶ φήμῃ μὲν πολλοὶ, ἔργῳ δὲ πάλυτοι,

βατοί,



βαοι, neque in illorum numero habeantur, qui  
 medicos bonos & doctos ab impostoribus ac  
 malis nugatoribus discernere præ mentis im-  
 potentia & inscitia nequeunt: neq; vllum cum  
 barbaris & vitæ humanioris æquæ, ac omnis do-  
 ctrina hostibus commercium habeāt, ut ut illi  
 apud vulgus imperitum magni fiant & à sui si-  
 milibus adulatorum more inanibus ac stolidis  
 encomijs ad cœlū tollantur. Aliàs enim impo-  
 storibus ac nugatoribus familiares audire co-  
 gerentur illud vulgatum: Οἷον πρὸς οἷον φίλον,  
 καὶ ἀμαθία θράσος ἀπὸ γάρι. Inter eruditos verò  
 & disciplinis vtilibus liberaliter ornatos viros  
 atq; inter laudatos illos sycophantas ὅππῃ μὴ δὲ  
 κρίνουν, ἀλλὰ ὅς πλῆθει, si volumus prudētes esse, neq;  
 cū imperita multitudo aut in errorib. & incer-  
 tis opinionib<sup>9</sup> fluctuare, sicuti naucula, quæ si-  
 ne nauclero in mari spacioſo iactatur, vario ven-  
 torū turbine, neq; portū vllum recto cursu pe-  
 tit: aut cū valetudinis vitæq; nostræ discrimine  
 ab illis miserè decipi. Quod itaq; primū ac præ  
 cipuū homini, præsertim Christiano, esse debet,  
 id ipsum à medico, qui in Christi corpore viuū  
 membrū pmanere laborat, nullo modo alienū  
 esto, nimirū pius sit & in vero veri DEI timore  
 viuens, se, valetudinē suā, & oēs cū cogitatio-  
 nes tum operationes pijs precib<sup>9</sup> Deo cōmen-  
 der. Quod ut & ardentiore & crebriore zelo  
 faciat, statuatur non modò DEVM ubiq; præsentē  
 actionū humanarū inspectore & cogitationū

*Cognitione  
 mentis, non  
 opinione & ul-  
 gi iudican-  
 dum de me-  
 dicis.*

*Pietas medi-  
 co necessa-  
 ria.*

*DEVS o-  
 mnia videt.*



*DEVS roga-  
tus iuuat no-  
stros labores.*

in imo pectore latentium solertissimum explo-  
ratorem tum demum dignari nostris adesse co-  
natibus ac laboribus, quando pium ac benignū  
illius auxilium iustis atq; assiduis precibus in-  
desinenter nobis exposcimus: verū etiam si-  
bi persuadeat neminem hominum vel poten-  
tissimorum vel sapientissimorum quidquam  
liberè promittere, feliciter agere aut cum lau-  
de atque vtilitate prestare posse, quando beni-

*Homo nihil  
valet sine  
DEO.*

igno summi Numinis fauore destituitur. Illud  
animaduertēs doctissimus Græcorum Poëta-  
rum Homerus non sine mente dixit : Εὐδὸν

*Pietas mer-  
cedē à DEO  
habet suam.*

Θεῷ χεῖρας ἀνισχέμεν, ἀλλ' ἐλεήσει. Imò ipsam pie-  
tatem hominum omnium adeò gratam immor-  
tali DEO accidere, vt bonis præsentibus ac præ-

miis æternis ab eo ornetur, non solū vnani-  
mis sacrae scripturae consensus multis promissi-  
onibus & exemplis abundè docet & apostolus  
Paulus expressè testatur: verū etiam ethnici  
saniores viderunt quippiam diuini & singula-  
ris ornamenti inesse hominibus pijs, vt admi-  
ratione ductus Homerus in hac re dixerit βέλ-  
τερον ἡμᾶτα πάντα μετ' ἀθανάτοις ἀρίσκειν. Hoc pietatis  
studium sicuti in quouis vitæ mortalis genere  
hominibus omnibus summè est necessarium:  
ita medico vtilissimum ac conuenientissimum  
erit eam ob rem, quòd ad sistens ægris cogno-  
scet, quale subiectum sit suæ artis, nimirum ho-  
mo ad imaginem viui DEI conditus & anima  
rationali ornatus. Quod cum ad maiorem di-

*subiectum  
medicina.*

ligen-



ligentiam, integriorem fidem & vigilantiorē  
curam excitabit, quando ægrorum hominum  
saluti consulēt. Secundò commonebitur de  
humana fragilitate, quæ propter peccata varijs  
multisquē obnoxia est ærumnis & innumera-  
bilibus penè morbis, quibus dextrè, tempesti-  
uè & prudenter obuiam ire ac diligentem se in  
suo loco suoquē munere D E O & hominibus  
præstare conabitur. Suæ quoque sortis me-  
mor non planè adijciet animum rebus cadu-  
cis: sed illis tanquam bonus dispensator pru-  
denter frugaliterquē ad laudem D E I, Ecclesię  
Christianæ clementum, suam necessitatem at-  
que proximi vtilitatem vtetur, & subinde pijs  
meditationibus atque exercitationibus se præ-  
parabit, vt euocatus ex mortalis vitæ statione  
piè mori atque cum Christo & sanctissima o-  
mnium electorū corona in cœlesti patria æ-  
ternū vivere possit. Excludi enim inde mi-  
serrimum erit. Secundò medicus omnibus  
modis operam dabit, vt, quantū humanarum  
virium imbecillitas & corporis mortalis infir-  
mitas concedent, mente sana in corpore sano  
per maximam vitæ suæ partem fruatur: validas  
& professioni suæ conuenientes vires habeat:  
faciei colore optimo & membrorum totiusquē  
structuræ corporeæ habitu bono atquē decore  
esse appareat. Aliàs enim ei optimo iure obji-  
cietur illud vulgatum in medicos dictærum,  
quo medici suorum corporum curam habere

*Medicus no-  
uissima sua  
cogitet.*

*Sanitas me-  
dicis vtilis.*



*Sua valetu-  
dinem negli-  
gentes alijs  
consulere in  
morbis, diffi-  
cile possunt.*

iubentur. Neque sanè immeritò. Constat enim cum minimè alijs prospicere, multò minùs consulere posse, ut integra sanitate diutissimè fruantur vel à morbis liberentur, qui suorum corporum curam habere nequeunt. Ægri etiam homines difficiliùs medicis consilijs parent: taceo, quòd medicos ipsos rideāt & contemnant, quos circa curam suā incolumitatis negligentiores aduertunt, quàm viros doctos & prudentes decet, cum æquum sit etiam infirmum quemque ex plebe huic curæ, quantum potest, incumbere. Imò prudentiores homines facilè eiusmodi medicis occinunt illud Poëtæ:

Ἄπαντες ἐσμέν εἰς τὸ νοθετεῖν σοφοί·

Αὐτοὶ δ' ἀμφοτέρων τε ἔργα γινώσκομεν.

*Prudens animus cum bonis moribus requiritur in medico.*

Tertiò, animi mores quod attinet, id operæ ac diligentiaë medicus omnino dandum censet, ut omnibus tum ægris, quorū curam suscipit, tum amicis & ijs, quibus in quotidiana conuersatione frequenter utitur, videatur non modò, sed etiam sit prudens, verecundus, probus, integer, grauis, modestus, industrius, constans, cordatus, prouidus & cautus, ut tempore & loco personis singulis affabilem & sermone ac gestu mitem se ostendat. Eiusmodi enim animi dotes quanto magis in quotidiano hominum congressu in viris doctis emicant atque conspicuæ apparent, tanto maiorem tum admirationem, tum fauorem atque amorem in alio-



aliorum hominum animis excitant, ut eos colant, venerentur, plurimifaciant, atque eorum consilia experant. Mansuetudo etiam ac lenitas tam in verbis, quàm gestu ac vultu mirificè conciliant & mouent animos hominum, ut omni honore & obseruatione eos dignos censeant, in quibus has vultus, sermonis & gestus illecebras mirandaque honestissimarum virtutum ornamenta effulgere aduertunt. Quod innuere voluit Menander, quando scripsit in hunc modum: Ως ἡδὺ σιῶσει χησότης κεκραμένη. Omnibus itaque modis vir medicus, qui eruditionis fama inclarescere & felicibus successibus commendari gaudet, cauere debet, ne videatur austerus, superbus, petulans, iracundus, contentiosus, scurrilis & leuis, sicuti plerumque sunt improbi, audaces & indocti homines, quorum mores omnium bonorum odio & execrationi optimo iure subiacent. Ita, quod in consultatione de rebus publicis Hesiodus fieri commemorat his verbis:

*Animi doctes conciliant medico beneuolentiam.*

— Αὐτὰρ καλέεσι γέροντα,

Οὐνεκα νημερτὴς τε καὶ ἥπιος, ὃ δὲ θεμισέων

Λήγεται, ἀλλὰ δίκαια καὶ ἥπια δῶκεα οἷδεν,

etiam plurimi agrorum hominum, quando spes de vita ac valetudine recuperanda illis in arcto erit, ad eum confugient, quem placidum, mitem, affabilem, eruditum & agendo felicem medicum audiuerint: negligent verò semidoctos, superbos, audaces ac importunos, qui leuitate

B ij



*Silentium  
medicos or-  
nat.*

aut cōtendendi proteruia sese efferre & se ipsis doctiores contemnere solent. Quod faciunt plerumque δοξόποροι & scioli, quorum in animis nihil, nisi vacuum & stolidam summæ eruditionis persuasionem reperies, quoties periculum & examen de illorum famosa eruditione facere libuerit. Quartum medici ornamentum est taciturnitas, quam facilis & rectius colet, si illud Isocratis in mentem sibi frequenter reuocauerit: Δύο ποῖ' χαίρου' τὸ λέγειν, ἢ πρὸς ὧν οἶδα σαφῶς, ἢ πρὸς ὧν ἀναγκάην εἶπαι· ἐν δὲ ποῖς ἄλλοις ἀμεινον σιγᾶν ἢ λέγειν. Multa .n. sunt tum artis mysteria, tum ægrotum hominum mala, de quibus ne in priuatis, multò minùs in publicis congressibus mentio fieri debet: Multa etiam ab ægris ipsis aliquando dicuntur ac fiunt: multa in ædibus eorum committi aduertuntur, quæ extra limen nunquam efferri prudens medicus nouit. Nunquam itaque intempestius sit loquēdo de rebus, quæ ad se aut præsens negotium, quodcunq; acturus erit, minimè pertinere intelliget. Sed cogitet linguam prudentibus viris thesaurū concreditum esse, qui magnum bonum gignere habenti & alijs hominibus possit, quando dexter eius vsus, qui à ratione intelligenti regitur, accedit. imprudentibus verò magnum ac noxium malum adducit, quando immoderatè vel intempestiuè eo vtuntur, cui sententiæ subscribit Hesiodus, vbi ait:

*Lingua vsus  
bonū & ma-  
lum gignit.*

Γλώ-



Γλώσσης ποιησαυρὸς ἐν ἀνθρώποις ἄριστος  
Φειδωλῆς, πλείστη δὲ χάρις κατὰ μέτρον ἰσότης.

Nunquā etiam curiosè percontetur res no-  
uas, sicuti faciunt ij, qui nouitatis auidos ani-  
mos gerunt, & citra omne iudicium rationis,  
vera atque falsa non modò muliebri credulita-  
te accipiunt, sed etiā in vulgus spargere audent  
aliquando cum suo proprio malo, quod cum  
magna animi mœsti pœnitentia serò nimis in-  
telligūt. Constanti enim rumore postea men-  
dacij conuicti in ruborem cōuertuntur, & hoc  
præmij recipiunt, vt in posterum illis non faci-  
lè fides adhibeatur, etiam si vera dicant: sed ri-  
deantur atque contemptui propter leuem cre-  
dulitatem atq; inconsideratum linguæ intem-  
perantis vsum fiant. Quintò putet medicus  
cū futili vaniloquio & scurrili petulantia con-  
currere ac idem vituperium mereri vanam ia-  
ctantiam stultamque ostentationem atq; de-  
prædicationem suæ eruditionis, felicitatis aut  
cuiuscunque virtutis vel vitij: Et eam ob rem  
terribima hæc vitia cane & angue peius exosa  
habeat, detestetur atque fugiat, etiam si pluri-  
mi, aliàs non indocti medici hac re celebrem  
famam consequantur apud fœminas ac imper-  
itum vulgus, cū in eiusmodi medicis minus  
animosæ eruditionis, quàm ineptæ loquacita-  
tis, esse nemo prudens ignoret. Sicuti enim vas  
vacuum, si digito malle oве tundatur: aut vesi-  
ca, cui tres quatuorve lapilli iniecti sunt, cū

*Auidus no-  
uitatis non  
sit.*

*Garrulitas  
noxia.*

*Loquaces  
medicos vul-  
gus eruditos  
censet & a-  
mat.*



*Garrulita-  
tis & iactan-  
tie incōmo-  
da.*

mouetur, multum sonitum strepitumque edit:  
nihil verò soni nullusque strepitus auditur,  
quando ad summum replentur & concutiu-  
tur, sed gravitate prævalent, ne facile loco mo-  
ueri possint: Ita medicus, cui vera eruditio non  
contigit, multa intempestivaque loquacitate  
sefe effert, ut inscitiam suam apud imperitos  
homines tegat, cum verè docti ac prudentes  
medici moderatè se gerant in hac parte, unde  
fit, ut difficulter percontationibus aliorum eua-  
cuari possint. Petulantis autem ac loquacis  
linguæ homines, præsertim ij, qui apud ægros  
suos nil quidquam ad rem pertinentia garriūt,  
& suam cum eruditionem, tum experientiam  
atque felicitatem in curandis morbis, instar  
gloriosi militis, magnificè & sesquipedalibus  
verbis sæpius, quàm veritas & necessitas rei exi-  
git, ostentant, cæteros verò omnes conte-  
mnunt, risui atque despectui facile sese apud vul-  
gus, maximè tamen apud prudentes & corda-  
tos viros exponunt: ut ut multi hac ratione im-  
peritæ plebi & fœminis loquacibus placere, se  
ipsos commendare & compendia crebriora ad  
quæstum faciendū quærere videantur. Quem-  
admodum enim turpe est medicum gloriari de  
eo, quod in sua potestate non habet, sed mise-  
ricordis DEI donum optimo iure perhibetur:  
Ita honestissimum ducunt omnes prudentes  
homines artificis industriam, solertiam, fidem,  
integritatem ac felicitatem cōmendari ab ijs  
qui



qui artis præsidia & medici diligentem curam experti sunt. Modestè verò de se & suis operis sentire ac loqui, ubi res, tempus & personæ vel requirunt vel patiuntur, non vituperio ulli hominum datur, qui hoc agit, ut veritati consentanea dicere cognoscatur. Et si enim multi homines gestu risuq; aliquando simulant se delectatione iucunda affici, dum medici vel alij ridiculi gesticulatores risum aliorum captant & hac ratione alijs placere mirificè student: tamen boni prudentesq; viri aut aliquando tacitè cogitant, quod ille apud Homerum dicit: *Καὶ πῆπος παρθέκεν, ὅσσ' τ' ἄρρητον ἄμεινον*: aut facetè & falsè ineptias tales reprehendunt, quòd sciunt atque intelligunt homines multi sermonis difficulter veritatis ac secreti tenaces esse, & illiusmodi garrulos tum sibi ipsis, tū alijs quandoq; nocumento & ineuitabili periculo esse. *ῥῆμα γὰρ παρὰ καρτὸν ρητὴν ἀνατρέπει βίον*. Cogitet autè medicus ægros homines, siue illi sint magnæ autoritatis, siue è media plebe, morionem, qui ridiculus esse possit, quotidie inuenire & leui victu atq; amictu conductum fouere: cū medici eruditi, boni & fidelis operas rarò &

*Scurrilia dixeria quid efficiant.*

*Bonos medicos non vili mercede conductos.*



*Medici lo-  
quaces dif-  
ficiles agris.*

tur & non tam iocos morionum, quàm fideles  
medici prudentis operas desiderant, tanto pe-  
re abhorrēt audire garrulorum loquacitatem,  
ut illos longissimè à sua mensa remotos esse,  
quàm surdis admodumve molestis auribus au-  
dire optent. Quam ob rem non imprudenter  
poeta Græcus ait: Ἰατρὸς ἀδόλερος νοσῶντι πάλιν νό-  
σος. Qui denique suam turpitudinem & im-  
probitatem incontinenti lingua reuelat, semet  
ipsum despectū facit & alijs ad improbitatem  
viā aperit. Multi enim, sua natura & consue-  
tudine boni, possunt aliquando malo exem-  
plo eorum, qui alicuius eminentiæ & dignita-  
tis titulo antecellunt cæteris hominibus, dete-  
riores & nequiores fieri, ut virtutis ac honesta-  
tis in quotidiana hominum conuersatione ne-  
cessariæ viam paulatim exosam habere incipi-  
ant, atque ad omnia crimina & turpissima sce-  
lera proni non modò defleant, sed deinde

*Iniustum er-  
rorum patro-  
cinium.*

etiam περὶ φασιν τῆς σεαυτῆ κακίας exempla docto-  
rum virorum adducant: cū tamen scire debe-  
rent scelus non eo nomine virtutem dici, neq;  
turpem infamiam atq; pœnam effugere, quòd  
principes aut fama eruditionis celebres viri,  
imbecillitate carnis humanæ quandoque vi-  
cti, illud prius commiserint. Meminerint itaq;  
medici apud ægros homines percontandum  
& loquendum de ijs, quæ necessaria sunt ad æ-  
grorum corporum sanitatem restituendam: sic  
uti apud sanos locum habent quæstiones &  
narra-



narrationes necessariae, honestae ac utiles. In quibus gravitatem quandam, cui comitas & prudens mansuetudo coniuncta sit, apparere admodum iucundum est. Octavo vitam moderatam & cum bene dispositam, tum circum- *Vitam medicam compositam a Sto.* spectam agat, ne videatur moribus dissolutus esse, suam valetudinem & famam honestam negligere, nihilque amplius intelligere, quam infimus quisque ex plebe. Hoc ei apud alios homines plurimum autoritatis & existimationis conciliabit. Odit enim DEVS vehementes impetus: odere eosdem etiam ciues; cum moderatio prudens mirifice DEO & optimo cuique hominum grata sit. Qua de re auream mediocritatem commendare posteris volens HOMERUS ait: ἀμείνω δ' αἰσιμα πάντα. Vbi enim conueniens moderatio affectuum, gestuum ac sermonis in homine apparet, statim arbitramur prudentem bonamque mentem illi à DEO contigisse, quae eum idoneum tractationi cuiusque negotij facit. Nonò temulentiam, crapulam, *Quae vitia vitandissima sunt.* intempestiuam aleam, perditum lusum & procacem leuitatem famae atque integritati tum omnium bonorum nocere, tum praecipue medicorum honori atque bono nomini incommodum afferre puter, qui facturus medicinam non solum virorum, sed etiam foeminarum ac virginum curam suscipere cogitur: & cum variae aetatis, varij sexus varijque status hominibus congruitur: vbi cum tum praesentem ani-



mum habere & affectus gestusque suos intra  
 honestatis ac continentiae terminos retinere  
 omnino necessum, admodum piū decorūmq;  
 est. μακάριον γὰρ φρόνησις ἐν χρεῶν ὁρῶ. Præterea  
 lasciviam, fornicationem, impudicitiam impu-  
 ritatēque vitæ detestetur atq; fugiat. Et hoc  
 cū admodū difficile sit factu ijs, qui nondū  
 coniugij septis inclusi sunt, tum ob fragilita-  
 tem humanæ carnis, tum mūdi illecebras: me-  
 dicus memor præcepti, quod apud Platonem  
 libro 7. de Legibus his verbis extat: Μηδένα  
 πολλὰν, μηδένος ἀπιδεῖν, πλὴν γαμετῆς ἐαυτοῦ γυναικός,  
 studeat secundum immortalis DEI æternam  
 & immutabilem voluntatem necessariāque  
 de propagatione hominum providentiam sibi  
 inuenire legitimam coniugem. Ita enim com-  
 modiū intra continentiae fines affectus cupi-  
 dinēque retinebit, bonus paterfamilias esse  
 laborabit, atque ægris hominibus minore cum  
 difficultate adesse operāmq; suam fideliū con-  
 ferre poterit, quā cū maritali iugo solutus  
 viuit & alienorum opera vti cogitur in ijs quæ  
 ad quotidianum vitæ humanæ vsum necessaria  
 sunt. Huic cōmonitioni vt toto vitæ suæ tem-  
 pore commodiū pareat & dignam sua perso-  
 na suāque professione vitam agat, non modò  
 bonorum atque honestorum virorum conuer-  
 satione plurimū ac præcipuè vtatur: prauos  
 verò, impuros & petulantes, tanquā corrupto-  
 res honestæ existimationis & integritatis, à sua  
 fami-

*Medicos ma-  
 ritos esse con-  
 mens.*



familiaritate alienos faciat: verum etiã in con-  
 uiuijs rarus sit, & vini largum vsum euitet, in  
 quo luxuria & incendium libidinis perhibetur  
 esse. Quod vt promptiùs faciat, nunquam a-  
 nimo suo excidere patiatur auream hanc diui  
 Hieronymi sententiam: Nihil adeò obruit in-  
 telligentiã, sicuti comestatio & ebrietas: quam  
 etiam Philosophus Seneca voluntariam insa-  
 niam esse asseuerat. Turpe enim & noxium  
 valde est medicum ac Philosophum scire ex in-  
 temperantia & incontinentia non aliter, atque  
 ex vberissimo fonte scaturire fœcundam mate-  
 riam plurimorum morborum atque corrupte-  
 lam certissimam virtutis, honestatis iudicijque  
 ita, vt cum sanitate corporis iacturam faciant  
 prudentiæ, quicunq; temulentiam longa con-  
 suetudine inducti affectant: & tamen in eodem  
 criminum herere luto, ex quo egros suos com-  
 monitionibus, consilijs & auxilijs aliquando  
 educere debent. Præterea naufragium auto-  
 ritatis & continentia patiuntur, quicunque ni-  
 mio vini vfu delectantur. Occasionem enim  
 peccandi vitare nequeunt, cum inter virtutem  
 ac vitium æquè, ac inter honestatem & turpi-  
 tudinem ratio titubans vinoque corrupta aut  
 planè obruta discrimen nullum videre, neque  
 vllum decorum, quod tempus, locus, negotia  
 & personæ requirunt, obseruare valeat. Ebrie-  
 tas enim, teste Origene, facit ex homine bestiã,  
 ex robusto infirmũ, ex prudente fatuum. Cui

*In Vino lu-  
xuria.*

*Ebrietas in-  
saniam.*

*Intemperan-  
tia fons mor-  
borum & Es-  
torum.*

*Ebrietas in  
Viciu perit.*



*Medicos e-  
briosos malè  
iudicare.*

sententiæ assentitur diuus Augustinus, cùm ait ebrietatem esse blandum Demonem, dulce venenum, suaue peccatum. Aufert enim illa memoriam, dissipat sensus & confundit intellectum. Nunquam autem quisquam disertissimorum Philosophorum, etiam si hoc anxie & doctè conaretur facere, viris prudentibus persuaserit homines temulentia, crapula ac luxu deditos præsentem mentem habere, & rerum grauissimarum, quales in morborum curationibus occurrunt medicis, tractationem atque inuestigationem prudenter, cautè & dextrè sustinere posse. Quemadmodum hoc disertè Athenæus affirmat, vbi Ninia mores ignauos reprehendit & inquit: ἄριστος ἐδίδειν καὶ πίνειν, τὰ δ' ἄλλα κατὰ πλεῶν ὄθει. Eiusmodi enim viuendi consuetudo prauis succis corpus vniuersum replet, qui crassos spiritus generant, à quibus facultates & organa læduntur, actionesque naturalis & vitalis facultatis languent: sed animalis facultatis functiones aut admodum debilitantur aut omnino corrumpuntur. Ob id non malè sensisse videtur Græcus, qui tradit παχύνειν τὰς ἐν τῷ σώματι πικτείνοντες. Curam igitur atque diligentiam accuratam medicus adhibeat, vt sobriam & temperantem vitam agat, mentis iudicium firmum & sanitatē corporis integram per plurimum vitæ caducæ cursum habeat ac retineat. Sic certè nullo non tempore inuenietur εὐφρων ἐς τὰ μάλιστα καὶ δραστήριος, καὶ δεινὸς ἀρμόστι-

*Medicos sobrios esse debet.*



μόσαδς τῷ παρεμπύπτονι, καὶ παραστῆσαι οἷός τε τῷ λόγῳ  
 τὰ βεβηλευμένα. Plurimos autem hoc nostro *Pleriqz cul-*  
 tempore reperias in ordine medicorum non *pant alios et*  
 vulgariter doctos, qui egregiè & copiosè agris *non sine cri-*  
 hominibus, quorū curationi incumbunt, præ *mine viuūt.*  
 cipiunt de abstinence & temperantia in cibo  
 & potu æquè, ac alijs, quibus humana vita ne-  
 cessitatis vel voluptatis causa persæpe utitur, ut  
 plurimùm tamen abutitur, diligenter obser-  
 uanda: cùm illi ipsi ebriosi sint & nihil prius,  
 nihilq; iucundius sibi accidere posse statuant,  
 quàm cùm in conuiujs multitudine vini debi-  
 litantur & ita infirmi dimittuntur, ut neque  
 mens, neque manus, neque pedes officium su-  
 um facere valeant. Taceo iam de quibusdam  
 epulonib' & gulosis comestatoribus, qui nun-  
 quam cibo nimis auidam alium saturare pos-  
 sunt, licet *σωφροσύνη σώζουσα ἢ τὴν φρόνησιν.* Turpis *Arist. lib. 6.*  
 verò ebrietas & pernicioſa crapula quantum *Eth. cap. 5.*  
 malorum humano generi afferant, nemo satis  
 explicare potest. Quam ob rem tum omnibus  
 hominibus, tum medicis in primis fugienda  
 est. Temperantes enim & sobrios eos vel ma-  
 ximè esse decet, cùm agris quacunque diei no-  
 ctisq; hora parati esse cogantur, si fideliter suo  
 munere fungi volunt. Tunc autem, cùm agris *Medicos sem*  
 hominibus subitum auxilium admouendum, *per paratos*  
 cōsiliū dandum aut consolatione mentibus *esse debere*  
 afflictis & de morbi exitu anxijis occurrendū, *agris, quod*  
 mens vino sepulta nihil solidi iudicij habet, ni- *ebriosi nō fa*  
 cere possunt.



*Prudens ab  
ebrijs medi-  
cis cauet se-  
bi.*

*Medici ha-  
bitus.*

hil sanæ rationis possidet, nihil cum prudentia decernit, nihilque cautè pronunciat: sed errat ac semetipsam confundit, ut non videat, quid præsens negotium requirat. Nullus præterea ægrorum hominum, modò ij sibi mente consent, est, qui ebriosi medici consilio uti vel monitis illius parere velit. Imò quantò sunt delicatiores ægri, tantò magis abhorrent à fœtore oris, qui excitatur à vino, dum in ventriculo repleto cruditatem eructando & exhalando indicat: multò verò magis abstinent ab illiusmodi medicorum consilijs. Ut itaque in suspicionem temulentix medici non incidant, quando ægros suos inuisunt, dent operã, ut sobriam temperantiam constanter colant, neque ex ingurgitatione vini immodici, neque esu allij, ceparum, porri, raphania aut similium rerum, quæ fœtore graui spiritum oris inficiunt, ingratum fœtorem exhalent. Hanc autem mentis impotentiã in ebriosis eleganti similitudine depingit Isocrates, cum inquit in oratione ad Demonicum: ὅταν ὁ νῦν ὑπὸ οἷνι διαφθαῖ, ταῦτα πάχει πῖς ἄρμασι πῖς τὸς ἡνιόχης ἀποβάλλουσιν. Decimò medicus ornamentis animi, de quibus hætenus diximus, sufficienter instructus corpus suum neutiquam negligat, cum illud sit animæ agentis domicilium, quod politum ac nitidum esse nō iniuria debet, quando purum & à Deo eximjs dotibus ornatum hospitem sustinet. Incumbat igitur in id, ut amictum mundum, mediocrem



diocrem & tum elegantem, tum fragrantiam non suspectam spirantem habeat. Vestis enim honesta & personę officiōque conueniens addit magnū decus viro, & cum hominibus magis commendat, quā si auro & gemmis vndique niteret & effœminatam mollitiem vel scurrilem leuitatem suo vestitu ostenderet. *Medici non cum autem omnem ac luxum γυμνασίου con-* *sint compes-*  
*Et femina.*  
 uenientem, quantum potest, vitet aut dissimulet, ne videatur affectato ornatu, instar pauonis admirantis suas pennas, inolescere & admirationem vulgi quærere. Ægri enim homines non ornatum medici quærere & videre, sed artificis operas & agendi felicitatem experiri malunt. Vbi & illud tenendum, quod congressurus cum hoste ægri hominis medicus non debeat accinctus ire gladio, sed instructus artis præceptis & præsidijis saluberrimis, quibus vis morbi oppugnari & sanitas in integrū statum restitui possit. Plurimi enim hoc nostro æuoparum memores Hippocratici præcepti, quo medicum nihil ænei secum gestare vult, instar militum aut gladiatorum ense instructi a grossuos visitant, ac si cum ijs in arenam descendere & infensis animis armisq; decertare deberent. Num hoc hostilis animi indicium erga morbum esse: an inimicitias cum hominibus gerentes armis se munire: an præter venena inconuenientiāque medicamenta, qualia ab imperitis impostoribus, qui plerumque inscitiam

*Armati medici.*



suam tali habitu velant, offerri solent, etiam armatas ense manus ægrorum hominum corporibus adhibere: an verò auctoritatem suam hoc armorum habitu in liberis & bene constitutis urbibus, ubi pacis & iustitiæ leges vigorem suum habent, amplificare velint, nondum intelligo. Hoc scio, quòd sit admodum ineptum lateri adhærere onus ferreum, cuius nullus apud ægros usus est. Anxij enim & de vita incolumitateque suorum corporum solliciti se neque iugulari, neque impeti, neque defendi armis, sed consilio operisque medicis iuvare desiderant

*Incontinenter non ridendum.*

*Ioci apud ægros intempestius.*

ægri, ut à morbis eluctentur. Unde cùm medicus non facilè, neque effusè apud ægros homines aut etiam alios, quibus cum quocunque loco versabitur, rideat. Præter id enim, quod lasciui ac dissoluti moribus censentur ij, qui facili de causa cum cachinno plurimo rident, homines ægri, qui aut graues prudentesque sunt, aut doloribus affliguntur & morosi impatientesque sua natura apparent, magnopere molestia affici solent intempestiuo tum medici, tum circumstantium risu, sicuti & qui ore animo ferunt hos, quorum animos mœrore & dolore affici vident ob cruciatus, quos ab ægris ipsis sustineri audiunt. Adeò enim intempestiuo accidunt ægris risus, cachinni & ioci adstantium hominum: atque ex funere amicorum vel rei familiaris iactura mœstis atque perturbatis suauissimæ harmoniæ, musici concentus & alia adhiben-



adhibentur, quæ solent læticiæ excitandæ cau-  
 sa ab hominibus usurpari. Medicus itaque non  
 modò semet ipsum continebit, ne intempesti-  
 uè aut nimiùm rideat, quoties ludicra profe-  
 runtur aut geruntur ab hominibus, quibus cum  
 cōuersabitur: verùm etiam risum aliorum scur-  
 rilibus iocis ineptisve gestibus captare, maioris  
 autoritatis & grauitatis causa, verebitur. Ita *Favor agri*  
 fiet, vt medicus agro homini, cuius fauorem *confert me-*  
 sibi summè conciliare debet, magis gratus sit *discoperis.*  
 & spem magnam faciat de fideli curatione at-  
 que felici euentu. Quod ad morbi curationem  
 multum momenti asserre docet Auicenna 6.  
 Naturalium his verbis: Fiducia, quam æger de  
 medico concipit, & arti & consilio & omnibus  
 medicinæ instrumentis præferenda. Dum au- *Adulari me-*  
 tem conatur hoc apud agrum obtinere, cautè *dicos non de-*  
 obseruet, ne adulationis suspicionē tam apud *cet.*  
 ægros ipsos, quàm circumstantes incurrat: &  
 tamen omnibus animi intentionibus hoc agat,  
 vt agro iucunda voluptatēque inducentia  
 parcè atque tempestiuè dicat ac faciat. Ita enim  
 effectum dabit, vt magis obsequentes ægros  
 habeat in omnibus, quæ agenda erunt. Si au-  
 tem medicus dixerit vel fecerit ea, quæ ingrata  
 sunt & ægri animum offendunt, facilius ab eo  
 contemnetur. Accedit & illud malū, quòd ex- *Motus ani-*  
 perientia cognitum sit subitis affectuum moti *mi malum*  
 bus, quos intempestiui rumores & nuncij ex- *gignere.*  
 citarant, plurimos homines exanimatos fuisse

C



*Continētia  
medicos or-  
nat.*

*Curiosi ad  
consultatio-  
nes inepti.*

*Tolerantia  
necessaria  
est.*

& celerrimè è mortalium consuetudine abijs-  
se. Hoc ipsum pluribus exemplis comprobant  
Plinius lib. 7. Natur. Hist. cap. 53. & Valerius  
Maximus lib. 9. cap. 12. Duodecimò medi-  
cus oculos continētes manúsque abstinentes  
habeat in omni loco, ne cognoscatur moueri  
vllare, quę sensibus externis occurrit. Ita enim  
fiet, vt animo præsenti sit & paratus inuenia-  
tur ad omniū negotiorum tractationem, quæ  
medici viri conditio, tempus item, locus & per-  
sonæ requirunt. Curiosi verò & solliciti inda-  
gatores rerum, quæ offeruntur aliquando sen-  
sibus externis, dum res aliæ ac magis necessarię  
agenda sunt, rarò serijs & arduis rebus aduer-  
tentem animum habent: rarò etiam prudenter  
in medium de præsentibus negotijs cōsulunt.  
Imò suspicionem imprudentiæ ac impudentiæ  
apud præstantes atque cordatos viros non ef-  
fugiunt, quod tantum crimen est, vt ex eo o-  
mnem turpitudinem nasci posse testetur Xe-  
nophon, cū ait, τὴν ἀναισχυτείαν μέγιστον εἶναι ὅτι  
πάντα τὰ αἰσθὰ ἡγήμυνα. Decimotertiò inspiciat  
theatrum humanæ vitæ: & deprehender, qualis  
sit omnium mortalium conditio in hoc mun-  
do. Nam hoc pacto, dubio procul, cognoscer  
nullum statum esse in hac ærumnosa vita, qui  
non expositus sit aliquibus oneribus & mise-  
rijs, vt bene ac feliciter cum hoc homine egisse  
videatur diuina clementissimi DEI prouiden-  
tia, qui minimis malis in vario vitæ humanæ  
thea-



theatro premitur. Monstro autem similis in- *Homomiserijs obnox-*  
 ter homines ageret, qui nullis vnquam exerci- *us.*  
 tus malis vitam duceret. Hoc illi documento  
 sit, vt intra fortunę suę limites maneat, tempo-  
 ribus sese accommodet, præsencia moderatè  
 ferat, neque fortunæ iniquiori succumbat, ne- *Viramq; for-*  
 que nimia rerum prosperitate elatus atque vi- *tunã ferendam.*  
 ctus in vllum malum incidat. *κίνησις γὰρ καὶ μετα-*  
*βολὴ τῆς φύσεως ἢ τύχης.* Siue itaque aduersa fortu-  
 nã instat violentia, animo forti duret, sicuti vi-  
 ros prudentes atque magnanimos decet: neq;  
 præsencia contemnat, neque maiora venari in-  
 tempestiuis conatibus laboret: *μεγála γὰρ δὴώ-*  
*κειν, καὶ τὰ παρόντα ἔφέρειν, μαυνομένων οἱ πρόποι.* Siue  
 æquiore fortunæ fauore adiutus feliciter agit,  
 non nimis animum erigat, neque temere for-  
 tunæ blandicijs fidat. In summo enim statu *Fortuna in-*  
 prosperitatis cùm nos consistere opinamur, *stabilis.*  
 splendor fallacis fortunæ interim tristi infelici-  
 tatis nebula obscuratur: interim omnino fran-  
 gitur: sæpenumero etiam malo multat tanto,  
 vt prioris felicitatis nos pœniteat pudeátque.  
 Si itaque vnquam magis opus est cauta ac pro-  
 uida attentione, certè tum medicum pruden-  
 tem & suarum rerum non ignarum esse decet,  
 quando blandiri sibi videt omnem fortunæ o- *Fortuna fa-*  
 perationumque euentum, ne in subitum ali- *uente prou-*  
 quod malum præcipitetur, veluti incautis & *dè agendū.*  
 imprudentibus accidit. Quam mentis proui-  
 dæ solertiam & curam mirificè commendat



Euripides, ubi inquit : Σώφρονός ἀπιστίας ἔκ' ἔστιν ὁ δὲν  
 χρησιμώτερον βροτοῖς. Vbi enim exemplis tum alio-

*Animus ex-  
 pertus nulli  
 fortuna ce-  
 dit.*

que experiētia satis edoctus animū ad omnem  
 fortunæ mutationem paratum, munitū ac con-  
 firmatum habuerit, faciliṃ ac felicissimè o-  
 mnem varietatē, quæ rebus humanis frequen-  
 ter accidit, non modò placidè sustinebit, sed e-  
 tiam perferendo prudenter durabit, dum æ-  
 quioris temporis melior spes ac feliciores suc-  
 cessus affulgeant. Spes enim corrigendæ for-  
 tunæ admodum impudens & valde audax ali-  
 quando multorum hominum animos erigit &  
 sustinet, ne ærumnis subitò cedant, néve malo-  
 rum mole omnino opprimantur: sed durent &  
 meliori fortunæ inter afflictiones seruentur.

*Spes impu-  
 dens.*

Qui verò in arduis tentationibus atque æru-  
 mnis constitutus, virtute Dei adiutus, constan-  
 ter perseuerat & in pio honestoque vocationis  
 suæ periculo permanet: non pœnitendos con-  
 stantiæ suæ fructus fert. Deus enim, omnis  
 consolationis fons ac omnis boni origo, fidelis

*DEVS ad-  
 uersis termi-  
 num ponit.*

atque verax est, nec suos vnquam ultra vires  
 tentari sinit, sed cum tentatione exitum feli-  
 cem dat. Plerumque autem ad duras aduersi-  
 tates & magna fortunæ incommoda sequitur  
 insperata, magna, & acceptanda felicitas, quæ  
 facili negotio rependit iacturam rerum, quam  
 tempore infelicitatis homines prudētes æquo  
 animo tolerarunt. Denique res tum prospere,

ra,



ra, tum aduersa viros exercent, & eorum ani- *Prospera ex*  
mos instruunt experientia, vt prudentia & *cipiunt &*  
animi magnitudine pluribus in societate ho- *probant ho-*  
minum praestent. Hinc est, quod dicit Phile- *mines affli-*  
mon; *ctos.*

Εἰ ταῦτ' αἰὴρ γὰρ ὅτιν ἀνδρὸς διάφορος,

Εἴ τῃ πότῃ κακὸν εὖ φέρειν καὶ τὰ χαλόν.

Ita verò, quod quartum supra decimum pre- *Auaritia*  
ceptum esto, medicus diuitias aestimet, vt neq; *fugienda.*  
in rebus quærendis nimium avarus deprehen-  
datur: neq; in paratarum rerum vsu vel potius  
abusu & profusione prodigus cognoscatur:  
neq; in quotidiano victu sordidus ob nimiam  
tenacitatem appareat. Auaritia enim & nimia *Auaritia*  
cupiditas possidendi diuitias multis homini- *radix ma-*  
bus est incitamento ad horrenda mala, qui iu- *lorum.*  
stitiæ & mutuæ postmodum charitatis parùm  
memores per fas nefasq; rapiunt ac corradunt  
opes, cùm interim ignorent *μη κακὰ κερδαίνειν,*  
*κακὰ κέρδεα ἴσα ἄτησι.* Hi autem non modò re- *Prauum la-*  
bus suis nihil addunt, quòd malè parta malè di- *crum instar*  
labuntur, & aquilarum pennas imitantur afe- *damni.*  
rendo consumendòque id, quod bono iustòq;  
titulo partum fuerat, vt prudenter docet hac de  
re Isocrates, cùm ait *τὸς χρηματισμοὺς τὸς παρὰ τὸ δι-*  
*καλον γιγνομένους ἡγεῖσθαι μὴ πλεον, ἀλλὰ κίνδυνον ποιήσας:*  
Sed etiam aliorum hominum inuidentiæ, odio *Diuites o-*  
atque obtreccionibus semet ipsos obijciunt. *dys obnoxij.*  
Hinc Græci occasionem sumpserunt, vt dixe-  
runt: Πλεονέκτης ἅπας ἄδικος. Nimia porrò profu-



*Prodigali-  
tas fugien-  
da.*

*Sordida te-  
nacitas ar-  
guet animū  
abiectum et  
seruilem.*

*Frugalitas  
medicis est  
vfu.*

sione cūm parta dilapidant & absumunt, diffi-  
cile paupertatis malum sibi vltro adducunt,  
quæ eos deinde docet, ὅτι δεινὴ ἐνὶ θυμῷ φειδῶ: &  
alijs hominibus occasionem dant, vt suspicen-  
tur mala conscientia quæ sita esse, maloque ti-  
tulo possideri bona, quæ turpi luxu aut inani  
ostentatione absumi vident. At nimia tenaci-  
tas, quæ opibus partis cum ratione & discretio-  
nis occasione liberaliter vti non finit, primò  
medicum, qui sordidè viuit, etiam si amplas di-  
uitias possideat, ostendit mente imbecilla &  
impotenti esse, quæ non tam diuitijs imperat,  
quàm turpiter iisdē seruit: deinde alijs se ipsam  
inuisam reddit atque facit, vt medicus verum  
decus bonamque existimationem amittat, quæ  
ex legitima diuitiarum possessione plerisque  
contingit. De quo illud Hesiodi verissimè v-  
surpari posse existimamus: χῆμα παύχῃ πέλειται  
δειλοῖσι βροτοῖσι. Legitimum enim ac liberalem  
diuitiarum vsum, qui auream mediocritatem  
nunquam excedit, virtus & gloria comitatur:  
sicuti sordidam tenacitatem excipit odium, in-  
uidia & contemptus. Vt plurimū enim  
fit, vt homines vilioris fortunæ odio prosequan-  
tur ac crimentur viuos æquè ac mortuos di-  
uites, qui liberali mediocritate vti nequeunt in  
possessione & vfu diuitiarum, sed auro incu-  
bant & sordida turpique tenacitate ostendunt  
se diuitiarum misera mancipia vilè que seruos  
esse. Quam ob rem medicis omnibus tutissi-  
mum



mum erit non tanto studio operam dare, vt di-  
 tescant, quanto conatu incumbendum est, vt  
 sint & habeantur boni viri ab omnibus, quibus  
 vnquam innotescant. Sicut enim DEVS omni-  
 bus vitæ temporibus subsidia pijs bonisq; ne-  
 cessaria abunde largitur, dum modò vocatio-  
 nis suæ munere fideliter & diligenter fungun-  
 tur: Ita diuitiarum honorumque augmenta  
 citra multum negotium, citràque animi curas  
 tempore opportuno adiicit ijs, qui in statione  
 sua perseverant & necessaria quæque ab ipso  
 petere atque expectare præsentibus animis au-  
 dent. Decimum quintum præceptum est, vt  
 ingressurus ægrorum hominum contubernia  
 neque properet, neque impetuoso incessu im-  
 portunus, neque clamore aut risu, quod insa-  
 norum leuiumque hominum est, neque super-  
 bis gressibus difficilis ac molestus sit. Modestè  
 autem, quemadmodum virum prudentem de-  
 cet, ingrediatur & sereno vultu appareat, vt æ-  
 gro homini gratus esse possit. Non subitò æ-  
 grum interrogando aut contrectando adoria-  
 tur, sed placidè alloquatur: Inquirat de præter-  
 itis, vt causas externas & antecedentes exactè  
 cognoscat ac faciliùs in internarum causarum,  
 quæ sunt materiæ, in quibus essentiæ morbo-  
 rum consistunt, exactam noticiam deueniat:  
 Præsentia inspiciat & rationis iudicio exami-  
 net, vt tum morbum intelligat, tum naturam  
 ac qualitatem eius deprehendat: denique cau-

*Diuitia &  
honestas à  
DEO.*

*Qualis in-  
gressus medi-  
ci debeat es-  
se ad ægros.*

*Quæ interro-  
ganda & di-  
cenda medi-  
co apud æ-  
gros.*



*Cautè pradi-  
cendum.*

*Quid medi-  
cus conside-  
rare debeat  
in agro cor-  
pore.*

*Virium ro-  
bur conside-  
randum.*

fas morbi internas, citra quarum cognitionem nihil efficere poterit, sed aërem feriet & in incertum omnia præsidiolorum actionumque suarum tela diriget, eruat & futura in morbo cognoscat. Ita enim de symptomatibus præteritis & sequentibus, ut & de morborum temporibus, certus fiet. Futura autem, qualia sunt morbi exacerbatio vel remissio, symptomatum concursus, morbi duratio & euentus, acuta diligentique mente cogitet: neque temere, sed cautè de ijs pronunciet, ne aut turpis diuinator aut leuis mendax deprehendatur. Multa enim præter spem & omnem expectationem æquè, ac experientiam circa ægros contingunt, quæ prænunciandi certitudinem multis modis eludunt. Decimosextò considerabit tum naturale egri corporis temperamentum, ut securius iudicando statuere possit, in quo gradu recesserit morbus à naturali corporis malè affecti temperamento: tum etiam locum affectum indagando cognoscet, ut eius naturam, temperiem, sensum, figuram, positum, facultatem & actionem exploret, atque de debita medicamentorum substantia, qualitate, quantitate, forma & tempore exhibitionis commone fiat. Decimoseptimò vires tum totius corporis, tum affectæ particulæ diligenter cum morbi symptomatumque vehementia & causæ coniunctæ multitudine atque malignitate conferat, ut futurum morbi exitum & medicamentorum effectum



fectū prospicere atque diuinare propemodum  
 possit. Quod eum in agendo securum reddet *Gal. lib. 9.*  
 & à calumnia redimet, quando morbi vis & *Meth.*  
 causæ internæ violentia vires in ægro corpore  
 prosternere aduertentur: vel eedem ad exitum  
 vsque morbi duraturæ sint. Sicuti enim auda-  
 cter tutóque agere iubetur medicus, quando *Quid Viriū*  
 vires ægri corporis validæ sunt, adeò vt durare *robur mone*  
 possint tam diu, quàm diu coctio materie peccantis fieri cogitur: Ita illis adeò languidis & e-  
 uictis, vt periculum sit, ne antè concidât, quàm  
 coctio atque eductio peccantium materierum  
 perficiatur, planè nihil sibi tentandum cense-  
 bit. Nihil enim proficiet, etiamsi præsentissi-  
 mæ efficacix remedia adhibebit: sed potiùs in *Viribus col-*  
 animis imperitorum hominum videbitur suis *lapis medi-*  
 medicamentis virium robur, quod ægro cor- *cus agens pe-*  
 pori reliquum fuerat, nimis audacter & intem- *riclitatur*  
 pestiuè oppugnasse vitamque ægro homini e- *de fide & fe-*  
 ripuisse. Decimooctauò medicus ægro ho- *licitate.*  
 mini commodum habitandi locum eligat, in *Qua disponē*  
 quo aër sit natura aut arte ita præparatus, vt *da ordine*  
 morbo & causæ morbificæ resistat: atque tem- *in cura.*  
 peramento naturali ægri hominis, quantum *Aër.*  
 fieri potest, consentiat, vel non nihil in contra-  
 rium declinet tum, quando morbus tempera-  
 mento naturali in qualitatibus superantibus  
 consentit Decimononò cibum & potum æ- *Cibus & po-*  
 gtis hominibus præscribat talem, qui morbum *tus.*  
 oppugnet, causæ morbificæ generationem am-



*Somnus &  
vigilia.  
Exercitium  
& quies.  
Inanities &  
repletio.  
Animi affe-  
ctus.*

*Medicus or-  
dine certo  
procedat.*

*Utendū pra-  
sidijs effica-  
cibus.*

pliolem prohibeat, id verò, quod generatum in corpore causa materialis affectuum existit, consumat & subducatur: ægri hominis naturali temperamento ac viribus conueniat: medicamentorum denique operationes iuuat ac promoueat. Somni & vigiliarum certum tempus, veluti quieti atque exercitio legitimam rationem & conuenientem horam definiat: Inanitionem ac repletionem necessariam atque circumstantijs indicando vrgentibus maximè congruam adhibeat. Et denique animi affectus ita moderetur, vt ægri hominis sanitas iisdem iuuetur, causa morbi minuatur, morbus arceatur, & medicus, iuuante Dei fauore, qui æquè ad curationes morborum, atq; ad omnia negotia, ab hominibus rectè perficienda plurimum adiumenti & emolumenti adfert, sibi ipsi laudem adquirat. Vigefimum præceptum est, vt habeat non modò suarum operationum certas intentiones, quarum ductu singula ordine certòque tempore fieri oportet, quæ morbus, causa morbi, symptomata, ægri hominis naturale temperamentum, vires, ætas, sexus, vitæ genus, consuetudo vitæ præcedens, locus affectus, anni tempus & aëris constitutio agere iubebunt: sed etiam saluberrimis ac probatæ efficaciz medicinis atque præsidijs accommodatis vt instructus sit, seplafias locupletiores frequenter ingrediatur & simplicia atque composita sæpe inspiciat: interdum etiam Antidotorum



torum compositionibus adsit, vt videat, qua diligentia ac fidelitate à pharmacopœis eadem præparentur. Parum enim prudenter solent agere medici, qui domi desident & rescripta in myropolia mittunt, vt ibidem medicamenta componantur. Nam magna negligentia est ministrorum, maior hominum auarorum improbitas, qui tenacitate ac auaritia corrupti sapissimè obsoletis, & marcere, nidore putredinèue corruptis pharmacis vti potiùs audent, quàm vt probatas ac recentes medicinas leui ære comparent: sæpe etiam in penuria eorum simplicium, quæ medicus præcipuè destinat operationi, temeraria malitia permutant medicinas & colore similes substituunt, etiam si planè aliam agendi vim habeant. Tunc autem aut nihil, aut nimium, aut contrarium, quàm medicus conatur, assumpta pharmaca in ægro hominis corpore agunt & à medico fraudis perpetrata ignaro hominis decumbentis vita in periculum ducitur. Præterea medicus, ignarus cõmissæ ab alio fraudis, incipit de artis suæ certitudine dubitare: ac celebrem famã, quam ex felicibus successibus habere cupit, omnino amittit. Si autem frequens in seplasijs fuerit, *Medici præsentia acuis* sua præsentia & inquisitione excitabit myropœorum diligentiam atque attentionem maiorem, quàm compositioni & præparationi *pharmacopœorum,* pharmacorum aliàs adhibent, quando oculus medicorum vel etiam dominorum abest, pla-



*Tutis medi-  
cinis sten-  
dum apud  
Principes.*

*Diligentia  
medico ne-  
cessaria.*

néque perficiet, ut medicamenta optima ha-  
beant & fideliter præparent, quibus postea  
medicus citra metum fraudis cum delectu in  
singulis morbi temporibus pro diuersa ope-  
randi intentione uti poterit. Supra vigesimum  
in ordine huius nostri libri præceptum addit  
Galenus libro de Prædictione ad Posthumum  
adhuc vnum, obseruatu admodum necessarium  
prudentibus medicis, præceptum, cum ait me-  
dicos in curatione Principum neque medica-  
mentis valde efficacibus, neque vlllo modo su-  
spectis uti debere. Multos enim obrectatores  
operæ atque fortunæ medicorum habent. Et si  
itaque extremis morbis extrema aliquando  
remedia adhiberi vult Hippocrates & princi-  
pum aliorumque hominum, qui aliquo emi-  
nentiæ gradu aut amicorum multitudine apud  
suos conspiciunt, affectus periculosi reme-  
dia fortis operationis requirunt: tamen medi-  
cus prudens nunquam ad singularia atque no-  
ua, quæ in frequentem usum minimè venerunt,  
descendere debet, sed potiùs ea adhibere, quo-  
rum facultates & operationes longo usu mul-  
tâque experientia innotuerunt. Fieri enim sæ-  
pissimè solere docet Galenus, ut artifices, qui  
rectè tempestiuèque medicamenta adhibere no-  
runt, iisdem remedijs morbos curent, quibus  
alii eosdem exacerbarunt. Porro requiritur  
etiam à medico, ut suo apud ægros homines,  
quorum curam suscipit, munere diligenter fi-  
deli-



delitèrque fungatur: attenta mente videat & consideret, cui, quid, quantum, cur, quo loco, qua via, quando & quibus præsijs agendum aut etiã quomodo intentiones operationum & medicamètorum facultates dirigendæ sint. Ita enim fiet, vt singula suo tempore conuenientique ratione perficiantur: & felix confiliorum actionumque euentus, qui est expetita hominum ægrorum sanitas & medici solertis laus atque præmium, Deo cooperante, consequatur. *ὅταν γὰρ ἀπεύδῃ τις, αὐτὸς καὶ θεὸς πυνάπτεται.* *DEVS sedulo*  
*los iuuat.*  
 Agat deinde cautè, prouidè, maturè, expedite & rectè, non alia fide & sollicitudine, atque si de sui corporis incolumitate ageretur. *τὸ γὰρ μὲν εἰς ἡ, πάντα χεῖ ὅτι χεῖ τιμὸν,* *Temere nihil*  
*agendū.*  
 Quod fiet facilimè, si sincero fuerit animo & omnium suarum actionum inspectorem adiutorémque DEVM crediderit: præterea etiam charitatis Christianæ memor ægrum hominem suum fratrem, nobilissimam, secundum angelos sanctos, creaturam ad imaginem immortalis DEI conditam & regni cœlestis cohæredem cognouerit atque statuerit. Ita enim *Quid in*  
*agendo respo-*  
*ciendum.*  
 animatus nihil cogitabit, nihil consulet, nihilque molietur, nisi quod gloriam & laudem immortalis DEI, clementum Ecclesiæ Christianæ, emolumentum societatis humanæ, recuperandam ægrorum hominum sanitatem atque suum proprium honorem commodumque concessum spectare ac prouehere posse



*Medicis fide  
libus & pijs  
clementum  
dat DEVS.  
Causæ com-  
mentatio-  
nis huim.*

- statuerit. Quam ob rem etiam præsidium san-  
ctorum angelorum in toto vitæ atque voca-  
tionis suæ curriculo sibi adesse sentiet: munere  
suo cum laude feliciter fungi & commenda-  
tionem famamque celebrem felicibus succes-  
sibus mereri poterit: neque viuis egebit vlla  
re, quæ fragilis vitæ vñsibus necessaria erit, ne-  
que mortuus calumnijs hominum damnatio-  
nive æternæ obnoxius erit. Hæc præcepta &  
instituta medico, qui primùm medicinam fa-  
cere incipit, à nobis ex sententia Hippocratis  
& aliorum medicorum conscripta sunt, vt ho-  
mines eruditi ac præcipuè iuuenes, qui medicæ  
arti animum applicarunt, videant atque intel-  
ligant primò, quòd medicos inter Christianos  
oporteat esse, qui gratia sanitatum à DEI spi-  
ritu accepta infirmitatibus hominum opitula-  
ri & mederi possint: deinde, quòd medici fun-  
ctio difficilis, laboriosa & neutiquam ignaua  
sit, veluti imperitum vulgus æstimat: tertio,  
quòd illa professio, cùm sit pia, honesta & hu-  
mano generi adeò necessaria, ac Sol mundo &  
ignis atque aqua hominum vñsibus, neutiquam  
contemni debeat, quod sæpissimè à barbaris  
& imperitis Cyclopibus fit, qui importunis  
suggestionibus & calumnijs improbis iuuenū  
animos ab honesto & DEO hominibúsque  
prudentibus grato vitæ genere deterrere atque  
auertere conantur: quartò, quòd ex his institu-  
tionibus mediocriter eruditi deprehendent,  
quanto



quanto discriminis interuallo docti, diligentes, fideles & boni medici separentur ab improbis impostoribus, ineptis nugatoribus, indoctis empiricis, scutrilibus circumforaneis, insanis medicatricibus & alijs eius facis hominibus, qui publicis principum ac magistratum edictis ab urbibus bene constitutis arcedi & longè à conuersatione hominum ablegadi sunt ad immanes feras, ne impunita occidendi aut violandi homines licentia amplius uti in rebus publicis possint: quintò, quòd ex his cuius legenti luce meridiana clariùs pateat bonos, eruditos ac fideles medicos nò tantùm principum magistratùsque amore & plebeiorum hominù beneuolentia, sed etiam amplissimo honore & iustissimis præmijs dignos iure optimo haberi: sextò, ut medicinam facturi videant, qui & quales esse debeant in sua professione, si bonorù medicorù nomine digni censi cupiunt. Deus, fons omnis sapientiæ, cui sit gloria in omne æuum, artium utilissimarù semina cum florentissima politiarum Christianarum tranquillitate nobis in posterù clemèter seruet atq; augeat: neq; tantis bonis ob nostram ingratitudinē, sicuti nimium meremur, posteros nostros priuet, ut vera agnitio verùsq; cultus DEI cum bono ordine & laudabili virtutis honestatìsque omnis studio in humana conuersatione longè latèq; propagetur ac multi æternæ beatitudinis hæredes fiant.

F I N I S.



IOANNIS SPORISCHII  
AB OTTENBACHAW, ME-  
DICINÆ DOCTORIS LIBER DE  
*Symptomatibus crudelissimis & raro animaduer-*  
*sis, quæ scarificationi & cucurbitularum vsui*  
*Brunæ incolis in Marchionatu Mora-*  
*uiæ superuenerunt.*



NNO DOMINI M. D. LXXVII.

Brunæ, quæ celebris est in Marchio-  
natu Morauie vrbs, noua & fre-  
quētia in nonnullorum hominum  
corporibus apparuerunt symptomata, quæ so-  
lutioni continuitatis, per intempestiuam, in-  
conuenientem & immodicam partium carno-  
sarum scarificationem factæ, superuenerunt.  
In quibusdam enim particulis, scalpro saucia-  
tis, caro cucurbitulæ ambitu conclusa inflam-  
mari & exulcerari visa est: ichores pituitosi in  
magna copia fluxerunt per exulcerata mem-  
bra: totum corpus aut tantum membrum sca-  
rificatum interim liuore fædo, interim scabie  
turpi horribiliter contaminatum fuit: aliqui-  
bus denique horrendi cruciatus in iuncturis  
articulorum & neruosis partibus excitati mul-  
tum tempus durarunt & certis periodis ægro-  
rum hominum corpora affligerunt. Ea cū ra-  
ra & antehac minimè visa essent, cōmouerunt  
plurimos hominū, vt putarent nouum morbi-  
Vene-

*Descriptio  
symptoma-  
tum.*

*Sententia  
vulgi de his  
symptoma-  
tibus.*



Veneri genus, contagione propagatum, populum illius urbis inuasisse. Sicuti autem liberimè fateor me planè dissentire ab opinione, quæ de his symptomatibus sparsa habetur: Ita *Propositio*  
certis rationibus palàm faciam symptomata *libris.*  
illa neque contagione in aëreo balneo propagata esse: neque luis Venereæ speciem dici posse: neque scalpellum, quo cutis scarificata fuit, toxico infectum, impurum aut tale fuisse, quo bubones pestilenciales antè aperiri consuevis-  
sent. Demonstrare verò & palàm facere enitar horrenda hæc solutionis continuitatis sympto-  
mata originem, occasionem siue causam effici-  
entem atque irritantem habuisse intempesti-  
uam, nimiam, minimèque congruam scarifi-  
cationem: materialèmq; siue internam corū  
causam in humorum pituitosorum substantia,  
quantitate & qualitate in ægris hominum cor-  
poribus abundanti constituisse. Etiam si enim  
nobis Christianis dubium nullum est varios *Morbos diu-*  
morbos ob plurima & grandia hominum pec- *no iudicio*  
cata aliquādo iusto DEI ter maximi iudicio ex- *excitari.*  
citari in populo: tamen ijdē causas suas natura-  
les vt plurimū habere aduertuntur. Nam in-  
finita summi DEI potestas rarò citra causarum  
secundarum interuentū agere in mundo con-  
suevit: sed ordinem à sua sapientia imperuesti- *DEVS ordi-*  
gabili institutum firmiter obseruat, neque vn- *nem à se con-*  
quam transgreditur, nisi summa hoc ipsum glo *stitutum in*  
riæ diuinæ necessitas requirat. Hæ autem in *natura ob-*  
*seruat.*

D



## 50 DE SCARIFICATIONIS

*Causæ mor-  
borum exter-  
na & inter-  
na.* sex rerum nō naturalium vario usu consistunt  
& causarum externarum nomine comprehen-  
duntur: aut intra corpus humanum coacerua-  
ta latent, donec ab externis causis irritentur, &  
causarum internarū appellationem suscipiunt.

*Ablata cau-  
sa tolli affe-  
ctum.* Quibus ablatis per media, diuinitus in eos usus  
producta & sedulis rerum naturalium indaga-  
toribus ostensa, mala eiusmodi longius grassa-  
ri prohibentur: & homines ab ijs liberantur,

*Pœnitentia  
conuocatio  
DEI promou-  
ent actum  
medicina.* præsertim tum, quando ad vitæ prioris emen-  
dationem accedunt piæ preces, quibus iram  
DEI iustissimam mitigare studemus. Remedia  
enim præstantissima tum demum vsibus hu-  
manis salutaria sunt, quando illis benigna mi-  
sericordis DEI gratia accedit & tempore legi-  
timo eadem dextrè vsurpantur. Nolo autem  
quenquam eruditorum medicorum æstimare  
me temerario contradicendi conatu reclama-  
re sententiæ, quæ noua de huiusmodi sympto-  
matum genere pronunciata est: aut maleuo-  
lentiæ odiōve inflammatū ab opinione incerta  
recedere, quæ de his symptomatibus extat. Pu-  
blici enim cōmodi causa, cui me & studia mea  
à multis annis consecro & offero, de hoc sym-  
ptomatū genere quid sentiam, ingenuè osten-  
dere laboro eam ob rem, quòd in præfatione  
& epilogo libelli, qui primus de his symptoma-  
tibus in publicum venit, commonitio extat ad  
bonos & rei medicæ peritos viros grauissima,  
vt liberè in medium consulant de his malis: &  
ratio;



# SYMPTOMATIBVS. 51

rationes non modò inuestigent, sed etiam libenter ostendant, quibus præsijs eiusmodi humanorum corporum hostibus occurratur.

Εὐνὴ τὸν ἄνθρωπον, ξυνοὶ δὲ τὴν μὴδοι ἔσιν.

Hoc ut commodius rectiusque à me fiat, *Ordo libri.* primùm de rerum non naturalium usu, qui incolis eius urbis frequens est, dicam: Secundum erit, ut agam de occasione & causis externis, quæ excitant turpissimam fluxionem, liuorem, dolorem, & tum crudelissimos cruciatus, tum putredinem loci scarificati & exulcerationem cutis, quæ in ægrotum hominum corporibus à loci affectu intempestiua ineptaque curatione remanere deprehensa sunt. Inde, ut arbitror, facilimè cuius legenti patebit hos affectus humanorum corporum neutiquam novam morbi Venerei speciem dici posse, cum sint tantum symptomata, quæ ad solutionem continuitatis & effrenem humorum pituitosorum motionem accesserunt: Neque virus quoddam in aëreo balneo ab hominibus ea lue infectis sparsum, à sanis hominibus & tanti mali securis inspiratione haustum fuisse, cum vnum medicorum doctissimorum consensu affirmetur neminem vnquam lue Venerea labe factatum ex inquinati aëris inspiratione: Neque malum contagione propagatum esse in corpora humana, quod vi cucurbitularum ad loca scarificata tractum inflammationem, exulcerationem, dolorificam neruorum lacerationem,

*Fer. lib. 2. de*

*Abd. rerum*

*caus. cap. 14.*



## 52 DE SCARIFICATIONIS

nem, cutis liuorem & turpem scabiem excitauit: Neq; etiam scalprum venenosa aliqua materia corruptum imbuisse loca scarificata virulentia lethali; sicuti infici solent venabula à venatoribus Hispanis, quando ceruos leuiter lauciare conantur, vt potiùs à virulento & noxio succo perempti concidant, quàm profundiore vulnere, nimirum vt pelles integriores manent, quæ plerumq; venatoribus cedunt, vt inde lucrum faciant, quod admodum exiguum illis accidit, quãdo latioribus aut pluribus ictibus transuerberatæ sunt. Sunt autem pleriq; medicorum in hac opinione, vt hoc obiter inferam, ex succo veratri albi aut napelli pharmacum virulentũ primo vere à venatoribus præparari & cornu taurino in eos vsus seruari: Nusquam tamen apud probatos autores me legere memini, quòd elleboro albo aut napello (nisi perperã cum aliquibus opinari velimus, quòd napellus sit toxicon Dioscoridis) tam saua nocendi vis insit, qualem Galenus in libro de Theriaca ad Pisonem helenij succo: & Plinius herbæ succo, quam à Gallis Limeum appellari dicit, assignat. Ostendendum itaque hoc loco erit symptomata illa habuisse naturales causas, quæ de numero externarum & internarũ causarum sunt tantæque mala in humanis corporibus excitare possunt, quando internæ causæ ita dispositæ sunt, vt externarum causarum, quæ irritantes dicuntur, actum recipere possint.

Hæc

*Lib. 6. cap.*  
20.

*Lib. 27. cap.*  
11.



Hæc ubi peregero, tertio loco, diuina iuante clementia, certam rationem curandi eiusmodi affectus inuenire & indicare studebo.

Principio itaque Brunam edito regionis *Situs Urbis Brunensis.* huius loco sitam, præter ventos ab occasu Solis spirantes, omnibus cæterorum ventorum insultibus liberum aditum præbere videmus. Zephyrus enim, Aphricus, Corus & collaterales *Zephyri & sus.* sublimi monte, qui vrbi ad occasum Solis est & arcem eminentem habet, difficulter seriùsque admittuntur, ut aërem, terram & aquas suis qualitatibus in primo vere demulceant. Hinc *Brunensis cælestis temperies.* fit, ut asperam hyemem frigidiùsque veris principium terra illa ferè quotannis habeat. Quamquam autem solum vrbi propinquum, quod culturam experitur, vini & frumenti ferax est: *Brunensis soli fertilis.* tamè incolæ Cererem coctam siti restinguentæ frequentius adhibent. Hac enim admodum tenui, aquosa ac frigida qualitate euidenter prædita, propter exiguam copiam lupuli & tritici, *Potum incellarum.* quam cocturæ parciùs adhibent, quàm in alijs Germaniæ locis fieri consuevit, utuntur tum lautioris fortunæ homines, quando largiore vini potu illorum corpora incaluerunt, ob pridianam crapulam fumant, & siti immodica affliguntur: tum vilioris status plebecula eo potu contenta viuere cogitur, cum non semper habeat, ut vinum suis mensis emat. Solum *Solum quid ferat cultum.* uerbatè multa fertile colitur ab agricolis, vinitoribus & olitoribus. E quibus illi necessarium



54 DE SCARIFICATIONIS

vitæ humanæ frumentum, vuas, persica mala,  
poma, pyra, pruna cerea, Damascena & mino-  
ra, quæ domestica sunt & dulcedine sua mirè  
palatum afficiunt, quando ijs crudis, in vmbra  
siccatis coctisve vescimur, cerasa, cytonia & a-  
lia vñbus humanis in agris & intra vineta cre-  
scentia colligunt. hi cepas, allia, porrum, pepo-  
nes, pastinacas domesticas, cucumeres, rapa,  
petroselinum, lactucas coronariâsque herbas  
magno studio colunt, vt inde victitent & quæ-  
stum faciant. Brassicam etiam capitatam fre-  
quentiùs, quàm alibi, in cultis locis circa hanc  
urbem prouenire certum est, qua non tantùm  
cocta per autumnii hyemisque tempus incolæ  
vesci solent, sed quoq; illam sale, cumino, ace-  
to muriâve ita condiunt, vt totum annum in  
vasis amplis recondi & in cellis subterraneis  
adseruari possit. Faciunt autem olitores illud,  
tum vt suis mensis brassica illa seruiat, tum vt in  
vicina loca illam per totum anni tempus ex-  
portantes aliquid lucri venentur. Ea enim per-  
suasio multos homines, in finibus Austriae ha-  
bitâtes, inuasit ac tenet, nullibi meliorem bras-  
sicam, quæ capitata est & hoc peculiari dono  
pollet, vt biliosos ventriculos roborer, neruo-  
rum resolutioni & tremori nō exiguum com-  
modum præstet, virtutibus vini resistat, ebie-  
tatem siue temulentiam diutissimè arceat &  
noxam inhibeat, quæ ex largiore vini potu a-  
liâs humanis corporibus accideret, inueniri:  
neque

*Brassica vti-  
litas.*



neque vsquam ita præparari, vt gustui grata sit. Quam ob rem olitores etiam multum operæ & laboris culturæ illius impendunt: ac per totum annum Znoymam, Rhezium, atq; in alia loca exportant. Hinc fit, vt Brunense solum neque multa armenta, neque greges ouium alat: sed aliunde expectare cogatur omnia, quæ ex eiusmodi pecudibus in vsum vitæ humanæ sumuntur. Nihil tamen æquè ad voluptuariâ gulæ insatiabilis voracitatem ac necessarium vitæ fragilis vsum deest earum rerum, quæ in delicijs & victu quotidiano haberi consueverunt. Hungaria enim pinguedine & carne succulenta crassos boues Moraviæ in abundantia copia mittit. Ipsa verò regio intra suos fines omnis generis pecudes vberimè suis pascuis alit. Quam ob rem plebs suis contenta fortunis nō admodum affligitur cupiditate quærendi & colligendi diuitias, sicuti faciunt hi, qui auaritiæ pernicioso mortalibus affectu effascinati & excæcati sunt adeò, vt nihil illis dulce gratumque accadat, quod nō fœnus & lucrum spirat. In diem enim viuit maxima incolarum pars, & quidquid hereditate, nundinatione laboribúsque acquirit, aut vinearum cultui aut luxui impendit. Et si verò liberaliter propter victualium vberem copiam viuit: tamen ferè nullum conuiuium illi celebratur, quod non solenni vrbis more brassicam capitatam, in numero ferculorum coctam, recipiat. Æstate qui-

*Cibi copia  
incolæ.*

*Incolas vili  
contentos v  
vere.*



dem & autumnò dulcem: hyeme autem & vere sale, cumino, aceto muriave maceratam coquunt ac mensis apponunt. In secundis etiam mensis pyra, poma, pruna, persica, vuæ & aliæ eius generis deliciæ crebrius locum habent apud ciues illius vrbs, quàm alibi in vniuersa Morauia fieri consuevit. Taceo iam de inferioris sortis hominibus, quorum prandia & cœnæ brassicam capitatam olent. Pleriq; insuper incolarū, fœminæ tamen maximè æstatis tempore deliciantur esu endiuia domesticæ, cuius folia lata & teneros caules Cereri acetosæ immergunt & cum nimia auiditate vorant: Imò plerasque eius regionis fœminas inuenias, quæ inexplebilem auiditatem edendi frigidas & crudas illas materias, in quarum numero etiam sunt pepones & cucumeres parui, reprimere nequeunt, dum ventriculum abundanter repleuerint. *ποῖός τις ὁ βίος πυρετὸν καὶ φλέγμ' ἔχει.* Etiam si enim æstatis tempore talium alimentorum moderatus vsus non improbetur prudentibus viris eam ob rem, quòd prohibeant generationem bilis flauæ & humorum nimiam adustionem: alterando etiam infringant feruorem bilis, ne quidpiam incommodi corporibus gignere possit: tamen nimius eorum eduliorum vsus maximè nocet in eo, quòd auget in corporibus humores eos, qui à temperamento anni sunt alienissimi & morbos periculosos difficilisq; curationis inducere frequenter consue-



sueuerūt, qui si diæta simili foueantur, planè incurabiles atque lethales fiunt. Conuiuia uerò nuptialia & cætera diurno tempore insti- *Mores Cul-*  
*gi.* tuuntur crebriùs ac protrahuntur in profundam noctem, præsertim autumnī & hyemis tempore, ut illud tempus, cui requiem suadenti, propter animalium uirium recreationem, parere decorum erat, tribuatur comestationibus ac computationibus, cum sit:

καλὸν τὸ νήφειν ἢ τὸ πολλὰ κραπαλαῖν.

πολύς γὰρ ἄκρατος ὀλίγ' ἀναγκάζει φρονεῖν.

Contrà uerò matutinæ dierum horæ, quæ, negotijs & laboribus diuinitus præfinitæ, rebus agendis commodissimæ sunt, somno dantur. Qua in parte bruta animantia eiusmodi hominibus longè præcellere & prudentia antequam censentur, quæ cum Sole occidente cubitum se recipiunt, & eodem oriente, cubitu surgunt. Temporum enim & ordinis diuinitus instituti atque cursu Solis definiti rationem tenaciùs obseruant & rectiùs tenent, quàm plerique hominum, qui mente intelligenti rationeque à DEO rerum conditore donati sunt, ut cæteris creaturis hoc dono præstent, Creatorem mundi agnoscant, pia gratiarum actione donis DEI fruantur & corporum animorumque suorum sanitatem recto viuendi modo diutissimè tueantur. Conuiujs ad hunc modum dediti intempestiuis uigilijs coctiones alimenti & humorum in naturalibus iumentis & fi-



58 DE SCARIFICATIONIS

miliaribus particulis non modò impediunt, sed etiam plus quàm leuibus & scurrilibus saltationibus exercitijsque, quibus voluptatis irritandæ causa homines vtuntur, dum genio indulgent suo, crudum alimentum ad epar & similes particulas per venarum mesaraicarum ductus è ventriculo procedere cogunt, vnde cruditates in illorum corporibus coaceruantur, quæ morbis fœcundum fomitem præbent, vt verissimum esse cognoscatur id, quod dicunt Philosophi, nimirum voluptatum pedisse quas esse morbos, mœrorē, dolorem & pauperiem. Præter hæc nullis laboribus, neque tempestiuis exercitijs hoc hominum genus indulget, si recesseris à vinearum cultoribus, qui agrestes sunt & dura corpora habent: nihilo tamen minùs illa morbis obnoxia reddunt inordinata vita, dum festiuis diebus comestationibus & poculis adèdò frequenter indulgent, vt priùs id absument, quod merces laboris esse debet, quā laborem perficiunt. Hac viuendi ratione corpora pituitosis humoribus & excrementitijs superfluitatibus repleti tam manifestum est, vt mente rationeque destitutus iure optimo censerì possit, qui contradicere velit. Eiusmodi autem humores vltra modum humanæ naturæ competentem coaceruati intra corpora fragilia multis ægritudinibus fœcundam materiam præbent. Urbis itaque eius incolæ non faciliè biliosis morbis tentantur: sed pituitosis & frigidis

*Qui morbi  
populariter  
grassentur  
Bruna.*



gidis malis sæpissimè infestantur, vt sunt colica, paraly sis, apoplexia, arthritis, podagra, & alia, quæ à fluxione pituitosorum humorum originem habent atq; voluptuariam inordinatamque vitam non aliter, atque pedissequæ dominas suas, sequuntur. Accedit illud, quòd optimorum medicorum consilia ibi negliguntur. Neque enim annuis vtuntur purgationibus, neque eruditos & rei medicæ peritos viros de ratione viuendi consulunt. Sed plerique suæ libidini obtemperantes agunt, quod volunt, & patiuntur, quod possunt. Plurimi etiam eò dementiæ procedunt, vt hodie egregiè potantes & ad satietatem vsque sese infarcientes cibis sine delectu & discrimine, constituent de venæ sectione & sanguinis subtractione postero die instituenda: qua peracta, aliquot dies epulantur, potant, ludunt & inebriantur, nihil solliciti de morbis, qui tanquam pœnæ eiusmodi vitam sequuntur, vt verissimum sit illud Alexandidis:

— ἡ πάντων ἐστὶ τὸ μέγιστον κακὸν  
μέγιστον ἀνθρώποισι καὶ βλαβερώτατον.

Qui à crebra sanguinis euacuatione per venarum incisionem abhorrent, cucurbitulis cum scarificatu appositis bis aut semel singulis mensibus vtuntur. Ingrediuntur verò eius rei gratia balneum bene poti ac cibis repleti. Atque pro largiore sanguinis sudorisque euacuatione promouenda, in aëreo balneo sedentes,



vellabris aqua calida plenis innatantes, immo-  
 dico intempestiuoque vini usu egregiè se suaq;  
 naturæ vires obruunt, vt aliquando domum  
 redire nequeant, nisi manu ministrorum du-  
 cantur. Luxu & inueterata viuendi consuetu-  
 dine si suis corporibus morbos accersuerunt,  
 ad Anabaptistarum agrestium speluncas curri-  
 tur: & consulitur de morbi curatione imperi-  
 tus barbarusque homo, qui fortassis ad hoc ho-  
 minum genus rude & inciuile aliunde confu-  
 git & balneatorum chirurgorumque munere  
 ibidem fungitur. Hæc de incolarum illius vr-  
 bis vulgari diætâ præmonuisse sufficit, cum non  
 omnes ciues hanc viuendi rationem ample-  
 ctantur. Plurimi enim optimorū ciuium hanc  
 detestantur, & vt homines pios prudentesque  
 decet, temperanter, sobriè modestèq; viuunt:  
 quæ ratio est, quòd eiusmodi malis & alijs  
 morbis rarò aut nunquã obnoxij sint, sed ma-  
 tura ætate ex vitæ fugacis statione decedant nō  
 aliter, atq; poma matura ab arboribus sua spon-  
 te cadunt gemmisque renascentibus locum  
 dant. Diligenter autem hæc recensui, non vt  
 viderer conuiciari incolarum mores, quod vi-  
 tium ab homine ingenuo & candido alienis-  
 simum esse debet: sed vt homines, qui inordi-  
 natè viuere in more habent, his commoniti sa-  
 perent & meliorē viuendi rationem institue-  
 rent. Iam occasionem & causas externas cru-  
 delissimorum symptomatū relaturus longior  
 ero,

*Se monere,  
 nō crimina-  
 ri.*

*De causis ex  
 ternis male-  
 vrent.*



ero, quòd quædam meæ sententiæ aduersantia diluentur antè, quàm curam istis malis conuenientem ostendam. Brumæ itaque tempore, quando ob aëris externæ qualitatem in omnibus hominum corporibus secundum naturam humores pituitosi abundant, ob multitudinem assumptorum alimentorum, quæ non tam copia, quàm substantia & qualitate sua plurimum pituitæ generant, & in quotidiano usu incolarum illius vrbes esse dixi, necessariò in tali vitæ ratione coaceruari crudorum & pituitosorum humorum copia solet, quæ substantia, qualitate & quantitate interim totum corpus adgrauat, interim locum affectum, in quo toto hyemis tempore, nisi irritetur, sedem suam figit, molestia afficit & in primo vere fluxionibus frigidis salisque occasionem præbet, nisi tempestiuè concoquatur & euacuetur. Nam cutis corporis ab ambientis aëris frigidis qualitatibus hyemis tempore constringitur, pori clauduntur, perspiratio prohibetur, euentatio fuliginosorum vaporum liberior, qualis est æstate, impeditur: caloris naturalis vis intra corpus collecta continetur atque coarctatur. Ventres eam ob rem, ut ait Hip. lib. 1. Aph. part. 1 §. calidiores multum cibi appetunt, ut externis membris largiùs calidum nutrimentum apponatur & ingenuus calor in illis commodiùs foueatur. Infarciuntur verò membra naturalibus & animalibus facultatibus destinata, ne pos-

*Hyeme cibi  
maior appe-  
lencia.*

*Superfluita-  
tes hyeme in  
corporibus ho-  
minum au-  
geri.*



*Occasiones  
fluxionum.*

sint copiam alimenti absumere & excrementa, sicuti æstate fit, tempestiuè depellere. Hæc morborum ac fluxionum materia in corpore humano copiosè collecta solet balneis crebrioribus, in quibus multam moram homines trahunt, meracioris vini potu: aquis mineralibus, inflammatione, dolore, solutione cōtinui, cucurbitularum tractione, frictione, compressione & alijs causis, quæ innumeræ penè sunt, ad motum impelli, vt liquata à parte, quam occuparunt, commodè promptèque ad mēbra instrumentalia ac similia totius corporis fluat: eam tamen præcipuè particulam cum impetu inuadit, quæ ob imbecillitatē apta est fluxionem superfluitatum ad se recipere: aut à natura excrementis destinata est: aut denique affectu præternaturali humorum excrementorūq; superfluitatem ad se violenter allicit. Dum autem cucurbitulis cum crebro & profundo scarificatu appositis bonus ac tenuis sanguis vi flammæ, quæ cucurbitulæ includitur, similibus particulis, quæ scarificatæ sunt, adimitur: necessum est alium iisdem ab epate transmitti. Rapiunt enim vicinæ à vicinis particulis, cum sanæ existunt & alimento destituuntur, donec proxima epati membra è fonte humorum etiam id quod incoctum & inelaboratum est, auferant. Pituitosi, crudi & inelaborati humores facilè suis qualitatibus similia totius corporis membra aut affectas particulas, ad  
quas

*Quomodo  
crudi humores  
in similibus mem-  
bris coacer-  
uentur.*



quas tracti postea cum impetu feruntur, imbu-  
 unt: ab imo corpore ad circumferentiam ducti  
 cutem scabie liuoréque inficiunt, sanguinem  
 corrumpunt & impurum reddunt: iuncturas  
 inuadunt atque dolores articularum certis pe-  
 riodis recurrentes excitant: neruorum princi-  
 pia obstruunt: vel illis infarcti spasmū conuulsio-  
 nesq; inducunt: vel in membris instrumentali-  
 bus ac similibus, ubi figuntur, obstructions, ab-  
 scessus, inflammationes, exulcerationes, dolores  
 & alia mala faciunt. Etiam si enim nullā vene-  
 nosam qualitatem extrinsecus aduenientem ha-  
 beant: tamē tantam qualitatem malignitatem  
 sæpenumero ex prauo victu obtinent, ut suprā  
 dictis malis longē grauiora in corporibus æ-  
 gris excitare atque producere conspiciantur.  
 Corporibus malè dispositis & κακοχρῆμοις adhi-  
 bita fuit scarificatio illo anni tempore profun-  
 dior & crebrior, quàm recta ratio fieri iubet.  
 Iterata est enim vna diei hora semel aut bis cum  
 scalpro latiore, quale hyemis temporibus in v-  
 su est, ut in maiore quātitate cucurbitulæ, cum  
 aëre calido siue flammeo appositæ membris  
 scarificatis, sanguineum humorem, quem fri-  
 gidiorem & crassiozem anni tempus & præce-  
 dens diæta fecerat, ex similibus particulis at-  
 traherent & intra se colligerent. Nisi enim co-  
 piosè sanguis ad affectos scarificatu locos fluat  
 & per cucurbitulas affatim extrahatur: imperi-  
 ti homines, quos puer Æsopicus non aliter, at-

*Soboles cru-  
ditatum.*

*Scarificatio  
inconueni-  
ens quid fe-  
cerit.*

*Prodigos & i-  
ta sanguine  
priuari vel-  
le.*



que cochleas in suo interitu, dum coquuntur, stridorem emittentes, ridere poterit; arbitrantur sanguinis euacuationem non succedere, & vel in ministrorum balnei oscitantiam, vel in nimiam festinationem, vel in Lunam causam conferunt. Praui itaque, crudi & indigesti humores tum aëre balnei calidiore & aquæ tepidæ affusione ab internis membris, in quibus latebant, ad externas & cuti substratas particulas prouocati, tum vi flammæ, quæ in cucurbitula apposita concluditur, non modò attracti, sed etiam ad fluxionem copiosiore vini potu, aquæ tepidæ crebra affusione, scarificatione & cucurbitulæ attractu irritati sese necessariò particulis scarificatis ingesserunt. Sicuti enim cucurbitulæ cum flamma absque scarificatu appositæ incantamenti instar humores aliunde ad partem, cui cucurbita affixa inhæret, trahere aduertuntur: ita ex profundiore scarificatu & flamma ardentiore cucurbitulæ dolor calorq; sensibilis in membro scarificato excitatur, qui fortius humores primò quidem proximos, calidos, elaboratos & subtiles: deinde etiam frigidos siue crudos & semicoctos aliunde, etiam si in profundo corpore sint, ad membrum scarificatum & cuti substratum trahendo allicere potest, præsertim quando tot causis humores tenuantur, colliquantur & funduntur. Quod probatione ampliori non eget, cum res ipsa meam hanc sententiã facilè confirmet, & luxationi-

*Cucurbitulas & flammam trahere humores ad membra scarificata.*



tionibus, doloribus inflammationibúsq; partium nullo vulnere læsarum frequentissimè attractio affluxioq; humorum accidat. Quando enim, corpora impura superfluitatibus abundant, & humores ad fluxionem præparantur atque irritantur: faciliùs humorum motio & fluxio ad membra luxatione, dolore, calore nimio, sicuti solutione continui, pressura, frictione aut forti ligatura vexata promouetur, etiamsi nulla scarificatio, nullúque cucurbitulæ siccae vsus accedat. Solutio itaque continui, quæ scalpro latiore longioréque in membris similaribus & carnosissintempestiuè & inconvénienter facta est, exstitit cum doloris, tum inflammationis causa efficiens, quæ morbi principalis nomine mihi in hoc negotio censetur. Dedit enim occasionem & causam affluxioni pituitosorum humorum. Et licet hi fluxionum materia iam erant: tamè latendo quiescebant in internis corporis humani membris, in quibus hyemis tempore potissimùm colligi & figi secundum naturam aut etiam præter naturam solent: neq; antè effrenes de parte ad partem motu suo ferebantur, quàm à solutione continuitatis & inflammatione doloréq; eius membri, quod scarificatum fuit, ad motum irritarentur atque attraherentur. Cum autem magna illorum humorum copia fuerit intra ægrorum hominum corpora collecta ratione inordinati victus, temporis anni, & cæli consti-

*Solutio continui primarius morbus in his malis*

E



tutionis, quam toto veris atque æstatis sequen-  
tis tempore intemperatam & irregularem for-  
tasse fecit vis & efficacia Cometæ, qui vicinum  
Saturni in propria domo constituti sydus do-  
minum habuit, & Lunam, ob vicinitatem, ad-  
iutricem suam ostendit: facilimè fieri potuit, vt  
tot & tam validæ causæ in agendo conspiran-  
tes solutioni continuitatis, quæ levis & mini-  
mè sufficiens non nullis videretur, si non cum  
dolore & inflammatione coniuncta fuisset, tot  
& tam horrenda adderent accidentia, quæ in-  
conuenientibus curationibus aucta atq; exa-  
cerbata videntur. Hæc enim solutio continui-  
tatis, quæ primarij morbi rationem habet, eti-  
am si levis iudicetur & aliquando ab imperitis  
balneatoribus pinguedine non admodum pu-  
ra inungatur, vt citiùs consolidari & sanari pos-  
sit, quando cucurbitulæ appositæ membra sca-  
rificata non exiccant, sed aquosos & pituitæ te-  
nui non absimiles humores attrahunt, vt tum  
fit, quando natura siue anima de domicilij sui  
conseruatione & facultatum incolumitate so-  
licita nō ampliùs sanguineam massam ad mem-  
bra scarificata fluere sinit: tamen particulæ pro-  
fundiùs crebriùsque scarificatæ vel aliàs debiles  
& tum ad fluxiones recipiendas idoneæ, tum  
vicinæ membris, in quibus tanquã instrumen-  
tis idoneis aut aliàs debilitate affectuque cor-  
reptis humores superfluitatésque in corpore  
humano redundantes hyeme figi ac delitescere con-

*Quomodo so-  
lutio conti-  
nui exulce-  
rari cæperit.*



re consueuerunt, fluxionē crudarum ac tenui-  
um superfluitatum recipiunt & scalpro fortiùs  
impulso cutis nervosa cum carnibus subiectis  
laesa inflammari atque exulcerari incipit. Huic  
exulcerationi crusta superinducta est, & inflam-  
matio dolorque cum putrefactione, tanquam  
symptomata, quæ solutioni continuitatis ac-  
cesserunt, remanserunt, per quæ malum fluxio-  
nis auctum est quotidie, quòd materia multa  
in continuo motu constitueretur. Humores *Præuū na-  
enim paulatim fluentes habitum induxerunt, tura motus  
ut natura prauo motu voluerit per particulam in eductione  
putrescentem & exulceratam omnes super- superfluita-  
fluitates à se repellere. Quæ si quippiam ve- tum.  
neni contagiosi, quod efficacem quandā vim  
exercere potuisset, recepissent: ita procul du-  
bio humorum & carnosarum particularum  
substantiam corrupissent, ut membra similia  
cum vniuersa humorū massa putredinem sen-  
sissent, sicuti postea factum est ex perniciosissi- *Mala cu-  
ma & damanda argenti viui inunctione, cin- ratio auxit  
nabaris suffumigatione & mineralis Turpeti symptoma-  
intempestiuo illegitimòque usu. Balneator ve- tum vehe-  
rò Brunensis, medicæ rei imperitus, omnia hu- mentiam.  
morum fluentium coctione, diuersione & e-  
uacuatione, putridi exulceratque membri cu-  
rationi primò totis viribus & operis institit.  
Fortasse itaque applicatis medicinis mundifi-  
cantibus, detergentibus, exiccantibus, carnem  
generantibus & cicatricem inducentibus, quæ**



68 DE SCARIFICATIONIS

omnia qualitate & facultate calefaciendi atq;  
siccandi instructa esse vel minimo medicorum,  
qui certæ curandi methodo insistit, omnino  
constat, inflammationē partis affectæ auxit &  
causam dedit humorum fluxioni, ut in maiore  
copia partem affectā inuaderent: Aut insistens  
alterationi & mitigationi dolorum, loco exul-  
cerato, inflammato ac dolore correpto adhi-  
buit nimis intempestiuè & inconuenienter fri-  
gescientia vel *ὑποκρίνα*, quæ humores maligni-  
ores faciunt & cutem liuore scædant. Et si ita-  
que opera industriæque balneatoris aliorumq;  
imperitorum Chirurgorum vlcus in ægris cor-  
poribus consolidatum & inflammatio tandem  
vnâ cum dolore sedata fuerit: tamen præter li-  
uidas & turpes maculas, quæ cuti in loco affe-

*Vlcere cura  
to remansit  
se sine exitu  
materiâ in  
corpore.*

*Humorum  
exitu prohi-  
bitorum esse  
ctus.*

cto post consolidationem reliquæ erant, fluxio  
& agitatio humorum in motu constitutorum  
ab illis neque animaduerti, neque curari po-  
tuit. Sed admoniti de doloribus, quos ægri ex  
humorum fluxu in iuncturis sentiebāt, aut sca-  
biem & liuorē cutis oriri cernentes, falsò autu-  
mauerunt luem Venereā in ægrorū hominum  
corporib<sup>9</sup> dominari. Humores enim exitu de-  
stituti, quem antè per locum scarificatum, exul-  
ceratum ac putridum habuerūt, cœperunt oc-  
cupare neruos, iuncturas, musculos, similaria  
membra cutemque ipsam: & aut acerbissimos  
dolores, similes arthriticis, in iuncturis & ner-  
uosis partibus excitarunt, aut fædo liuore tur-  
pique



pique scabie, qualis frequenter à pituita falsa vel melancholicis humoribus, qui etiam autumnal tempore collecti huic fluxioni misceri potuerunt, generatur, partem affectam vel totam corporis ægri cutem fœdarunt pro materiæ peccantis multitudine, corporis totius habitu, & tum diætæ, tum medicamentorum prauo vsu. Ægri itaque, errore balneatorum & chirurgorum adducti, suspicati sunt fomitem & semina luis Venereæ in vulgus contagione sparsa esse, aut veneficium commissum fuisse, quod medicam manum respuerit. Quæ res miseris & de salute corporis viriûmque incolumitate in magna animi angustia constitutis hominibus causam dedit, propter quam ad carnifices curas confugerent, vnguentis ex argento viuo compositis vterentur, cinnabaris fumum ferrent, potiones sudorificas & vaporaria adhiberent. Vitæ enim sanitatisque auidi quiduis sustinere, quàm cum infamia mori aut tantis cruciatibus diutius affligi, maluerunt. Quorum illa membrorum sanorum temperiem & calorem naturalem oppugnarunt, recipiendæq; fluxioni iuncturas præpararunt. Argentum enim viuum externis membris inunctum aut intra corpus in sufficienti quantitate sumptum sua nimia frigidityte & humiditate insitum cordi & vniuerso corpori humidum corrumpit, ut glandes, gingiua, palatum & partes vicinæ, quæ secundum naturam humiditate abundant, pu-

*Error curantium peperit morbo nomen.*

*Argentis vni efficaciam.*



*Vaporaria  
& sudorifi-  
ca quid ef-  
fecerint.*

tredine corrumpatur, vniuersus sanguis alteretur, saliu multa ex ore effluat, & quidquid est humorum in corpore reliquum, in pituitosas superfluitates resolui videatur. Hæc verò humores attenuarunt magisque effrenes & ad fluendum habiles reddiderunt, vt ferociore impetu de parte ad partem ferri possent. Eiusmodi enim calorifica poros cutis laxant, robur membrorum soluunt, & non modò humores quiescentes ad fluxum magis irritant: verum etiam debilitatem membrorum augent & ad fluxiones recipiendas præparant. Sed dicere vereor, quid execranda curatio, per argentum viuum tentata, ampliùs efficiat: ne ex istimer odio quodam in chirurgos, qui illo extincto in vnguētis vtuntur, quoties morbo Gallico correptos in integram sanitatem restituere nituntur, commotus parùm veritatis ac humanitatis obseruans esse. Ipsi ægri dicant, quid commodi ex eiusmodi curationibus acceperint. Plurimi enim illorum se magis læsos cognouerunt, &, de sua salute atque fama desperantes, multum temporis in mœrore ac pudore vitam ab hominum consortio remotam egerunt. Verissimum enim est, quod inquit Thucydides: Εἰς τὴν διαμάχην τῆς γνώμης καὶ αἱ διαφοραὶ τῶν ἔργων καὶ δίστανται. Quamquam autem Anabaptistarum Machaon subobscurā cognitionem huius mali ex chirurgi alicuius Germani libro hausisse existimatur, vt quasi per somnium viderit pilulis

*Anabapti-  
stam non er-  
rasse à scopo,  
sed ab ipso me-  
thodo curas-  
se.*

τῶν διαμάχην τῆς γνώμης καὶ αἱ διαφοραὶ τῶν ἔργων καὶ δίστανται. Quamquam autem Anabaptistarum Machaon subobscurā cognitionem huius mali ex chirurgi alicuius Germani libro hausisse existimatur, vt quasi per somnium viderit pilulis



lis ex Turpeto fomitem causamque materia-  
lem acerbissimorum symptomatum auferri &  
inde vlcus exquisitissimè curari posse: tamen  
nulla instructus methodo, qua periti medici in  
curatione morborum vtuntur, dum ratione  
experientiâque duce multorum hominum vi-  
tam & sanitatem ab interitu immaturo atque  
longis ægreditudinibus vindicant, potiùs malum  
fluxionis exacerbasse & temerario actu vires  
ægrorum hominû oppugnasse iudicatur, dum  
citra crudorum humorum coctionem & via-  
rum, per quas materia peccans educenda erat,  
præparationem quotidie pilulas purgatorias  
de Turpeto exhibuit. Commouit enim reli-  
quum, quidquid erat, humorum pituitosorum,  
vt flueret & ob lentorem suum acerbissimos  
cruciatus in ægrorum hominum corporibus  
excitaret. Ita, DEVM immortalem, bonæ rei in *Bonarû re-*  
salutarem vitæ humanæ vsum diuinitus con- *rum abusus*  
cessæ & inuentæ multiplex ac perniciosissimus *noxius.*  
abusus ab impostoribus introduci potest, vt  
medicamenta tum non medicamenta, sed præ-  
sentissima venena fiant. Non itaque iniuria *Pseudome-*  
eiusmodi homines, qui illotis manibus sacra *dicos odiosos*  
mysteria artis medicæ tractant & cum detri- *gnos.*  
mento hominum medicinam faciunt, malè au-  
diunt ac odijs bonorum premuntur, cùm Iso-  
crates, homo gentilis, reuerentia quadam erga  
DEI dona motus dicat: *διχαρον εἶναι αὐτοὺς ἐκείνους*  
*ψέγειν, ὅσοι πῆς ἀγαθοῦ κακῶς χρώνται.* Ars verò me-



*Quid de bonis medicis sentiendū.*

dica & boni viri, qui eius præceptis instructi prudenter ægros suos tractant fidelitèrque suo munere funguntur, principū virorum & omnium hominum amore, honore præmiòque digni sunt. Monet nos diuinus Hippocrates concocta medicinis purgantibus tentari: & cruda

*Quando naturam sequi possimus.*

non moueri debere: deinde quò natura motu suo vergit in humorum superfluatorum aut aliàs peccantiū subtractione, eò duci humores peccantes oportere, vt nimirū illam ducem actionum nostrarum habeamus tum, quando per loca idonea & cōferentia videtur educationem

*Quando natura ductus negligendus.*

superfluitatum noxiarum moliri. Contrariam verò & tamen idoneam viam ad educationem humorum excrementorūque peccantium eligamus, quando illa prauum motum præ se fert ac superflua educere nititur per eas vias, quæ eiusmodi superfluitatum excretioni minime competunt. Quæ cautio tantum momenti habet, vt etiam per locum affectum humorum fluentium euacuatio nunquā tentari debeat. Oportet enim humorum fluxiones à

*Per locū affectum non euacuandū.*

membris affectis per reuulsionem diuertere & ad loca opportuna dirigi ita, vt citra noxam extra corpus ægri hominis propellantur. Quicunq;

*Humores carnosarum partium quomodo tractandi.*

verò humores extra venas sunt & in partibus similaribus, cuti substratis, hærent, ij ad interna mēbra neutiquā reduci, sed in locis affectis concoqui & per poros cutis educi tum debent, quando eorum fomes ex membris naturali facultate



cultati seruiantibus ablati est, nimirum postquam materiae superfluae in instrumentis naturalibus sunt coctae & euacuante medicamento ablatae. Hæc saluberrima præcepta principis medici si nota fuissent inepto chirurgo potuissetque ille recto rationis iudicio his parere: citra carnificinam & execrandos cruciatus facillimè morbum & eiusdem symptomata curasset. Sed imperitum hominem latuit tum sententia horum dogmatum, tum omnis ratio rectè curandi morbos, qui intra corpus humanum oriuntur aut externis membris quandoque contingunt. Propterea cæcæ empiriæ insistent infelicem non modò suarum curationum euentum expertus est, sed etiam cum suo Turpeto corporum ægrorum ferocientes humores turbauit & ægros ipsos ita excruciauit, ut impostoris crudelis & non chirurgi nomine dignus merito suo censeatur. His præmissis asserere posse videor, neque reclamante veritate, neque contradicente ratione peritorum medicorum, hæc solutionis continuitatis symptomata rariora quidem, ob delictum in victu rariùs solitum committi, nullum habuisse Venereæ luis contagium, nullumque ex aëris inspiratione in balneo aëreo venenum haustum, quod postea cucurbita attraxisset. Si enim res ita se haberet, necessariò cucurbitula, quæ primùm membro carnoso cum scarificatu affixa erat, ad se venenum traxisset vi flammæ, per quam cuti sca-

*Non fuisse  
morbum Ve-  
nereum.*

*Nullum Ge-  
nenum con-  
tagione ha-  
stum esse.*



*Scalprū non  
fuisse infe-  
ctum.*

rificatæ adhæret atque tractionis opus perficit: neque alij loco communicari potuisset venenosa illa virulentia, quæ per aërem infectum, instar contagij pestiferi, in balneo hausta putatur. Eadem ratio est de scalpro, quod aut toxico aut sordibus venenosis infici potuisse putatur. Nam locus, qui primò scarificatus cū noxio scalpro fuisset, malum primò recepisset. Atque ita omnibus hoc symptomatum malo correptis hominibus femora obnoxia fuissent fluxioni, inflammationi, exulcerationi, liuori, scabiei & cruciatui, quæ solutioni continui superuenerunt: nisi quispiam dicere vellet fraudis occultandæ causa scalpellum toties mutatum aut toxico corruptum, quoties alicui particulæ virus immitti debuit. Ex consuetudine verò, omnibus balneatoribus vulgariter recepta & adhuc obseruari solita, paulò supra genuum flexuram utriq; femori primùm cucurbitula vna trësve simul apponuntur: deinde reliquis membris singulæ aut ad summum binæ admoventur. Locus etiam cucurbitularum ambitu circumscriptus in femoribus primùm, profundius ac sæpius scalpro vulneratur, propter carnis molem siue pulpam copiosiore, quàm in alijs corporis humani particulis, quæ ex longo vñ consueuerunt scarificari: deinde reliqua membra scarificantur, quibus cucurbitulæ affiguntur. Ad femora itaque omnium ægrotorum corpora venenum contagiosum, quod  
aëre



aëre mediante haustum putatur, statim ablegassent, neque ulli alij particulæ, quæ seriùs scarificata fuit, ingeri potuisset. Veneni enim aëre contagioso hausti substantia subtilis promptissimè & citissimè, propter perniciosissimam ac nocentissimam humanis corporibus vim, vniuersum corpus transit atq; locum illum occupat, qui aut intensè calet, aut debilitate præ cæteris membris, dolore attrahendique vi tentatur. Ibi inimicissimum vitæ humanæ munus velocissimè exierit, & citiùs substantiam non tantum spirituum vitalium, sed etiam humorum atque solidarum particularum inficit, quàm ignis in aridas paleas vrendo agit & illas absuinit. Hoc autem potissimum faciunt venena calida, quæ sunt subtilium partium & facile ob præcipitem vim penetrare possunt. Quæ horum affectuum causa nullo modo extiterunt, cum materiam frigidam & pituitosam habuerint: accesserunt etiam signa alia, vt puta ignauia, lassitudo, torpor, oscitantia in obeundis munijs, moror, anxietas, pusillanimitas & manuum pedumque resolutiones. Hæc enim symptomata frigida sunt & à causis calidis neutiquam excitantur. Frigidum verò venenum nimia sua qualitate spiritus condensat & crassiores facit, quàm secundum naturam esse debent. Humores inde crassi, lenti & frigidi fiunt: postea vel cor gelu torpere incipit & homo moritur, vel obstructions in membris organicis generantur, quo-

*Veneni Vis.*

*Calidum Venenum non fuisse cū aëre haustum.*

*Frigidū Venenum cum aëre haustum negatur.*



*Alimentum &  
Veneni diffi-  
milis effectus  
in corpore  
humano.*

*Venenum Vin-  
cens diffici-  
le expugna-  
ri.*

*Nullum mor-  
tuum ex his  
malis.*

rum meatus cum sunt conclusi, spiritus nullus à suo principio in reliqua membra ferri, nullaque alimenti materia reliquis membris communicari potest: Sed animal aut subito moritur aut paulatim marcore corruptioneq; consumitur. Sicut enim alimentum assumptum & à calore naturali sufficenter coctum in nostrorum conuertitur nutrimentum corporum, & vtilissima eius pars in succum, sanguinem substantiamque nostri corporis concedit, reliquo excrementitio per euacuationis vias tempestiue reiecto: Ita venena & contagiosa putredines corporum humanorum naturale temperamentum immutant, & membrorum, quaecunque corripunt, substantiam inficiunt atque tantisper corrumpunt, dum ad arcem vitæ impetum sibi concessum aduertunt. Frustra autem suscipitur omnis conatus, qui victus ratione vel præstantissimarum Antidotorum præsidio tentatur, ut veneni malignitas vincatur, quod putrefaciendi aut erodendi vi præditum grauem corpori humano noxam iam intulisse aduertitur. Quod in horum ægrorum corporibus minime contigit, cum plerique prudenter & caute in victu se gerentes citra medicorum consilium & opem euaserint: plerique etiam satis misere ex cruciati interuentu longi temporis, qui coctioni humorum pituitosorum suffecit, incolumitati priori restituti fuerint. Sed diuersa membra in malè affectis corporibus fluxionem, exulcerationem



nem & inflammationem dolorificam receperunt, quæ nimirum propinqua fuerunt particulae, quæ ob suam imbecillitatem, vasorum communitatem, substantiæ proprietatem & naturæ prouidentiam plurimum excrementosæ pituitæ acceperunt, & faciliùs loco dolenti inflammatioque suas superfluitates ob frequentiora venarum extremarum oscula conferre potuerunt. Dolor enim inflammatioque in carne excitata, quæ ambitu cucurbitulæ flamma refertè comprehensa conclusaque fuerat, ex propinqua fluxionis scaturigine ita ad se materiam superfluam, quæ ad tractionem cucurbitulæ moueri cœperat, subinde attraxit, vt humores pituitosi, qui in capite collecti latebant, deriuati fuerint ad cucurbitulas, quæ spinæ dorsi intra scapulas affixæ steterant. Humores verò, qui in epate aut renibus coaceruati hærebant, fluxionis suæ impetum ad lumbos siue illam spinæ dorsi partem carnosam direxerint, quæ circa lumbos scarificari consuevit: Qui denique in matrice, ischio & iuncturis inferioribus corporis collecti manebant, vi cucurbitulæ, mediante scarificatione & flamma, ad motum irritati, postea inflammatione & dolore tracti, ad genu vtrumque vel alterutrum procubuerunt. Humores enim, qui superflui atque ad fluxum prouisi sunt, feruntur sensim ad partem debilem, quando mandantis particulae robore expelluntur aut ob eius imbecillitatem ampliùs re-

*Cur diuersa  
membra fa-  
erint exulce-  
rata.*

*Quomodo  
fluxiones  
fiant.*



tineri nequeunt: ad partem affectam, siue illam solutio continuitatis, siue inflammatio, dolor aut quiscunq; alius affectus molestatq; affligat, cū impetu trahuntur, etiamsi in mandante particula expultricis virtutis robur nullum aut exiguum sit: neq; vitium in retentrice, quæ robore suo valet, existat, sed solam humorū quantitatem nimiam habeat: Quanquam etiam sæpenumero, nulla existente superfluitatum copia, bonos humores & sanguinem optimum ad affectas particulas trahi inficias ire non possum.

*Aerem non fuisse virulentia infectum.*

Siporrò statuerimus ex contagioso ac venenato aëre hoc malum in corporibus humanis ortum: necessariò etiam concedendum erit homines, qui scarificatione & sanguinis euacuatione beneficio cucurbitularum vñ non sunt, in eodémque aëre corporum suorum cutem abluerunt, illud virus haurire per inspirationem aëris infecti potuisse, & in maiori vitæ valetudinisque periculo versatos esse, quàm homines, qui cucurbitulis vñ venenum à corde & internis membris elicuissent ad membra externa & circumferentiam cutis; nisi fortè effu-

*Contagio agit in corpora pradiposita.*

gij occasionem præbeat id, quòd dicere possumus eorum corpora pura neque disposita fuisse ad recipiendum contagij actum: sicuti febres pestilenciales & ipsum contagium peltiferum tantùm inuadit homines, quorum corpora impura & habituata sunt ita, vt malum eiusmodi facilimè recipiant. Nam sicuti subtilissimum

venc-



venenum, quod inspiratu aëris haustum in balneo fuisset, incantamenti instar ab internis membris per cucurbitam ductum ad externa membra tantam vlceris fœditatem, scabiem, dolorem, liuorem & fluxionem in particula, quæ solutionem continui patiebatur, excitauisse putatur: ita in reliquorum hominum corporibus, bene ad actum recipiendum dispositis, manens potenter vires suas exeruisset: statim membra vitalia & ipsum cor, quod calidissimum temperamentum præ cæteris corporis humani membris habere censetur, cum sit vitæ ac spirituum vitalium, quorum tota essentia in calore vitali consistit, fons atque principium, insultu & violentia sua occupasset; aut ipsum epar, qd' est sanguineæ massæ officina & omnibus corporis humani membris alimentum præparat, sua vi & efficacia violasset atq; corrupisset: imò lethaliter totam corporis humani essentiam humorumq; massam infecisset, quod non habuisset liberum exitum, quem corpora ei præbuis-  
sent, in quibus vi cucurbitulæ ad membra externa tractum exulcerationem & exitum sibi fecisset. Sed *Obiectiones  
duæ diluuntur.*  
duabus obiectionibus, quæ in medium afferri & meæ sententiæ reluctari possent, hinc respondendum est antè, quàm curam eiusmodi malis conuenientem ostendā. Primo enim quispiam inferet hoc malorum genus non habere internam causam humorum pituitosorum copiam: & externam siue irritantem neutiquam in victum inordina-

I.



## 80 DE SCARIFICATIONIS

tum & minimè competentem, neque in scarificationem referri posse. Aliàs enim singulis annis brumæ & veris tempore talia mala in illa vrbe euenire deprehenderentur ex scarificatione, qua ciues illius loci frequenter his anni temporibus, vt & alijs, vtuntur. Cui sic respondeo. Nemo est, qui ignorat temperiem aëris siue constitutionem cœli plurimum posse ad producendam, augendam & intendendam in qualitatibus materiã, quibus symptomata eiusmodi excitari & exacerbari possunt, sicuti contraria aëris temperies materias illas minuit, corrigit & absumere iuuat, velut id ipsum periodus horum malorum manifestè ostendit. Quàm diu enim pituitosi humores in corporibus ægris dominabantur: tam diu mala illa vigebant. Vt primùm verò illi tempore verno cœperunt minui: & sanguineus humor dominium suum recepit: mala tanta in ægrorum hominum corporibus ampliùs durare non poterant. Et cùm non singulis annis eadem sit cœli atque aëris facies, quæ brumæ & veris tempore fuit, quando ad scarificationes intempestiuas & inconuenientes talia symptomata sequebantur: fieri neutiquam potest, vt huius generis mala quotannis euenire aduertantur. Erat enim hyemis vniuersæ temperies frigida, & multis niuibus tota Morauia aliquandiu operata conspiciebatur. Quæ aëris superabundans intemperies vberiore pituitosorum humorum



rum copiam procul dubio tam in rebus non naturalibus, quibus hominū vita alitur, quā in corporibus hominū intemperanter aut inordinatē viuentium generauit. Ver etiam anni sequentis fuit adēdō intemperatum, vt non modō eius principium, sed & medium frigidum pruinisq; & imbribus abundantibus incommodum adēdō auxerit flumina, vt per multum tempus & quidem creberrimē pleno alueo cucurrerint & terras vtrique ripæ fluminū adiacentes cooperiendo sata corruerint. Imō æstatis subsequentiæ maxima pars frigidā & humidam temperiem habuit. Breuiter dicendo, totius anni M. D. LXXVII. constitutio importuna extitit & sata florēsque arborum in tenera herba atque lanugine occupauit. Plurima enim, quæ cœli inclementiam superarunt, ob serotinum germinandi, pullulandi, florendi & fructum faciendi tempus, ad iustam maturitatem peruenire ex pleniore coctura, quæ vi radiorum solarium fit, minimē potuerunt, sed cruda & imperfecta manserunt. Causam huius intemperiei ad Cometam, sub finem anni M. D. LXXVII. visum, quisquis retulerit, nihil alienum à veritate dicere mihi videbitur: cū, præter interitum Regum & euerfionem regnorum, etiam tempestates ac tristia mala omnis generis stellæ crinitæ siue barbatæ mortalibus significare possint, vt doctissimē Silius Italicus asserit, cū inquit:

F



## 82 DE SCARIFICATIONIS

*Impunè nunquam priùs orbi crine corusco,  
Regnorum euerfor, rubuit lethale Cometes.*

II.

Secundò non iniuria quispiam rei nouitatem miratus dixerit: Si ex humorum intemperie & copia, quam aëris constitutionem excittasse & auxisse persuaderi debeo, dicis originē habere hæc symptomata: quī fit, quòd in tali anni constitutione tantū fuerint his malis obnoxij homines diuersi sexus, diuersæ ætatis, diuersi temperamenti diuersæq; vitæ, qui balneum illud ingressi cucurbitulis vsi sunt, reliquis illæsis, qui aut alia cōtubernia balneorum ingressi scarificatione vsi sunt, aut idem balneum visitantes membra sua scarificari non permiserunt? Hæc res videtur causa esse, propter quam de veneficio, maleficio aut impostura nō leuis opinio, plausibilisq; suspicio concipi posset. Sed ad diluendam obiectionem hanc, præter id, quòd neq; omnes ciues inordinato vitæ genere vtuntur, neque frequenter scarificationem ferunt, neq; repleto ventriculo balneum ingrediuntur, neque in balneo potant, sed temperanter viuunt & vitæ valetudinisq; rationem habentes minimum superfluitatū excrementorūque intra corpora sua colligunt, ad hæc neq; crebra neque profunda scarificatione delectantur: opus est nobis, vt consideremus duo, nimirum aquæ tepidæ, qua in illo balneo abluuntur homines, facultatē, & scalpendi modum. Quod aquæ facultatem attinet,



net, tenendum accidentalem illam esse, quam ex ignis ardore accepit, & poros cutis laxare, membra similia calefacere, humores in illis resolvere atque ad fluxum pronos facere, si nō modō multa eius affusio fiat, sed etiam corpora eidem immergantur, atque aliæ fluxionum irritandarum causæ accedant, de quibus suprà mentio facta est. Aquæ enim tepidæ affusio crebra cum aëre calido, vini potu, & cucurbitulæ trahendi facultate concurrens multū certè valet. Nam præcipiunt omnes in vniuersum medici corpora impura ad thermas neutiquam ableganda, quod exquisitè sufficienterq; purgatis & à superfluitatibus excrementitijs liberatis vsus thermarum saluber sit ad id, vt aut membra naturalia in ijs calefiant, aut id, quod in similaribus partibus sub cute hæret, neque aliter extra corpus propelli valet, euaporando exudandōque absumatur. Thermæ enim vt & ablutiones aquæ dulcis debilius facere solent, non solum humores in superficie corporis, sub cute latentes, validè absumere ac digerere consueuerunt, sed etiam in profundo corpore collectas superfluitates, quæ medicinis non facilè educi valent, euocant atq; ad fluxionem impellunt, quæ de parte ad partem propulsæ ob suam crassitiem per poros cutis extrahi vi medica thermarum aut aquæ dulcis calefaciendi & resoluendi facultate nequeunt, sed sedem suam in debilioribus membris figunt &

F ij



## 84 DE SCARIFICATIONIS

origo materiæque morbis fiunt. Cùm itaque homines impura & superfluitatibus referta habentes corpora in aqua calida deliciarum causa diu natarint: humores per causas antè commemoratas ad motum præparati & incitati facile moueri & impelli potuerunt, vt ad locum scarificatum & cucurbitulæ calore inflammatum confertim ruerent. Non autem omnem locum, cucurbitulæ cauitate post scarificationem conclusum, obnoxium fieri potuisse fluxioni, propter rationes de partium situ allatas, in quibus superflua colligi & latere tam præter naturam, quàm secundum naturam solent, certum est. Modus deinde scarificandi ostendit rationem, propter quam in alijs balneis incolæ urbis non fuerint læsi, & ij, qui non vsi sunt cucurbitulis in eodem balneo, citra noxam manserint. Hic enim non modò singulis annis temporibus, sed etiam ex dexteritate & agilitate prompta manuum scarificantium multū variat, quæ varietas si non diligenter obseruatur, noxam membris scarificandis afferre potest. Nam periti balneatores, quibus agilitas manus accedit, æstiuo tempore vtuntur scalpro, quod acumine breui minúsque lato efformatum est. Illo leuiter feriunt cutem, vt quasi lancinata mediocriterque pertusa appareat, vnde flamma cucurbitulæ inclusa sanguinem quasi persudantem ex particulis scarificatis intra cucurbitulam colligit. Quod faciunt eam ob rem, quia  
sciunt



sciunt humores subtiliores æstiuo tempore promptius ad cucurbitulæ tractum affluere. Hyeme verò adhibent scalprum latum & aliquando longo acumine instructum, quale est illud, quo venæ aperiuntur, ut cutis fortiore digitorum ad scalprum adactorum impulsu transuerberetur, scalprum profundius penetret & latiora vulnuscula in summa cute fiant, per quæ cucurbitula sanguinis massam crassam propter quæ pituitæ dominium frigidiusculam commodius educat. Plerique itaque huius rei ignari, & non modò minùs exercitati, sed etiam agilitate manuum destituti, quando tremore manuum laborant & suæ laudi seruire, ut decebat, nequeunt, forti digitorum impulsu cuti scalprum latum imprimunt ita, ut supremam non modò cutem, quæ *ὁμαλὴ* dicitur, sed & carnem substratam cōtingat & vulneret, qui ictus certissimæ inflammationi exulcerationique obnoxij sunt. Tenerrimus enim est sensus cutis nervosæ, quæ sicut rete quoddam, non sine miraculo totius corporis cuti substrata carnem regit & sensum tactus externis membris præstat. Hæc vulnerata, nimio calore aut dolore correpta vel flamma cucurbitulæ supercalefacta inflammari, humores attrahere & exulcerationem putredinemque excitare facillimè solet. Iterata præterea scarificatio hæc cutis pluribus nervis cōspiciæ mala mirum in modum auget. Accedit & illud, quòd balneatores, bre-

F iij



## 86 DE SCARIFICATIONIS

uibus brumæ diebus multitudine lauantium obruti, neque tam necessaria diligentia cutem scarificant, neque in ablutione & appositione cucurbitularū tam attenti ac curiosi sunt, quā ij, qui paucos hospites abluere coguntur. Loca itaque carnosā, quibus cucurbitulæ affigi debent, non modò profundius ac crebrius scarificant, ut sanguis per cucurbitulam educendus copiosius citiusq; euacuetur: sed etiā eius exitū quandoq; studio impediunt & vulnuscula pinguedine inungunt, qua flammā nuttiunt ad cucurbitularum appositū, ut vrilla aliquando impura & qualitatibus noxijs prædita sit. Persuadent verò imperitis hominibus, quòd cutis scarificata ex hac inunctione citius coalescat ac sanetur, cū contrariū fiat: & humiditas ibidem relicta suppurationē exulcerationēq; excitare prompta sit. Præstaret tamen, si homines sanis consilij medicorū optimorū adquiescere possent & nō suo fato in interitū præcipientes ruerēt, hyeme neq; venę sectione, neque cucurbitulis cum scarificatione uti, nisi summa in plerisque morbis id ipsum fieri iuberet necessitas, cui omnia iura, cōsuetudines ac rationes cedūt. Nā venæ sectione & crebro cucurbitularū cū scarificatione vsu adimitur optimus ac familiarissimus corpori humano succus, qui thesaurus est vitæ humanæ, cū spiritus vitales in eo contineantur: & refrigerantur membra naturalia ita, ut deinceps pituitosorum humorum generatio-



rationi illo anni tempore minùs resistere valeant, sicuti resisterent, si non calor naturalis & spirituum copia per crebram nimiàmque sanguinis euacuationem corpori humano subtraheretur. Ex his manifestum fit omnibus scalpum neutiquam toxico infectum fuisse, sed aut iteratam aut profundam scarificationem inflammationis causam extitisse, quæ dolorem, affluxionē humorum, putredinem & alia mala in affecta parte excitauit. Quæ enim, DEVM immortalem, rabies tantam hominum cordibus auaritiã ingerere & excitare posset, vt multorum hominum periculo ditescere & tam ancipitem temerariãque emergendi viam excogitare atque adgredi auderent? Si tamen hoc ipsum vsu veniret, vt magna hoc peruersissimo seculo est perditorum quorundam hominum impietas, malitia, impostura & inexplabilis habendi cupido: & balneatores odio quodam in humanum genus dementati vel insatiabili auaritiæ malo stimulati tale facinus committere auderent: quomodo malus ille dolus, in humanum execrandũque facinus lateret, cum etiã homicidia occulta mirando iustissimi DEI iudicio sepe numero per homicidij autores reuelentur, conscientia ipsos accusante, vt mala puniri & pax tranquillitasque in humana societate conseruari possint. Cucurbitulis tamen aliquibus & nequaquam omnibus vitium quoddam accessisse ex adhærentibus sordibus

*Coniectura  
plausibilis de his  
malis.*



*Coniecturis  
vbi non de-  
cet homines  
philosophos.*

*Opiniones  
vulgi mu-  
tabiles.*

*Tutum est  
communem  
curandi me-  
thodum te-  
nere.*

& venenosis materijs vt creditu facilimum fa-  
teor: ita coniecturis vti subuereor, cum suffici-  
entes causæ horum symptomatum secundum  
veterum medicorū præcepta ex humanorum  
corporum cōstitutione & circumstantijs, quæ  
à rebus non naturalibus sumi solent æquè, ac  
ab ijs, quæ circa corpus humanum & omnes  
facultatū actiones contingunt, peti nullo cum  
negotio possint. Indecorum verò & turpe est  
homini philosopho & medico affectata curio-  
sitate confugere ad supernaturalia & cœlestia,  
quæ coniecturis tantum nituntur, cum etiam  
ad crebras observationes rarò euentus similes  
sequi compertum sit: sicuti leuitatis est ad fal-  
laces suspiciones & vanas populi imperiti opi-  
niones, quæ toties variant, quoties noui quip-  
piam citra omne rationis rectæ iudicium affer-  
tur ac spargitur, à methodo inuestigandi rerum  
causas recedere, cum è medio naturæ scrinio  
rerum, quæ præter naturam corporibus huma-  
nis accidunt, sufficientes causæ erui & promi-  
possint.

Δόξα γὰρ πρὸ ἀλήθειαν βιάζεται.

Reliquum est, vt tertiam instituti mei par-  
tem adgrediar & curationem horum malorū  
certa methodo constituam: vbi illud præmit-  
tendū censeo, regiam viam tenenti facilimum  
fore rectam methodū inuenire, qua malis eius-  
modi occurratur. Regiam autem viam censeo  
esse rationem curandi morbos, quæ à veteri-  
bus



bus ratione inuenta iam communis est omnibus medicis, qui arte experiētiāque nituntur. Religio enim est, veterum vestigijs neglectis, ad neotericorum quorundam deliramenta & supinam diligentiam minimēque securam curiositatem recentium chirurgorum & quorundam simiorum oculos manūque conuertere, qui statim ad ligni Guaiaci vel Chinæ coctiones cōfugiunt ac imposturis suis etiam doctissimis viris aliquando imponunt, sicuti in horū symptomatum inepta curatione factum est. Quidam enim pharmacopœorū Antidotum, cuius vsus frequens in Misnia esse perhibetur, quando morbus Venereus abigendus est, præparauit & cōiugi suæ exhibuit, quæ quauis Panacea certior censetur. Sed decoctum illud à nullo artis medicæ perito compositum fuisse hinc apparet, quòd citra regulas medicas fiat & inconuenientem diuisionem in exhibitione habeat. Cū enim ὁ δὲ ἀγρὸς καὶ ἰδρωτικὰ in eum finem offerantur, vt similia membra inuadant, in illis noxia resoluant & per poros cutis vnà secum in sudore aut per urinarios meatus educant: subit mirari, quòd tanta copia foliorum senæ vnà cum hermodactylis & reliquis purgantibus addatur, quorum facultas est noxios humores per aluum educere. Contrarios verò motus naturę conflictanti cum morborum materijs inducere prohibemur, quod & materię in diuersis locis peccantes ferè nun-

*Error in curatione commissus reprehenditur.*



90 DE SCARIFICATIONIS

*Reprehendi  
tur dosi ma  
gna.*

*Curatio.*

I.

quam ferunt. Nam in similaribus membris, cuti substratis, materias constitutas intra corpus retrahere neque facillè possumus, neque sine reprehensione illud tentare audemus. Dum verò natura purgationi per aluum intenta est, non valet vim eliciendi sudorem ad membra similia distribuere, materias cuti substratas resolvere & per poros educere. Decoctum etiam quatuor vicibus exhibitum honestæ matronæ libellus indicat. Si itaque totum assumptum sit, quod credere facillimum est, cum medicinæ in eum usum præparentur, ut ab ægris assumantur, quilibet haustus habuit in se ℥ x. ℞. gr. vij. ℞. cum forte ligni Guaiaci decoctum ultra uncias sex loco syrupi in aurora rarè aut nunquam virili personæ detur. Sed omissis his, quæ ad rem minimè pertinent, cum non velim hîc ostendere, quos errores alij in morbi huius & symptomatû crudelissimorum curatione commiserint: sed potius id agere constituerim, ut recta ratio curandi eiusmodi mala in hoc meo libello tradatur, reliquam instituti negotij partem adgrediar. Fit itaque horum affectuum cõmoda & artificialis curatio, quando decem hæ intentiones curandi tempestivè ac dextrè observantur. Prima curandi intentio est universalis totius corporis euacuatio, quæ nequaquam fiat per sanguinis missionem, etiam si materia peccans sanguini mista videatur. Sanguinis enim missione corpus humanum humoresque refri-



refrigerari & pituitosos humores eo anni tempore augeri antea dictum est. Sed euacuatio tentetur aut medicamēto purgante per aluum aut vomitum irritante. Pituita enim in ventriculo & primis venis contenta aliàs per aluum faciliùs duci, aliàs vomitu commodiùs reijci solet. Non tamen negligatur natura, habitus & consuetudo hominis, qui curandus est. Sed si vomere facilè consuevit, digito plumàve oleo dulci imbuta sibi palatum titillet, donec vomitus irritetur: aut decoctum aliquod vel aquam tepidam, cui oxymel simplex vel scilliticum, deinde vehementiora immista sint, assumat. Præcipiam etiam, vt circumstantes de rebus nauseam irritantibus & vomitum prouocantibus loquantur. Sin æger vomere difficulter aut nunquam consueuerit, dabitur ei haustus purgatorius in hunc modum præparatus, quando est virilis persona & ætatem consistentem agit.

℞. Hieræ picræ simplicis ℥ iiij.

Confectionis Hamech ℥ iij.

Decoctionis aperitiuæ communis ℥ iiij.

Syrupi acetosi simplicis ℥ j.

Misce, fiat haustus, qui tepidus detur in auro cum ieiunio quatuor horarum & totius diei custodia. Non enim tutum est aëri liberiori corpus exponere, quando purgante medicamento humores moti sunt. Secunda intentio curandi est conueniens victus ratio, quæ con-



## 92 DE SCARIFICATIONIS

sistit in legitima & tempestiua sex rerum non naturalium administratione. Aeger igitur vitabit aërem frigidum, cuius rei causa vaporarium calefieri debebit non modò aridis lignis, sed etiam aromata & alia, vt lignum aloës, cassiæ, iuniperi, cinnamomum, iuniperi bacca, lauri folia & bacca, sabina, macis flos, maiorana, lauendula, spica, styrax, caryophylli & quæcunque aërem calefacere atque exiccare sua facultate possunt, carbonibus iniecta nidore in aëre facere & eundem suffitu suo alterare necesse erit. Planè enim ad calidam & siccam temperiem aër habitationis inclinare debet. Cibus verò vterur calidis, incidētibus, attenuantibus, facile penetrantibus & sanguinem bonum generantibus, vt amplior pituitæ generatio prohibeatur, & id, quod iam generatum est, consumatur. Tales cibi sunt, qui bene nutriunt, aromatis conditi sunt & non multū excrementorum in corpore coaceruāt, vt iuscula caponum & carniū pinguium, in quibus pipet integrum cum mace aut zingibere coquatur, oua sorbilia & in sartagine subacta, carnes caponum, perdicum, phasianorum, attagenum, auicularum montanarum, hœdorum, agnorum, vitulorū, piscium saxatiliū, cibi etiam alij non nihil acetii vel limonum acetosorum succi continentes. Et in die bis cibum assumere solitus à consuetudine hac non recedat: nimiam tamen repletionem, quæ fastidium & nauscam faceret, omni-



omnino vitet. Potus sit vinum absinthij aut aliàs clarum & album, non tamen forte, ne sua vi penetret & humores ad motum intempestiuum concitet. Vigilijs interdiu plus, quàm somno indulgeat. Eum etiam, qui à cibo in meridie assumpto aut statim à cœna fit, somnũ tanquam pestem fugiat. Nunquam verò dormiat vltra nouẽ horas. Quod decubitus rationem attinet, in contubernio calido, corpore bene aduersus frigus munito, ante mediam noctem in dextro latere: post medij noctis exactũ tempus in sinistrum latus volutus iaceat. Plurimo exercitio, si per virium imbecillitatem potest, matutino tempore indulgeat, quando excrementa alui reddita sunt. Nam exercitium tale calorem naturalem mirificè in corporibus humanis recreat & auget: humores in impuris corporibus colliquat, attenuat, coquit, sudore euacuat & absumit. Modicum verò exercitium eos tantũ ad fluxum idoneos facit, cùm non facilè resolui & expelli ob suam tenacitatem, crassitiem & cruditatem possint. In hoc vnico præsidio tantum momẽti est curationi talium symptomatum, vt præferendum sit omnibus medicinis, quæ nihil vel parum admodum utilitatis humano corpori præstant, quando conueniens diætã & præsertim legitimum tempestiuũque exercitium negligitur. Operam etiam det æger, vt non modò corpus vniuersum sit perspirabile, verũ etiam consueto tempo-



III.

re excrementa alui ac vesicæ quotidie reddat, mucumque & sputum euacuet. Immodicam repletionem, quæ cibo potumque interdum fit, robur ventriculi soluit & nauseam excitat, perniciosam fore putet & fugiat: quod fiet, si appetentiæ ac voluptuosæ gulæ frenum iniecerit, neque ad satietatem cibum potumque ingesserit. Perturbationem denique, mœrorem, merum & alios animi affectus, qui calorem naturalem comprimunt, dissipant & debilitant, omni studio declinet. Gaudeat verò & non nunquam in aliqualem leuémq; excandescentiam consurgat: nimiam tamen iram fugiat. Quoniam illa caloris naturalis robur auget: hæc humores colliquat & fluere facit, vnde obstructions & infinita mala prodeunt. Tertia intentio curandi hos affectus est fluxionis à loco affecto diuersio, quæ præter ligaturas dolorificas, frictions, cucurbitulæ siccæ vsum & alia quibus reuulsionē ac diuersionem humorum tentare cogimur, fit partim varijs reprimentiũ medicamentorum formis, quæ fiunt ex frigidis & adstringentibus medicinis. Hæc circumiacentibus loco scarificato partibus admoventur. Ex illis verò sunt aqua simplex aut medicata, nimirum ex eiusmodi simplicibus destillata, aut ex minerali fonte, cuius vena adstringendi vim profert, sumpta atque frigide vel tepide adhibita, decoctum glandium calycum, corticum malorum granatorum, balaustiorum, florum cyto-



cytoniorum, rhois & similiū: aut vnguentum  
defensiuum dictum, de bolo Armena, Album  
de Semperuiuo, & similia: vt

℥. Tragacanthæ, in aqua rosacea dissolutæ,  
℥ ij.

Succi semperuiui ℥ j.

Boli Armenæ,

Terræ Lemniæ, añ. ʒ j. β.

Balaustiorum,

Rutæ foliorum, añ. ʒ β.

Adipis taurini,

vitulini, añ. ʒ j.

Ceræ citrinæ ℥ iiij.

Misce cerę & pinguedinibus liquefactis suc-  
cum semperuiui & tragacantham: deinde vni-  
tis adsperge reliquos contritarum specierum  
pulueres: probè omnia subige, & fac vnguen-  
tum, quo interdium bis tēve vngatur cutis, quæ  
in membro scarificato circa locū affectum est.  
Partim refrigerantibus particulas inflamma-  
tas, siue illa sint simplicia, siue cōposita, vt sunt  
decoctum graminis, hordei, lapathi, lactucæ,  
maluæ, rosarum, quæ etiam aliqualem adstrin-  
gendi vim habent, & violarum: aut vnguentum  
infrigidans Galeni, &c. Partim simul alteranti-  
bus inflammationem & mitigantibus dolo-  
rem, quibus adstringentia admisceri in æqua  
proportionem aut paulò inferiore quantitate  
possunt, vt:

℥. Foliorum althææ,



96 DE SCARIFICATIONIS

maluæ, añ. m. ß.

Seminis lini,

fœnugræci, añ. 3 ij.

Florum balauftiorum,

rosarum,

Fructuum gallarum, añ. 3 j.

Aquæ fontanæ, lb. j.

Coque incisa & cõtusa grosso modo ad consumptionem tertix partis, & spongia in hoc decocto tepido madefacta iterumq; expressa locus circumiacens partem scarificatam & exulceratam foueatur ita, ne vlcus ipsum propè contingas. Quarta intentio curandi est materiei, quantitate vel qualitate, aliquando etiam motu tantum, cum substantia eius nimis tenuis est, peccatis commoda coctio, quæ fiat in ventriculo & epate hoc modo:

IIII.

℞. Syrupi de absinthio,

de eupatorio, añ. 3 j.

Vini absinthij 3 iiij. (aut tantundem liquoris ex eupatorio vel salvia destillati coctive)

Mista da tepidè septem vicibus in aurora, vè solet fieri.

℞. Diacinnamomi 3 iiij. Utatur cum singulis syrupis pro libitu hac Antidoto.

In capite fiat coctio & præparatio humorum cum syrupis de betonica aut stœchade, quibus admisceantur stillaticij liquores betonicæ, maioranæ, lauendulæ, &c. In thorace coctio perficiatur



ciatur cum syrupis de glycyrrhiza, hyssopo, brassia, & similibus, qui diluuntur cum aquis borraginis, hyssopi, saluiæ, buglossæ. In renibus & vesica locum habent syrupus de quinque radicibus, oxymel simplex & compositum, alijque cum aquis asparagi, fœniculi, petroselini & alijs, quæ membra hæc in pituitosis malis respiciunt atque iuuant. In matrice patiente commendatur syrupus de artemisia cum aquis mellissæ, matricariæ, artemissæ, &c. In mistione tamen obseruandum, ut plus aquarum, quam syruporum, sumatur. Membra enim, ad quæ penetrare debent, longè à ventriculo sita sunt. Quam ob rem ad velociorem pénétrationem maiorem subtilitatem requirunt. Post sufficientem humorum coctionem, quæ rationi substantiæ quantitatis ac qualitatis aliàs citiùs, aliàs tradiùs perficitur, euacuatio fiat peccantis materiæ à ventriculo & epate in hunc modum:

℞. Floris cassiæ, recens extractæ, ℥ ix.

Specierum hieræ picræ, ℥ j. ℞.

Sacchari albissimi, q. s.

Misce secundum artem, fiat bolus deuorandus in aurora cum ieiunio quatuor horarum & diei totius custodia. Ab epate, renibus & vesica hoc medicamento aut simili fiat materieieductio.

℞. Decocti alparagi,

eupatorii,

fœniculi, ℥ iiij.

G



28 DE SCARIFICATIONIS

Syrupi de quinq; radicibus, ℥ j.

Benedictæ laxatiuæ, ℥ vij.

Misce, fiat haustus, qui detur tepidus in aurora secundum leges. Postea locum habent pulueres *δυσπηλικοι* & simili facultate præditæ Antidoti. A capite educantur humores per pilulas Alephāgineas, Lucis, Cochias & similes. Ex harum enim massis sumitur vt plurimū drachma vna, quæ cum syrupo aut liquore, caput respiciente in affectu pituitoso, subacta formatur in xv. ix. vij. aut vj. pilulas, vt in puluere conuenienti deuolutæ aut bracteis aureis tectæ in aurora glutiri possint. A pectore & alijs membris educendæ materiæ tententur cum ijs medicinis, quæ partem affectam respiciunt & humores inde educunt. Quando verò à toto corpore tenues humores sunt educendi, rarò purgantia, quæ aluum soluunt, locum habent. Sed plurimū commodi præstant *δυσπηλικά καὶ ἰδρωτικά*, siue vrinam & sudores mouentia, cuius generis multa habemus: aliquibus tamen placet Theriaca, Mithridatum, Guaiaci & Chinæ decoctum. Hinc locum affectum, quem superioribus decoctis fouendum & vnguentis vngendum censeto, quàm diu syrupis & purgantibus vteris, respicere iubemur. Eius intemperies præternaturalis, quæ reliqua esse cognoscitur, ante omnia corrigatur medicinis quæ contrariæ sunt qualitatis & inflammatio, nem dolorémque in vniuersum corrigere atq; aufer;

VI.



auferre consueuerunt. In eorum tamē vsu hoc vnice caendum, ne actu frigida loco exulcerato admoveantur: neque nimium refrigerando calorem innatum & reliquū membro obtundamus. Inde enim grauius sequeretur malum, si verū est, quod Hippoc. lib. 5. Aph. part. 20. dicit. Etiam si enim inflammationi recenti conuenire dicat frigida in Aphor. 23, eiusdem libri: tamen in eiusmodi affectibus, qui à pituita fouentur, tutò non adhiberentur, quòd nigredinem membris afferrent & consolidationem prohiberent. Quando intemperies præternaturalis alterantibus medicinis sufficienter correctæ aduertitur: roborantibus medicinis vtitur, vt naturalem particulæ temperiem foueamus ac membrum ipsum ad suæ substantiæ conseruationem irriteremus. Huic vsui seruiunt tum alterantia, tum ea pharmaca, quæ cognitionem ratione temperamenti aut totius essentia cum loco affecto habent: atque eiusdem facultates respiciunt & calorem ingenitum cū illius actionibus conseruant ac iuuant. Interea etiam mediocriter calefacientibus & siccantibus ablutionibus, pulueribus, vnguentis & emplastris locum exulceratum extergimus & probè mundificamus. In hunc vsu mirificè commendatur vnguentum Ægyptiacum & Basilicon magnum. Cū solutio continui est sufficienter expurgata & probè exiccata: aut cū prioribus exiccantibus instandum

VII.

VIII.

IX.

G ij



x. aut vehementiore siccandi facultate præditis vtendum, vt attrahant alimentum & carnem generent, quæ restituat id, quod putredo absumpsit. Fiat autem illud tam diu, donec caro in cauitate solutionis continuitatis regenerata reliquam carnem altitudine substantiæque æquet. Tandem cicatrix loco affecto inducenda venit. Huic intentioni seruiunt medicamenta euidenti facultate calefaciendi & siccandi prædita, vt humiditatem carnis nouiter generatæ in superficie ita exiccent, vt superficies illius quàm proximè ad similitudinem reliquæ cutis accedat. Cutis enim non renascitur, sed durior quædam consistentia & cute reliqua crassior, naturæ ac medicamentorum beneficio per industrium chirurgum loco affecto inducitur.

Hæc, quæ de curatione solutionis continuitatis, cum affluxu pituitosorum humorum & horrendis symptomatibus coniunctæ, in medium afferrem, hoc tempore habui. Videntur verò mihi ita explicata & veritati rectæ quæ rationis iudicio adeò consentanea, vt secundum hanc methodum symptomatum causæ citius inuestigari multoque melius auferri & sanitas ægris hominibus facilius restitui potuerit, quàm Empiricorum & balneatorum peruersa ratio id perfecit. Hæc enim cum venenosis & intempestiuis medicinis, prauo victu & ineptis operationibus causam vehementissimis symptomatibus, quæ ante & post consolidationem præ-

matu-



SYMPTOMATIBVS. 101

maturam vlcerosarum particularum, in quibus solutio continui facta erat, in corporibus ægrorum hominum crudeliter grassata sunt, procul omni dubio dedisse censentur. Si alijs secus, atque dictum est hætenus à me, res sese habere videtur: animi sui sententiam de illiusmodi malorum causis & curationibus proferant. Deo sit laus, honor & victoria in secula seculorum.

FINIS.

G iij





IOANNIS SPORISCHII  
AB OTTENBACHAW, ME-  
DICINÆ DOCTORIS LIBER

*de Febre Epidemia Anni ab Incarna-  
tione Seruatoris nostri*

1580.

CAPVT PRIMVM.

*Causæ erumnarum & calamitatum, qui-  
bus vita mortalis exercetur.*



NGRAVESCENTE mundi sene-  
scantis & ad interitum vergentis æ-  
tate vires non modò elementorum  
& creaturarum omnium fieri debi-

liores, quàm florente & crescente mundi æta-  
te fuerunt: verùm etiam crebrioribus mutatio-  
nibus obnoxias esse communis hominum o-  
mnium, qui puriore ac perfectiore mentis di-  
uinæ lumine aliquid præ cæteris mortalibus in  
hoc negotio iudicare possunt, consensus abun-  
de testatur. Id ipsum autem potissimum fieri pro-  
pter horrendum primorum parentum lapsum, qui  
nobis & vniuersæ posteritati iram DEI, infir-  
mitates & omnis generis mala atque pœnas in-  
tulit adeò, vt neque cæteris creaturis iustissimi  
DEI ira, flagrans ob præuaricationem in Para-  
diso factam, parceret, neque malum vllum in  
mundum veniat corruptibilem, quod non in  
cor-

*Peccatum  
causa ma-  
lorum.*



correctionem & emendationem hominum peccantiū excitaret Dominus, vnanimis Christianorum omnium fides ex catholica sacra scripturæ traditione firmiter autumat. Sicuti enim in μικροκόσμῳ videmus atq; experimur vitale robur paulatim imminui & de die in diem tantò debilius fieri, quantò propiùs ad limen senectutis peruenit: ita etiam in magno mundo, quem veritas verbi diuini neutiquam æternum fore prædixit, leges elementorum vt & creatorum omnium non nihil labefactari: & eam ob rem creberrimas incidere mutationes in his inferioribus mundi partibus, quotidiana hominum omnium experientia tam perspicuè attestatur, vt plura de his dicturus in meridie candelam accendere & lucem aduersus nitidissimos Solis splendentis radios excitare velle videatur. Nam vt de alijs rebus taceam, quæ languorem & imbecillitatem mundi veterascens manifestè arguunt: dicam tantùm de humanis corporibus, quæ certè debilius & imperfectius robur hoc nostro æuo habent, quàm præteritis mundi crescentis adhuc seculis habuisse ex monumentis historiarum cognoscuntur. In illis enim vitalis vis maior & validior, quàm hac nostra ætate, rebus creatis adfuit. Quam ob rem etiã superioribus mundi ætatibus corpora hominum fuerunt magna, vegeta & validò virium robore prædita, vt & in multam viæ suæ ætatē processerint & clementum mem-

*Pœna peccatorum flagella piorum et impiorum.*

*Mundi finē  
Varia mutationes præcedunt.*

*Corpora humanum debiliora, quàm præteritis mundi ætatibus.*



*Nostra tem-  
pora pluribus  
morbis affli-  
gi, quàm præ-  
teritas mun-  
di ætates af-  
flexerint.*

*Prisca secu-  
la non opus ha-  
buerunt ad-  
miniculis  
tot, quot no-  
stra ætas ex-  
istit.*

brorum maius habuerint, quàm nostra ætate hominum corporibus conceditur: præterea etiam viribus tum animi, tum facultatum omnium longè præstiterint. Vnde factum est, ut neque morbis tam crebrò affligi potuerint, ac nostro ævo humanum genus varijs languoribus & morbis plurimis periculosissimisque subinde exercetur; neque opus habuerint tot præsidij ad vitæ sustentationem & negotiorum necessariorum tractationem, quibus humanarum virium imbecillitati callidè & dextrè occurrerent. Nam cum mundi nouiter creati vigor recens ac validus esset, homines in multa secula viuendo procederent & integritatem virium morumque possiderent: æquè ad propagationem cognitionis diuinæ & voluntatis in mente æterna immotæ, atque ad vitæ productionem, virium incolumitatem morumque moderationem: denique etiam ad boni ordinis in politijs institutionem ac conseruationem adminiculis multis non opus erat, quibus hoc nostro ævo mortalium hominum cōuersatio creberimè vti cogitur. Sed patres familias viua voce domum suam instituebant in ijs, quæ tum ad cultum & honorem verum immortalis DEI, tum ad vitæ & morum integritatem non minùs, atque ciuilem & tranquillam vitam apprimè spectare videbantur. Robur enim validum animorum atque corporum sufficebat mortalibus ad propulsionem rerum, à quibus ali-  
quid



quid noxæ ante fatalem eorundem diem creari corporibus animisq[ue] eorum potuisset tam crebris insultibus, atque hoc nostro æuo fieri experimur. Cùm verò diuina æterni D E I sapientia posteriores mundi ætates prospiceret & ex ineffabili clementia, qua genus hominum complectitur atque fouet, consulere vellet de crescenti robori & virtuti in humanis tum animis, tum corporibus indies collabenti: admirando suæ sapientiæ ac prouidentiæ motu excitauit priscis seculis ingenia heroica mortaliū, quos præ ceteris hominibus mente intelligentiæque plurimū beauerat, vt iidem, Spiritu D E I adiuti, varias vtilissimarum artium disciplinas inuenirent & posteritati de manu in manum traderent, quibus imbecillitati virium humanarū succurreretur & infirmitatibus noxijs obuiam iretur, ne videlicet agnitio D E I, voluntatis diuinæ, & tum omnis honestatis atque mansuetudinis, tum rerum in vita fragili ad aliquem finem vtilium inter homines paulatim euanesceret: né breuis hominum vita continuis morbis oppugnaretur, & antè auferrentur è viuientium numero ij, qui humanæ conuersationi multo vsui esse possunt, quàm iustū ætatis maturæ tempus contigissent. Primū itaque inuenti sunt numeri, quibus temporum distinctiones & cursus corporum cœlestium annotarentur: Deinde literas & artem scribendi prouidentia D E I per suū spiritū sapientiæ

*Vnde disciplinarum et artium semina prouenerint.*

*Finis artium & administrulorum diuinitus hominibus concessorum.*

*Vide Iosephū de antiquitatibus Iudaicis lib. 2. cap. 4. 8.*



*Finis histo-  
riae & omnis  
scripturae.*

*Typogra-  
phia huma-  
na industria  
succurrit.*

*Pietatis stu-  
dium fuge-  
re.*

contulit hominibus, ut essent adminiculo in-  
telligentiae ac memoriae hominum: & posteritati  
serae consulerent in eo, quod beneficio illarum  
res ob origine mundi gestae & posteris propo-  
nendae fideliter consignarentur. Inde doctri-  
narum & artium omnium semina promana-  
runt. Inde prudentiam & experientiam huma-  
nis mentibus nasci & augeri videmus, ne po-  
steritas brevis alioqui vitae in infantia & insci-  
tia rerum antea gestarum vivere deinceps coga-  
tur. Quidquid enim in vegeta mundi aetate ho-  
mines ingenij viriumque dotibus praestantes  
ductu & motu Spiritus diuini inuenerunt, fe-  
cerunt & experientia non solum cognouerunt,  
sed etiam posteros suos fideliter docuerunt: id  
literis postea consignatum ad succedentes mun-  
di aetates peruenit. Quam humanorum ingenio-  
rum industriam vltima mundi aetate iuuare ac  
promouere volens diuini Numinis benignitas  
inenarrabili sapientia excitauit solertissimorum  
hominum ingenia, ut artem typographicam in-  
uenirent & multiplicibus mortaliu vsibus con-  
ferrent. Per hanc doctrina de DEO, voluntate  
DEI & rebus in vita humana utilibus atque ne-  
cessarijs mirabiliter conseruatur atque propaga-  
tur, quae absque hoc DEI misericordis dono esset,  
iam dudum ex animis mortaliu euauisset. Nam  
cum viribus corporu & animorum decrescen-  
tibus etiam pietas & reuerentia erga DEVM, sa-  
cro sancta illius dogmata atque honestas discipli-  
nas



nas admodum deflagrauit & penè prorsus extincta est in animis hominū, qui in tanta occasione discendi & copia vtilissimorū librorum luxuriant: dona DEI nihili æstimant: pia, honesta & vtilia dogmata negligunt: ineptiis, nugis & figmentis voluptuosæ desidiæ seruiantibus delectantur: securi vitam agunt: incertis opinionibus omnia mundi degeneris negotia cōstare & moueri existimāt: turpes delicias sectantur: atque ita longissimè ab integritate prisca seculi degenerantes ad omnes impietatis & nequitie damnosæ errores proni feruntur. Hac hominū secuta impietate & perniciosā detestandāque malitia commotus DEVS ad iustissimam iram, etiam pœnas, quas talibus delictis & sceleribus sua prouidentia imperuestigabili in creatione rerū præordinauit & in flagitiosa ætatū nostrarum tempora reposuit, vt iisdem indies magis magisque augescentem mortalium malitiam crebrius, quā prioribus mundi ætatibus, coërceret atq; reprimeret, frequentiores & grauiorē hoc declinante mundi veteris æuo in humano genere grassari sinīt. Misericors enim DEVS, verè satagens humanæ salutis, quam morte & satisfactione Filij sui vnigeniti credentibus verbo DEI hominib<sup>9</sup> peperit, flagellis talibus nos subinde corripit, ne in detestanda scelerū prauorum via progressi iram illius iustissimā nobis nimiū cumulemus: néve absq; omni emendatione viuentes tandem cum impijs contem-

*Esdralib. 4.  
cap. 14.*

*Pœnas horū  
temporum  
præordina-  
tas à DEO.*

*Cur DEVS  
pœnis varijs  
exerceat ho-  
mines.*



ptoribus, hostibus & persecutoribus veritatis diuinæ in æternum exitium ruamus: sed potius castigationum eiusmodi flagellis vexati atq; in meliorem viam reuocati impietatem omnem tempestiuè abnegemus, fructus dignos pœnitentia Christiana agamus & viua vtiliaq; membra in sanctissimo Christi Iesu corpore maneamus, donec mortalitatis iugo deposito in Dei & beatorum angelorum consuetudinē iucundissimam transferamur. Hæ sunt primariæ & validissimæ causæ omniū miseriarum, calamitatum & ærumnarum, quibus in hoc mundo exercemur. Nolumus autē hoc loco plura de his referre, cū videamus atq; intelligamus argumentū harum causarum potius ad diuinum sacrosanctæ Theologiæ studiū, quàm ad philosophos vel medicos spectare. Et quandoquidē pauca de his nostro instituto præmittere non erubuerimus: tempestiuū esse ducimus, vt receptui canamus, nos intra professionis propriæ septa recipiamus atq; agamus de causis & curationibus morbi epidemij, qui mense Augusto Anni 1580. celerrimo cursu in omnibus ferè vniuersæ Europæ prouincijs grassabatur.

## CAPVT SECVNDVM.

*Descriptio morbi epidemij.*

*Morbos esse  
flagella Dei.*

**I**N malorū autem, quibus DEVS vtitur, quando mortale genus emendare & ad meliorem vitam



vitam retrahere vult, classe non infimū locum occupant morbi varij & terribiles, qui per totum terrarum orbem hac nostra ætate creberimè vagantur, & aliquando hanc, aliquando aliam prouinciam inuadunt popularitèrque in ijs grassantur ita, vt pauci incolæ ab illis immunes sint & plurimi hominū è viuorum consuetudine per illos auferantur. Sic legimus lib. 2. Regum cap. 24. iram DEI concitatam erga Dauidem & populū Israël triduum flagrasse à Dan vsq; Bersabee, & angelo DEI percutiente, intra tam breue temporis spaciū peste lethifera septuaginta millia virorū absumptos fuisse, cūm Dauid Rex maluisset incidere in manus DEI, quàm in manus hostium. Cui plagæ, iustissima *Lege similē plagam Exo ds 9.* omnipotentis DEI ira excitatæ in populo, præ omnibus spaciosæ telluris gentibus peculiari-ter electo, admodum velocitate similis fuisset morbus epidemius, qui improuisus nō tantūm vniuersam Germaniā, sed etiam omnes totius Europæ prouincias adoriebatur & affligebat, si lethiferam vehementiā habuisset. Misericors enim DEVS, iræ suæ iustum furorem ostendens & brachij sui robur per vastatorem & interfectorē angelū, reminiscebatur misericordiæ ac *DEVS in ira iustissima furore remi- niscitur mi- sericordiæ.* clementiæ aded, vt pœnas meritas mitigaret & iram iustissimā misericordia clementiāq; temperaret eam ob rem, quòd scit fragilem esse hominum naturam, quæ ab initio natiuitatis pronior est ad malū, quàm ad bonum. Tales morbi



*Morborū pu-  
blicè gras-  
santiū com-  
munis appel-  
latis.*

*Epidemios  
morbos va-  
rias in spe-  
cies parti-  
tis.*

*Descriptio  
morbi.*

*Definitio fe-  
bris.*

Græcis Philosophis ac Medicis dicuntur *ἐπιδημιοί*, hoc est, populares siue publicè in populo grassantes, quòd nimirum inuadant maximam populi partē in prouincia vel vrbe, quam lues noxia, permittēte Deo, inuadit & tantisper affligit, dum sæuitia eius iustissima mandato Dei reprimitur. Non autem horum morborum vnum genus est, sicuti barbari existimant medici, qui nomine *ἐπιδημίας νόσος* tantum intelligunt luem siue contagionem pestilentialem, quæ plurimos homines in aliqua prouincia certo tempore inuadit. Sed generale hoc vocabulum continet sub se contagionem pestilentem & omnes morbos, qui aliquā vrbem vel totam prouinciam repenti inuadunt & vno eodēq; tempore plurimos incolas absq; discrimine sexus atq; ætatis corripunt, etiamsi alios ex illis eluctari, alios verò diem suum obire cōtingat. Ex epidemiorum itaq; morborū genere fuisse etiam hanc febrem censendum est, quæ breui temporis periodo penè vniuersam Europam peruagata est adeò velociter, vt ultra mensem eius sæuitia in nulla gente durauerit. Febris enim illa non modò priuatas domos, sed etiam vrbes & integra regna cum tanta ferocia inuasit, vt penè nulli sexui, nullique ætati pepercit, si recesseris à planè decrepitis corporibus, quæ materia morbi interna destituebantur, in qua morbus fomitem suum habuisse videtur. Cū autem febris omnis sit caloris naturalis

in



in igneum & præternaturalem ardorem mutatio: dubium nullum est, quin huius febris substantia quidem constiterit in ingenito cordis calore & spiritibus ignea qualitate correptis: materialem tamen causam humores putredine leui intra vasa correptos habuerit, penes quos illo anni tempore in massa sanguinea dominium fuit. Aliàs enim in ἐφ' ἡμέραν πυρετῶν numero constituenda fuisset, quarum febrium terminum excessit. Durauit enim ad minimum quatrimum: & ad summum quatuordecim dierum spacium contigit in ijs corporibus, quæ κακοχυμῶν huius febris essentia appropriata & conueniente laborarunt. In eiusmodi enim corporibus materia copiosa fomitem dedit longiorem febrili incendio, quod in alijs corporibus, quæ minus de illa materia vel ob ætatem, vel ob temperamentum naturale, vel ob bonam & circumspectam viuendi rationem collegerant, neutiquam fieri potuit. Quæ ratio fecit, vt à nobis ex sententia Hippocratis in acutorum morborum serie collocaretur: minimè tamen periculosa censeretur ob spirationem neque valde alteratam, neque admodum impeditam, & denique tum ob eius mi-  
res mores, tum ob celerem eius ad vigorem declinationemque transitum, vt id ipsum docet Hippocrates libro 1. Progn. part. 28. Dicit enim ibidem facilem spirationem in acutis morbis, qui febrem coniunctam habent ita, vt

*Febris epidemia essentia.*

*Febris epidemia duratio.*

*In quibus corporibus diutius durat febris illa.*

*Lib. 2. Aph. part. 23.*



*Symptoma-  
ta febris epi-  
demia.*

*Ardor mi-  
ss.*

*Dolor capi-  
sis.*

*Catarrhus  
G. m. s. s.*

quartum diem febrilis ardor non excedat, mul-  
tum momenti afferre ad salutem ægri homi-  
nis. Symptomata huic feбри fuerūt admodum  
benigna, vt plurimi homines æquis animis illa  
sustinuerint, neq; vllis remedijs vfi fuerint. Ca-  
lor enim eius vt plurimum erat mitis & blan-  
dus, quemadmodum id medici exercitati per  
tactū cognoscere poterant: & ægri prudentio-  
res, qui animosi & cordati tantum ingenij ha-  
bebant, vt possent ardoris febrilis qualitatem co-  
gnoscere & iudicare, medicis referebant. Eti-  
am si autē dolor capitis acutus, tensius ac gra-  
uatius feбри adiungebatur, quod panniculi ce-  
rebri vaporibus & humorib<sup>9</sup> repleti tenderen-  
tur & intensis materie peccantis qualitatibus  
affligerentur: tamen neq; multo tempore du-  
rabat, neq; somnum ægrorum impediēbat, ne-  
que interdiu animalis facultatis actionibus ad-  
modum officiebat. Ante prandium verò, quo  
tempore moueri & dominari cœpit bilis flaua  
reliquis humoribus, euidenter intendebatur: at  
grauitas tensioq; augebatur non nihil à pran-  
dio, quando vaporibus eleuatis ex alimento as-  
sumpto tum, quādo membra naturali facultati  
seruientia primas nutritionis actiones admini-  
culo caloris naturalis & facultatū perficiebant,  
cerebrum paulò liberaliùs replebatur. Accessit  
etiam huic feбри in plerisq; corporibus tertium  
σύμπτωμα, quod erat catarrhi tenuis ad fauces &  
pectus destillans fluxus, qui instrumētis respi-  
ratio-



rationi ac voci formandæ seruientibus repletionem grauantem, leuem atque siccam tussim & molestam raucedinem attulit.

## CAPVT TERTIVM.

*De causis epidemij huius morbi externis.*

**P**O S T Q V A M nobis satis constabat de natura siue substantia & symptomatibus morbi, qui publicè tunc grassabatur: statim nobis inquirendæ erant causæ naturales, quæ illum produxerant & adhuc in agris hominum corporibus fouebant. Duplices autem in singulis morbis causas doctissimi quique medicorum constituunt. Alias enim earum appellant *αρχικάς* siue præincipientes, quæ occasionem morbis præbent: Alias verò ex illis dignantur nomine *ακολουθικάς*, quòd sint præcedentes & cõiunctæ causæ, quæ essentiam morbi constituunt, augent & conseruant, quàm diu in corpore animato reliquæ manent. Sicuti autem illæ extra corpus humanum positæ nihil agere, nullumque affectum imprimere corporibus humanis possunt, teste Galeno, nisi inueniant subiectum bene ad actiones externarum causarum recipiendas dispositum: Ita hæ in uiuo animalis corpore collectæ quiescunt, neque quippiam noxæ actionibus facultatū inferunt antè, quàm ab externarum causarum sufficienti efficacia impelluntur. Tunc enim demum in

*Causa morborum.*

*Externa.*

*Interna.*

*Causas externas agere in subiectū prædispositū. Libro 1. de symp. cau. cap. 2.*

*Causas internas nihil agere nisi irriterentur ab externa causa.*

H



actum procedunt internæ & latentes causæ,  
 vt aliàs facultatem, aliàs instrumenta primaria,  
 aliàs subministrantia membra, aliàs facultates  
 ac instrumenta simul ledant atque morbum effi-  
 ciant, cum externæ causæ satis validæ accessse-  
 rint, quæ illas irritant atque incitant. Etiam si  
 autem vtriusque generis causæ morbum in hu-  
 manis corporibus producere valeant: & ideo  
 causarum numero censentur, quod aliquā ge-  
 nerationis partem morbo, qui fit, conferant,  
 tamen altera citra alterius causæ adminiculum  
 ad producendū effectum inutilis & impotens  
 est: Sed necessum est vtramq; causam simul in  
 agendo cōspirare ita, vt agens siue externa suf-  
 ficiens robur habeat: & interna, quæ actum ex-  
 cipere præincipientis causæ debet, ita disposita  
 sit, vt actum irritantis causæ recipere, & vires,  
 noxias facultatibus atq; instrumentis corporis  
 animati, sufficienter exercere possit. Nam ex-  
 terna siue extrinsecus adueniens causa etiam si  
 incidat in corpus bene temperatum & purum,  
 nil quidquam efficit, quod actionibus euiden-  
 tem noxam afferret: sed frustra vires suas inten-  
 dit, cum robur virium in bene temperato & o-  
 ptimè habituato corpore facile conatum illius  
 reprimat atq; repellat. Si verò præincipiens at-  
 que externa causa inuenit corpus malè tempe-  
 ratum & ita dispositum, vt propter collectio-  
 nem prauorum humorum, qui idonei morbo-  
 rum generationi habentur & actionibus cau-  
 sarum

*Lib. de Sym.  
 dif. cap. 1. de  
 San. tu. lib.*

*4, cap. 2.*

*Libro 3. de  
 Symp. caus.  
 cap. 1.*

*Lib. 1. Me-  
 thodi, cap. 8.*

*Lib. 3. de pra-  
 sagijs expul.  
 cap. 6.*

*Lib. de Con.  
 artis ca. 88.*

*Subiectum  
 cause agen-  
 tis prædispo-  
 situm sit ne-  
 cesse est.*

*In quibz cor-  
 poribus ex-  
 terna causa  
 facile actū  
 producant.*



farum externarum facilimè consentiunt: tum illa citra multum negotium affectum morbosum producit. Pariratione causæ internæ colliguntur & latent in corpore citra noxam tantisper, dum aut robore caloris naturalis concoquantur & euacuentur: aut valida externæ causæ operatio adueniat & eas ad morbi productionem impellat. Quod itaq; attinet febris epidemiæ, de qua agimus, causas externas, omnibus in propatulo est Christi fidelib<sup>9</sup>, & ethnici- *Hom. 11. c.* sanioribus quasi per somnium innotuit, primariam atq; efficacissimam causam esse hominum malitiosam improbitatē & impiā peccandi proteruiam, qua DEVS, ad iustissimam commotus iram in genus humanum, præter bella, *Peccata hominum primarias causas malorum.* seditiones, terræ motus, diluuiâ, noxias bestias, famem & incendia mittit varios languores ac horrendos morbos, vt impia sex, quæ mentem DEI neque vult intelligere, neque tempus veniæ arripere, neque ad meliorem frugem redire conatur, sed in impietatis via progredi audet, è mundo auferatur: & pij de iudicio DEI seuerissimo commoniti maturè vitam suam emendent, dignam Christianis pœnitentiam agant & animas corporaque sua ex flagranti iræ diuinæ incendio emendatione & integritate vitæ liberent, sicuti copiosè in primo huius libri capite ostendimus. Vt plurimùm etiam euenire videmus, vt pij & iusti, qui inter bonum atque malum discrimen nullum adhuc

H ij



*Cur etiā infantes plerūque his malis affligantur.* cognouerunt, eiusmodi humani generis hostibus succumbant aut propterea, ut pœnas & ærumnas grauiiores effugiant: aut ideo, ne postmodo exemplis malorum hominū corrupti iacturā animæ beatitudinisve æternæ patiantur: aut alias ob causas, quæ nobis in hac ignorantie humanæ caligine occultæ sunt. Ab his verò

*Secundaria causa à prima dependent.* secundæ causæ & earū effectus prorsus dependent, & physicæ siue naturales dicuntur eam ob rem, quòd in elementorum & rerum naturalium theatro cōtinuis mutationibus obnoxio

*Theologos in inuestigatione et mitigatione primarum causarum occupari.* diuinitus excitantur. Et sicuti rerum diuinarum inuestigatores atque doctores occupati sunt inuestigatione causarum primarū & præternaturalium: atque pijs, necessarijs salutari-busque admonitionibus, tempestiuis comminationibus & medijs siue rationibus diuinitus reuelatis illas mitigare ac transferre indefesso

*Astronomos causas mutationum et flagellorum diuinorum ex astris scrutari.* laborant studio: Ita rerum naturalium solertissimi inquisitores partim astronomi ex astris & eorundem motibus atque configurationibus causas mutationum, ærumnarum & calamitatum, quæ in his inferioribus mundi partibus interdum contingunt, colligunt & sapienter ratiocinando explicant: partim intra elementa-

*Medicos ex elementorū cōstitutione petere causas morborū.* rem regionem mentis suæ iudicium & ratiocinationem coërcentes medici tantum inquirunt mutationes tempestatum & qualitatum in aëre, ut & errores cognoscere laborant, qui  
in



in quotidiano hominum victu contingere frequenter consueverunt, & veluti longa experientia testatur, in humanis corporibus evidentes alterationes atque morbos noxios efficiunt. Nos itaque in inuestigatione causarum externarum, à quibus epidemia illa febris dependebat, extra nostræ professionis limites pedem hoc loco minimè efferentes, conuertemus animum & oculos ad doctissimas diuini Hippocratis obseruationes, per quas medicos in inuestigatione causarum externarum & morborum populariter grassantium dirigit. Dicit autem princeps ille medicorum acutissimus lib.

3. Aphor. part. 1, mutationes temporum potissimum morbos gignere & irregulares siue præternaturales calidarum vel frigidarum qualitatum excessus in aëre facere: eodem modo morbis pluribus occasionem atque materiam subministrare. Vbi manifestè indicat intempestiuas aëris constitutiones æquè morbos generare, atque errores, qui inordinata victus ratione committuntur, fœcundam scaturiginem & efficacem occasionem languoribus ægrotudinibusque præbere solent. Deinde libro 6, epid. part. 8. Aphor. 25, commonet medicum, ut singulari cura ac diligētia inquirat de causis morborum externis, cum ait Solis æstus, frigus, humiditates siccitatesque considerata esse, ut cognoscat, per quæ, quibus & in quæ mutationes fiant. Est enim eorum cognitio apprimè

*Mutatio aeris morbos parit.*

H iij



*Æstatis il-  
lo anno tem-  
peries qua-  
lis fuerit.*

*Plin. lib. 2.  
cap. 47.*

*Auster hu-  
midus frigi-  
diorque est.*

*Naturalis  
æstatis tem-  
peries qua  
sit.*

utilis medico ad causarum internarum inuesti-  
gationes & morborum curationes. Initium  
autem æstatis, sub cuius finem febris illa putri-  
da populabatur, habebat inconuenientem, in-  
æqualem, & tamen magna ex parte Austrinam  
aëris constitutionem. Erat enim cœlum ferè  
continuis nubibus obductum, frequentes stil-  
labāt pluuiæ, quæ messoribus, colonis & omni-  
bus penè hominibus intempestiuę erant, quòd  
tum eorum operæ in colligendis frugibus im-  
pediebantur: tū aër, circumdans humana cor-  
pora, frigidior paulò, quàm Austri natura ferre  
solebat, atq; humidior, quàm aut anni tempus,  
quod naturalem temperiem aliàs solet habere  
eam, quæ ad caliditatem & siccitatem in aëris  
qualitatibus & humanorum corporum consti-  
tutionibus euidenter declinat; aut humanorum  
corporū sanitas æstatis tempore sustinere con-  
sueuerat: non nihil hominū corpora, quæ aëri  
eidem sese imprudenter committebant, affici-  
ebat, & pororum cutis modò constrictione,  
modò reseratione inæqualē caloris naturalis  
constitutionem atq; operationem efficiebat.  
Cum itaq; æstas ferè per integrū mensem & am-  
plius naturalem suam temperiem in aëris qua-  
litatibus non haberet, sed manifestam frigidi-  
tatem ac humiditatē præ se ferret: fieri non po-  
tuit, vt non intemperies æstati & corporum hu-  
manorum constitutioni sanæ inconueniens  
quippiam noui in humanis corporibus moli-  
retur,



retur. Hoc eò faciliùs fieri potuit, quo magis *Humida in*  
 intemperies illa aëris', quæ planè morbosas & *temperies*  
 lethiferas mutationes in humanis corporibus *est maxi-*  
 excitare consuevit, vt tradit Hippocrates lib. 3. *mè morbo-*  
 Aphor. part. 15, vbi inquit ex anni constitutio- *sa.*  
 nibus in vniuersum siccitates imbribus salu-  
 briores ac minùs mortiferas esse, incidit in æ-  
 statem, quæ secundum naturalem anni consti-  
 tutionem in aëre calidas & siccas qualitates re-  
 quirat. Hanc aëris æstiuæ constitutionem fuisse  
 causam præcedentem febris epidemiæ statui-  
 mus, quòd illa variè affecerit calorem natura-  
 lem & non nihil pituitosarum superfluitatum  
 produxerit, quæ postea impedimentum dede-  
 runt calori naturali, vt bilis substantiam ido-  
 neam generare non potuerit, vt paulò post co-  
 piosius docebimus, quando de interna huius  
 febris causa agemus. Potuisse autem talium  
 morborum materiam fecundam per eiusmodi  
 aëris inconuenientem constitutionē in hu-  
 manis corporibus produci, docet idem Hippo-  
 crates lib. 3. Aphor. part. 16, vbi asserit in plu-  
 uiarum multitudine, præter alios morbos, vt  
 sunt alui profluvia, putredines, morbi comitia-  
 les, torpor & angina, magna ex parte etiam fe-  
 bres longas fieri. Si itaque diutiùs illa aëris  
 constitutio durasset, neque valde calida & sic-  
 ca temperies subsequuta fuisset: febres illas lon-  
 gas & periculosas fieri potuisse non longè à ve-  
 ro abest, quæ ob contrarium aëris tempera-

*Quales mor-  
 bi in intem-  
 perie aeris  
 frigida &  
 humida ge-  
 nerentur.*

H iij



*Cur febris e-  
pidemia lon-  
ga esse nō po-  
tuerit.*

mentum, causarum internarum nō admodum copiosam quantitatem, neque valde excedentem earundē intemperiem, omnino longā esse non poterant, etiam si fiebant: neque periculosa fieri valebant, quōd aëris constitutio, quæ pluuias subsequēbatur paulō prius, quā febris epidemia vires exerere inciperet, cū morbi temperamento conspirabat. Etiam si verō hæ febres longē esse non poterant: tamen continuæ cognoscebantur & molestum ægris dolorem capitis cum alijs symptomatibus inferebant. Saltem in eo apparebant benignæ, quōd neque admodum acrem ardorem in membris externis, neque vehementem sitim, neque internarum partium acrem vstionem, neque scabritiem linguæ, neque continuas vigilias, neque alienationem mentis, vt plerumque febres ardentes facere solent, ægris hominibus afferebant.

#### CAPVT QVARTVM.

##### *De causis febris epidemiae internis.*

*Abdita &  
interna cau-  
sa cur dica-  
tur.*

**D**E interna autem huius febris causa, quam Celsus abditam vocat eam ob rem, quōd tantūm peritis medicis diligenti inuestigatione innotescat, vt certi quippiam percontando & inuestigando cognoscere possemus: insistendum esse necessariō putabamus vestigijs veterum medicorum, quorum dicta cūm veri-



veritati & rationi rectæ admodū consentanea  
sint: instar oraculorū non immeritò hætenus  
ab omnibus rei medicæ peritis consentur. Di-  
cit autem Hippocrates in libello de natura hu-  
mana, Hyeme in humanis corporibus abunda-  
re pituitam eo tempore omnium humorū fri-  
gidissimam: Vere ex pituita in corporibus ho-  
minum copiosissima sanguinem fieri & indies  
maius clementum sumere eam ob rem, quòd  
frigora illo tempore remittant & imbres niués-  
que relaxentur: vnde in humanis etiam corpo-  
ribus mutatio fiat ob ambientem corpora no-  
stra aërem, qui dierum tempore procedente  
humorum pituitosorum coctionem in corpo-  
re humano suis qualitatibus iuuat, dum eum  
recreat & poros cutis relaxat, atque adminicu-  
lo est naturali calori tum temporis incremen-  
tum roboris sumenti ideo, quòd fuliginosita-  
tes, quibus per hyemem coarctabatur & ad-  
grauabatur, per poros cutis referatos expeditè  
expellat & copiam pituitosorum humorū ex-  
actiùs coquat resoluâtque, vt illo anni tempo-  
re sanguineus humor augeri atque abunda-  
re præ reliquis corporis humani humoribus  
soleat: Æstatis initio sanguinem quidem vige-  
re; verumtamen bilem paulatim accrescere &  
incrementum eò vsque sumere dum reliquis,  
qui in corpore humano existunt, humoribus  
dominetur: Autumni verò initio bilem flauam  
abundare, quæ temporis progressu in atram bi-

*Qui humo-  
res singulis  
annis tempo-  
ribus domi-  
nètur in cor-  
poribus hu-  
manis.*



*Febris epidemia causa materialis & interna fuit bilis.*

*Quos morbos bilis generet.*

*Morbos biliosos citò ad statum properare.*

*Febrē epidemicā fuisse celeris iudicij.*

lem mutetur ita, ut maximum incrementum illo anni tempore in massa humorum, quibus corpus humanū nutritur, habeat dominiūque sibi in reliquos humores potēter assumat. Ex his prudenti cuilibet, qui rei medicæ noticiam habet, facilè patet continentem causam, quæ essentiam morbi producti constituēbat ita, ut affectus maneret tantisper, dum illa in corpore præsens esset; & desineret, cum primum idoneis remedijs aut vi caloris naturalis auferretur, febris epidemiæ fuisse bilem flavam. Hic enim humor morbos acutos & febres ardentes, eāque continuas excitat, quando propter aliquam obstructionem intra vasa putrescit: unde febrilis ardor & spirituum humorūq; inflammatio communicatur cordi, & inde in omnes corporis humani particulas æqualiter diffunditur. Quicumque verò affectus ex hoc humore, substantia, quantitate, qualitate aut motu & fluxu non naturali peccante, fiunt: celerrimè ad statum suum properare aduertuntur, ut exoptatam sanitatem aut subitum interitum animantis corpori vitam habentis inferant. Quod febri epidemiæ fuit peculiare. Ultra quartum enim aut septimum diem non durabat in ægro corpore, nisi aut illud temperamento pravo fomitem maiorem morbo exhiberet, quàm secundum naturam ætatis & temperaturæ latitudinem sanitatis non excedentis, æstivo tempore in quorun-



rundam hominum corporibus hic humor augeri consuevit: aut error aliquis tum in diæta, tum in medicatione committeretur, qui morbi causam materiale[m] augeret, vigorem impediret vel symptomata exacerbaret. Humorem autem illum non fuisse purum, neque perfecte coctum, sed crudum & substantia admodum tenuem, ut puta, qui habuerit aliquantulum pituitosorum humorum coniunctum, quam humorum misturam plerumque bilem maioris famæ dicimus, ostendebant tum morbi essentia & calor, tum symptomatum exacerbatio. Cùm enim ab Hippocrate dicatur venas æstiuo tempore exiccatas ad se trahere acres biliososque humores, qui materiam atque originem vehementibus febribus præberent, in quibus ardor acris, sitis vehemens, linguæ ariditas, scabrities & nigredo, tormina, alui deiectiones liuidæ, vomitus biliosi, acutus capitis dolor, oris amarities, cibi fastidium, vigilia, inquietudo & mentis alienatio frequenter apparerent: facile conijcere poteramus bilem flauam neutiquam esse solam & per se suasque qualitates causam materiale[m] huius morbi. Aliàs enim symptomata eadem morbo adfuissent. Ratiocinabamur verò ex præterita aëris intemperie bilem flauam adiunctum habere plurimum de pituita aquosa, quæ contraria sua qualitate bilis flauæ effrenem naturam & vehementem ardorem,

*Bilem illam  
impuram fuisse.*

*Lib. 4. de  
victu acut.  
mor.*

*Pituitam a  
quosam ad-  
mixtam fuisse bili.*



*Diluuntur  
aliquot obse-  
rations.*

quando peccat & morbo aliquo eius malignæ qualitates intenduntur, non nihil reprimeret. Humor ille pituitosus, tenuis & aquosus, per aëris intemperiem, quæ æstatis initio minimè conueniebat, productus & collectus, in humanis corporibus remanserat: quem bilis flaua, feruens ex putredinali calore, quem leuis obstructio producebat, liquabat & sibi copulatū per vniuersū corporis habitum diffundebat in venis. Et si enim æquè ex libro 6. Epidemiorum part. 6. Aphor. 6, vbi ait Hippocrates perfrigidam corporis temperiem fieri calidiorem in tempore & regione frigida, atque ex lib. 1. Aphor. part. 15, vbi ait idem medicorum lumen, ventres hyeme & vere calidissimos, & calorem innatum plurimū egere multis alimentis: quispiam dixerit tantum abesse à vero, vt illa aëris constitutio, de qua in causarum internarum inuestigatione pauca diximus, pituitosos humores in humanis corporibus generaret, vt etiam contrarium fiat, nimirum calorem naturalem fortiorè optimè munia sua obire & laudabili coctione bonum sanguinem minimūque excrementiciarū & frigidarum superfluitatum in corpore relinquere: vnde sequeretur sanguinem ipsum præbuisse causam materialem huic epidemiæ feбри, cū idem humor calidus & humidus à multis medicis censeatur, & non tantū eiusmodi morbos excitare, verū etiam celeriter ad statū deducere propter suam con-



consistentiam, quantitatem, qualitatem & motum siue fluxum intempestiuum consueuerit. Eundem enim sua bonitate facilius caloris naturalis actionibus parere, ut concoquatur & à malignitate nocendi vindicetur: aut certe nimia sua quantitate æquè, ac venenosa qualitate, cum putredinem spirat, lethales affectus grauissimæ symptomata subito inducere posse. Vel, quod etiam inde sequi videtur, non modò non pituitosos humores per illam aëris constitutionem generatos esse in corporibus humanis: verum etiam caloris naturalis efficaciam adurendo sanguinem per Veris tempus collectum generasse plurimum biliosorum excrementorum, quæ febrem illam accendissent. Tamen veluti puram bilem febris epidemix non fuisse causam materialem supra euentibus ostendimus rationibus: ita hinc eundem etiam monemus, ut meminisse velit etiam tum, quando pori cutis ob ambientis aëris frigidas qualitates clauduntur, & caloris naturalis vis in imo corpore coaceruata validius in alimenta assumpta agere solet: generari & colligi magnam fuliginositatum excrementitiarum copiam in toto corpore, & maximè in externis particulis, quando pori cutis conclusi non præbent liberam exhalationem abundantibus fuliginositatibus, quam calor naturalis tum, quando non impeditur constrictione pororum in cute, omnibus modis perficere conatur, ut se liberet à



nimia coarctatione, qua in angustum colligi-  
 tur intra corpus animatum hominis, ne in ex-  
 ternarum particularum substantia possit ita,  
 quemadmodum decebat, munia sua perfice-  
 re. Non itaque boni sanguinis copia in tali aë-  
 ris constitutione generatur: aliàs enim censen-  
 dum esset hyeme ac initio veris eundem hu-  
 morem maximè abundare, quod omniū me-  
 dicorum sanę sententię reclamationat. Sed pituito-  
 forum humorum copia euident incrementum  
 sumit: & sanguis initio veris pituitosus admo-  
 dum est. Qui cū propter suam crassitiem ob-  
 structiones creberrimè faciat, quę ad putredi-  
 nes & febriles inflammationes summè procli-  
 ues & causę earum principales sunt: fieri solet,  
 ut plerumque verno tempore febres putridę  
 ac cōtinuę generentur, in quibus natura mor-  
 bi quiddam venenosę qualitatis prę se fert ob  
 sanguinis corruptionem, ut contagione qua-  
 dam illę affectiones in corpora, apta ad susci-  
 piendam agentis causę efficaciam, propagen-  
 tur. In quibus febribus quando calor naturalis  
 suo robore vincit materias peccantes, solet na-  
 tura corporis humani ad crisim properare &  
 materias illas beneficio sui roboris ad externā  
 cutem propellere. Hinc petechię & ἐξανθήματα  
 siue efflorescentię in cute, quas papulas dici-  
 mus, creberrimè oriuntur, quemadmodum in-  
 eunte vere eiusdem anni penè in vniuersa Ger-  
 mania fiebat, ut nulla penè vrbs, nullum oppi-  
 dum,

*Celsus lib. 5.*

*Quales mor-  
bi principio  
veris & vni-  
de fiant.*

*Petechias  
& exanthe-  
mata cuti-  
cè expelli.*



dum, nulla villa, nullaque domus ab hoc malo immunis existeret. Non modò enim infantes bimi & quadrimi, qui plerumque ob voracitatem illi ætati propriam in suis corporibus colligunt plurimum pituitosi sanguinis: verùm etiam iuvenes, virgines, viri & mulieres, qui viuendo mediã ætatem agebant aut etiam quadragesimũ ætatis annum contigerant, eiusmodi continuis ardentibusq; febribus & symptomatibus similibus affligebantur, ijs tantùm intactis, qui benigno corporum temperamento præditi cautè temperantèrque vixerāt, neq; multum pituitosorum humorum per hyemis tempus collegerant. Quotquot enim humidior *Lib. 3. Aph.* frigidiorque temperamento erant natura: aut *part. II.* consueta viuendi ratione talem temperiẽ contraxerant: ij omnes putridis febribus & earundem symptomatibus affligebantur. Quod argumentum certissimo est nobis illiusmodi papulas, perechias & similes morbos nò modò non *Papulas nò* prouenire ex reliquijs tantùm menstrui sanguinis, vt pleriq; medici autumāt: verùm etiam *oriri ex reli* tales materias in hyeme & frigidiore veris tempore colligi posse, ex quibus verno tempore, quando humores moueri incipiunt, febres putridæ & continuæ generantur, quæ in sua cristalia symptomata gignunt. Quis enim affirmarit impudèter, si concesserimus ætati puerili ex menstrui sanguinis reliquijs illa fieri, homines *quijs menstrui sanguinis tantũ, & aliqui censent.* quadragenarios nondũ reliquias illas labore,



valido exercitio & caloris naturalis acrimonia  
 concoxisse atque expulisse? Aëris itaque tem-  
 peratura frigida & humida initio æstatis occa-  
 sionem dedit pituitosis humoribus, qui tamen  
 dominium in massa humorum non potuerunt  
 planè occupare eam ob rem, quòd naturalis æ-  
 statis temperies pituitosorū humorum nature,  
 consistentiæ & qualitatibus vehemēter aduer-  
 satur. Sed tum ob intemperiem intempestiuā,  
 tum brevis temporis spacium, quo duravit ir-  
 regularis illa aëris constitutio, generabatur ali-  
 quanto plus pituitæ in massa humorum, quàm  
 natura corporum humanorum illo anni tem-  
 pore perferre aliàs solita erat. Huic, succedente  
 æstatis temperie regulari, bilis flaua misceba-  
 tur ita, vt substantia bilis flauæ fieret crudior  
 nō modò, tenuior & subtilior, sed etiam celeri-  
 ter ad fluxionem irritata per totum corpus fer-  
 retur. Illa turbatio & agitatio ferebat humo-  
 res confertim ad epar, vt ibidem mediocris ob-  
 structio in venis subtilioribus fieret, quæ calo-  
 rem præternaturalem siue febrem epidemiam  
 accendit. Quam communiter pestilentialem  
 qui dixerit, non admodum à vero aberrauit.  
 Etiam si enim non valde perniciofa erat, ne-  
 que multos egros interimebat, sicuti lues pesti-  
 fera facere consuevit: tamen eodem ferè modo  
 eodemque tempore plurimos homines subita  
 inuasiōe corripiebat, vt efficacia & velocita-  
 te afflictionis quippiam commune cum vene-  
 nosis,

*Febrē illam  
 etiam pesti-  
 lentialem co-  
 muniter di-  
 ciposse.*



nosis, contagiosis siue pestilentibus febribus  
 sese habere non occultè ostenderet. Et nisi di-  
 uina prouidentia humor pituitosus contrarijs  
 suis qualitatibus in corporibus ægris restitisset  
 feruori & ferocitati bilis flauæ: fortasse pericu-  
 losa pestis extitisset, cùm ita ardorem febrilem  
 tantùm in affectis corporibus excitaret. Sicuti  
 itaq; censebamus copiam pituitæ aquosæ ma-  
 terialē fuisse causam bilis crudæ & fluidæ, quæ  
 febres accendebat: ita etiam ratiocinabamur  
 eandem pituitam infrenasse ferociam peccan-  
 tis materiæ, ne potuerit violenter sauire & le-  
 thalia mala excitare. Calor autē febrilis, com-  
 municatus cordi, spargebatur adminiculo san-  
 guinis subtilioris & spirituum vitalium per ar-  
 terias in totum corpus, vt ardor febrilis æqua-  
 liter in omnibus membris corporis affecti ex-  
 citaretur, & non tantùm vapores calidi, verùm  
 etiam humores feroci impetu per calorem fe-  
 brilem concitati confertim ad cerebrum fer-  
 rentur. His cerebrum repletum incaluit & gra-  
 uatium tensiuumque dolorem propter pan-  
 niculos repletos sensit, vt secundo capite huius  
 libri copiosè ea de re dictum est. Resoluti au-  
 tem ibidem vapores vnà cum humoribus in  
 cerebrum delatis in quorundam hominū cor-  
 poribus, quæ parum de materia biliosa & pi-  
 tuitæ mista beneficio temperamēti benignio-  
 ris aut prudenti ac laudabili diætā collegerant,  
 breui temporis spacio beneficio caloris natu-

*Quomodo fe-  
brilis ardor  
accendatur  
et spargatur  
in corpore.*

*Causa dolo-  
ris capitis  
in febre.*

*Causa catar-  
rhi & rufis  
in febre illa.*



ralis consumebantur atque digerebantur in cerebro, ut postea per nares ac alios meatus excretionibus talibus destinatos facilius excernerentur. In iis vero corporibus, quæ aut frigidius humidiusque temperamentum consecuta erant à natura, aut otio & inordinata victus ratione talem temperiem adquisuerant, quæ plus pituitæ in illa aëris constitutione colligeret, maior erat pituitosorum humorum copia, ex qua tempore in febricitationis plures & crassiores vapores ad cerebrum eleuabantur. Hi ab ingenito cerebri calore resoluti destillarunt ad fauces & occuparunt bronchia, pulmones cavitatesque pectoris. Hinc voces fractæ, raucedines, difficultates anhelitus & tussis sicca molestæque ideo excitari solebant, quod cerebro fauces à materia tenui, fluida atque aliquantulum acri irritarentur: & tamen parum vel nihil citra molestum & multum conatum excerneretur, donec materia coctione aliquantulum alteratione incrassaretur & ad faciliorem educationem præpararetur. Hæc autem febris epidemia comprobauit verissimam esse sententiã, quam tradidit Hippocrates lib. 6. Epid. part. 6. Aphor. 20. ubi dixit: οἷσι ῥίνες ὑγρόταται φύσι, καὶ ἡ γυνὴ ὑγροτέρα, ὑγιαίνουσιν ἔτι νοσηλότερον· οἷσι δὲ τ' ἀνασπία, ὑγιανότερον. hoc est, qui nares habent humidiores & genituram humidiores, peius illi valent his, qui contrarium sortiti sunt. Nam sicciora corpora, quæ aut à temperamento ingenito talia

*Humidiora  
corpora mor  
bis magis  
obnoxia.*

lia



lia erant, aut temperantia, exercitio laboréque omnem humiditatem superflua pituita digere poterant, ab hoc malo vel prorsus immunia erant, vel leuiter patiebantur & statim liberabantur. Non autem putredinem in sanguine fuisse, sed in bile maioris fama, ostendit etiam illud, quod febres, quae oriuntur ex putredine sanguinis, sint ardentes, acutae, venenosae, contagiosae & valde malignae, praeterea multis exitiales, quod tum ex pestifera contagione, tum ab exanthematum petechiorumque vehementia apparet. Plurimi enim mortalium his morbis extinguuntur hanc ob rem, quod in illis putredo corrumpat amicissimum naturae humanae humorem, in quo vitae spiritus continentur: & praeterea inficiat vitales cordis spiritus, qui animae, caloris innati ac facultatum omnium sunt vehiculum. Haec verò febris neque valde acris & intensa, neque admodum venenosa, neque sauis symptomatibus tantum, quantum subita inuasionem terribilis, neque multis agris exitialis fuit, ut supra dictum est. Quicumque enim agrorum hominum laudabili diæta utebantur, citra ullius medicinae usum intra paucos dies pristinae incolumitati restituebantur. Minus verò periclitabantur in hac febre, quicumque circumspectos se gerebant in diæta, quando natura & qualitas morbi egrorum hominum temperamento, ætati, habitui & anni tempore congruebat: & peius illi habebant, quibus nihil secundum istorum

*Cur petechiis plurimi moriuntur.*

*Lib. 2. Aph. part. 34.*



*Vena sectio-  
nem huic fe-  
bris noxiam  
fuisse, ut &  
calidam dia-  
tam.*

*Cur febres  
longa fieri  
non potue-  
runt.*

conueniebat. Quicunque verò venæ sectione in curatione huius febris utebatur, vel calidam diætam medicationemque incidentem & attenuantem adhibebant: diutiùs & periculosiùs non modò affligebantur, sed etiam plurimi ex his in viuorum numero esse desierunt. Erat enim venæ sectio morbo, causæ internæ, anni cōstitutioni & symptomatibus prorsus inconueniēs. Nam per eam auferebatur humor naturæ ac vitæ humanæ familiarissimus, qui & bili flauæ & pituitæ potuit vires frangere: minuebatur calor naturalis, qui ob æstatis temperiem ac febrilem calorem debilitatus dissipabatur & oppugnabatur ita, ut materiã morbi adgredi, concoquere & se suumq; domicilium malo liberare nō ampliùs valeret: humorum deniq; substantia tenuior & liquidior non modò, sed etiam ferocior ad fluxum fiebat. Qui verò calida utebantur diætã & vinum bibebant merũ, incendium febrile augebant & humorum fluentium impetum promouebant: intendebant etiam noxias materie peccantis qualitates, ut symptomata cum morbo exacerbarẽtur & vitæ periculum afferretur. Etsi autem bilis flaua pituitam, alienum humorem ab illo anni tempore, adiunctam habebat: tamẽ morbos longos & curatu difficiles minimẽ in corporibus humanis generare poterat, sicuti aliàs fit, quando ob errorem in victu commissum per multa tempora in corporibus alius humor genera-  
tur,



tur, quàm illo anni tempore in corporib<sup>9</sup> mortalium generari solet. Nam neque sua copia dominium habebat inter reliquos corporum humanorum humores, neque sua qualitate reliquis humorum temperiebus præcellebat, neque etiam humori iungebatur, qui eius substantiam atque qualitates intendere potuisset: sed & parvam quantitatem & consistentiam admodum tenuem habebat. Iuncta enim erat humori bilioso, qui sua qualitate calida & sicca non modò repressit pituitæ vires & qualitates, verùm etiam substantiam liquefecit, vt tenuior esset, neque obstructions graues ac longas facere posset. Dum autem bilis flaua illum humorem in corpore inueniret, non potuit suam substantiam in debita consistentia adquirere, neque suam quantitatem augere, neque qualitates nimium intendere, neq; noxia symptomata, de quibus suprà dictum est, inducere: sed crudior, tenuior & ad fluendum pronior suo anni tempore generabatur. Bilis enim flauæ feruor & siccitas in mistura temperabatur à qualitatibus pituitæ, quæ coniuncta morbi causa præter id, quòd feruorem & acrimoniam bilis peccantis reprimebat, ne ardores acres, deliria, sitim vehementem, scabritiem linguæ, ægumtiam & inquietudinem inferre morbo correptis corporibus valeret, nil quidquam euidentis noxæ inferebat: saltem id incommodi præstabat, quòd per bilem liquefacta in cor-

*Cur febris  
vehementia  
symptomata  
habere non  
potuerit.*



pore ferociter impetu suo flueret, leues obstru-  
 ctiones efficeret, ex quib. febrilis putredo ini-  
 tium sumpsisse existimatur, & denique destil-  
 lationū à cerebro ad fauces, bronchia, pulmo-  
 nes cauitatēque thoracis materialis causa in  
 plerisque agrorum hominum corporibus ex-  
 tarer, vnde raucedo & tussis sicca subsequen-  
 tur. Nam ob humorū tenuitatem nihil per fau-  
 ces egeri poterat de peccāte materia antè, quā  
 frigefaciētibus & incrassantibus materia ad fa-  
 ciliorem expulsionem præpararetur. Pituita  
 enim humor est frigidus & sua natura lentus, vt  
 vt tenuem substantiā habeat, qui in aliqua cor-  
 poris humani particula collectus latet ac quie-  
 scit tantisper, dum à calore naturali concoqua-  
 tur, vel à præternaturali aliquo & putredinali  
 calore fundatur, vel à particulæ expultrice vir-  
 tute propellatur, vel denique bile flaua attem-  
 peretur, vt fluere in alias corporis humani par-  
 ticulas ac illas aliquo malo afficere possit. Ea  
 propter neq; causa turbationis, quæ in humo-  
 ribus extabat, per se esse, neq; febres acutas in-  
 cendere, neq; tanta ferocia de parte in partem  
 ferri & destillationes à cerebro ad fauces &  
 thoracis cauitates efficere potuisset, nisi bilis  
 flaua eum humorē temperasset, & ad motum  
 fluxumque violenter impulisset. Bilis autem  
 flaua tenuis & subtilis humor facilis est ad  
 motum ac promptissimè sursum fertur. Huius  
 substantia tenuis admodum augetur, quando  
 pituita

*Natura pi-  
 tuitosorum  
 humorum.*

*Bilis flaua  
 natura &  
 effectus, quā  
 do peccat.*



pituita aquosa & subtilis eidem miscetur. Et nisi pituita sufficienti vel superabundanti quantitate biliosum humorem refrenet, eiusque feruorem & siccitatem reprimat: ardentissimæ febres cum horrendis symptomatibus eius impetuoso fluxu & feruore particulis valde noxio, in quibus secundum naturam non abundare consuevit antè, quàm motu intempestiuo ingeritur, excitantur, quæ plurimos hominum è theatro vitæ humanæ auferunt. Quod itaque sua efficacia minimè faceret bilis flaua, quando substantia, quantitate, qualitate motuque in corpore humano peccat: hoc maiore impetu & maligniore effectû perficit, quando ab aliquali pituitæ copia attemperatur & exacerbatur, dum substantiæ illius tenuitatem addit, neque tamen feruorem & siccitatem superabundantem reprimit. Hoc fit, quando maior bilis copia in corporibus humanis collecta sæuit, quàm naturalis eius proportio ad reliquos humores fert, ut fit plerumque, in fine æstatis & initio autumnî. Tunc enim bilis flaua suo anni tempore copiosè aucta reliquis dominatur humoribus in massa sanguinea: homines verò illa laudabili diætâ utuntur & fructibus præcocibus atque immaturis immoderatè intempestiuèque vescuntur, ex quibus pituita generari constat, cum illi ipsi sint crudis humiditatibus & ad putredinem aptis pleni, ut puta à Solis radiis imperfectè cocti, quos calor naturalis humanorum

*Quare initio autumnî, febres ardentiores & periculosa grassentur.*



*Lib. 3. Aph.  
part. 4.*

corporū coquendo digerendōq; superare nequit. Hæc pituita cruda & quadam malignitate prædita miscetur biliita, vt eam fluere promptiùs faciat, non tamen ferocientes qualitates in illa reprimat: vnde morborū acutissimorum & lethalium fœcunda oritur materia, qui postea intenduntur & exacerbantur in æquali aëris autumnalis constitutione. Aër enim, qui autumnī tempore ambit corpora hominum modò calidus, modò frigidus, aliàs caliditate sua poros cutis in corporibus humanis reseat & liberam euentationem calori naturali permittit ad expulsionē superfluarum fuliginositatum: aliàs verò qualitate frigida meatus cutis constringit & prohibet diffusiones fuliginositatum, propter errores in victus ratione commissos superabundantium, quæ intra corpus contentæ præsens malum vitæ aut sanitati plerumque portendunt. Illæ itaque diffusiones vtilis & necessariae sunt vitæ humanæ eam ob rem, quòd calor naturalis, ab illis superfluitatibus noxijs liberatus, sua munia in coctione, digestionē & appositione alimentorum æquè, ac egestionē excrementorum crassiorum, quæ animantis corpori noxam inferrent, si aut ultra iustum tempus in corpore humano permanerent, aut per vias eorum excretioni minime destinatas intempestiuè prauèque expellerentur, expeditiùs & feliciùs agit. Hæc fuliginositatum ex esu præcocium fructuum & inordinata



nata vitæ consuetudine intra corpus abundan-  
tium difflatio dum modò ab aëre promouetur  
& iuuatur, modò impeditur & planè supprimi-  
tur: fit, vt calor naturalis multipliciter afficiatur  
& eius actiones crebrò variètur, ex quibus in-  
còmodis febres acutissimas & lethales, vt plu-  
rimùm in autumnò fieri consueuerunt, quæ bi-  
lem flauam pro essentiali causa, vt dictum est,  
habent non puram, sed maioris famæ dictam,  
cui nimirù pituitosæ serositates admisceantur.

## CAPVT QVINTVM.

*De curatione febris epidemice.*

**A**EGYPTIIS lege cautum erat, ne quis me- *Ægypti lex  
de curandis  
morbis.*  
dicorum ante quartum diem ægro homi-  
ni manus admoueret. Etsi enim Ægyptus  
& medicinis abundabat, & studium medicum  
tanta animorum sedulitate atque industria co-  
leretur, vt ferè tot essent medici in ea quot æ-  
grorum hominum: tamen nolebat quippiam  
antè fieri in morbis, quàm aut morbi radices a-  
gere aut naturales corporum ægrorum vires  
prosternere aduerterentur. Accedit & illud,  
quòd plurimi morborum adeò maligni sint, vt  
neque eorum natura, neque causa interna inue-  
stigari possit antè, quàm signis symptomatibúsque  
manifestis prodatur. Hoc autem tempore, quo  
à medicinis abstinebant, vel ieiunia vel vomit-  
us fieri volebant, quòd existimabant aut in-



*Strabo lib.  
7.*

*Legem AE-  
gyptiam a-  
pud nos locū  
habere non  
posse.*

*Lib. 2 A-  
phor. part.  
24.*

gluuiem aut intemperantiā esse originem mor-  
bi in tam temperata regione, in qua non facile  
aëris vitio morbi gignerentur: quam si aufer-  
rent inedia vel euacuatione vētriculi, morbos  
facilimè abigi. Hæc consuetudo Ægyptiorum,  
ad quos Homerus, Pythagoras, Plato & præ-  
cipui apud Græcos philosophi se olim contu-  
lisse ferūtur nullam aliam ob causam, quā ut  
laudandam & vsibus humanis apprimè vtilem  
ingenii morumque culturam inde, vbi per po-  
pulum DEI, posteros Iacobi, artiū optimarum  
semina feliciter iacta erant, ad suos redirent; a-  
pud nos & alios populos, quorū climata intē-  
perata sunt, locum habere neutiquam potest.  
Etiam si enim plurimi morbi corpora huma-  
na inuadant, qui aliquando adeò benigni sunt,  
ut vltra diem quartum non durent, sed naturæ  
robore expugnentur & abigantur, ut faculta-  
tibus & membris ægri corporis exoptata sani-  
tas redeat, qualis etiam febris epidemia fuit, de  
qua agimus: tamen non tantum omnibus me-  
dicis, verum etiā infimo cuique ex plebe constat  
sæpe in nostris regionibus tam seuos in huma-  
na corpora grassari morbos, ut serò nimis illis  
succurreretur, si auxilia afflictis corporib. adhi-  
beri in quartū diem differrentur. Tutius itaq;  
erit, ex sentētia Hippocratis, in principiis mor-  
borū prudenter & cautè mouere atque auferre  
ea, quæ morbi materialem causam continere  
censentur, ut in vigore & morbi consistentia  
quie-



quietem ægro corpori dare tutó possimus. Quod tantò securiùs fiet, quátò magis tum de morbi substantia causaque interna, tum de viribus ægri hominis medico cōstiterit. Grassantur enim plerūq; acutissimi morbi in humana cōuersatione, qui ob materie multitudinē ac malignitatem citò ad statum properat & intra quartū diem naturā corporū ægrorū adeò debilitant, vt frustra deinde auxilia per præstantissima pharmaca adhibere ei coneris, aut planè intra id temporis spatiū prosternunt ac iugulant. His nisi ex sententia Hippocratis tēpe-  
*Lib. 1. Aph. part. 6.*  
 stiue extrema adhibueris remedia, actū erit de vita languentiū hominū. Materia enim horum morborū vehementissima ac ferocissima est in continuo motu & cū impetu irruit in particulas primarias, quarum virtutes & actiones sua multitudine atq; virulenta malignitate tā acriter & strenuè oppugnat, vt postea medicinis nihil efficias, quando vires corporū ægrorum pstrate victoriā morbo cōcedunt. Tunc enim  
*Lib. 2. Aph. part. 30.*  
 morbus, qui in principio debilis erat, vigorem suum adeò potēter in naturā cedentē exercet, vt de viribus restaurandis planè actū sit. Sicuti  
*Occasione & virium robore adiutus medicus feliciter aggit, quàm se illis adiumentis destituitur.*  
 autē medicus naturæ adhuc validæ robur conuenientibus medicinis & laudabili diætā conseruare atque aduersus morbum excitare feliciter nititur: ita omnem operam perdit & præsentissimis remediis fidem apud vulgus detrahit, suā præterea famam & industriam in discrimen ponit, quādo morbis primū victoriā



*Necessitas  
potior lege.*

*Occasio non  
negligenda.*

è manibus eripere & prostratam exhaustamq;  
viribus naturam redimere laborat. Neq; sanè  
medicationes omnes fieri prohibet Hippocra-  
tes in acutorum morborum principijs, quan-  
do ait libro 1. Aphorif. part. 2 4, rarò medicinis  
purgantibus locum esse in principijs morborũ  
acutorum. Dicit enim cum præmeditatione id  
ipsum faciendum. Quibus verbis innuit medi-  
cos prudenter & dextrè perpendere debere, an  
necessariò auferendæ sint internæ causæ mor-  
borum acutorum: an verò mediocris illarum  
copia qualitatẽsque non admodum vehemen-  
tes sint, vt tutò coctionem moliri atque præpa-  
rationem adgredi possint, priusquam eas con-  
venientibus auxilijs extra affectum corpus du-  
cere nitantur. Quæcunq; enim necessariò fie-  
ri debere cognouerit medicus: illa neutiquam  
in curatione morbi omittenda sunt, ni infideli-  
tatis & homicidij crimen subire velit. Necessa-  
riò autẽ multitudo tanta & tam vehemens ma-  
lignitas materiei peccantis, quam naturæ vires  
citra noxam non possent tantisper sustinere,  
dum ad coctionem perueniret, est à perito me-  
dico minuenda & infrenanda, ne languidi cor-  
poris vires debiles interuentu longioris tem-  
poris omnino prosternantur. Aliàs enim rem  
bene feliciterque gerendi occasio, quæ fronte  
tantum capillata & in occipitio planè calua est,  
subitò præterit & medicum honore atq; præ-  
mio priuat. Hanc verò incautam oscitantiam &  
supi-



lupinam negligentiam postea miseri homines,  
 de quorum corio & vita agitur, morte luctuo-  
 sa luere coguntur. Cuius præcepti nos fideliter *Lib. 1. Aph.*  
 admonet diuinus Hippocrates, cum ait con- *part. 22.*  
 cocta medicinis mouenda esse & non cruda,  
 nisi admodum turgeant. Et quanquam ibidem  
 dicit Hippocrates plurima in principijs mor-  
 borum non turgere: tamen hoc non absolutè  
 de omnibus morbis dictum esse vult, sed tan-  
 tum de chronicis & ijs morbis, qui in primo  
 ordine acutorum morborum à medicis collo-  
 cantur & decimū quartum vel etiam quadra-  
 gesimū diem contingere nō rarò solent. Con-  
 stat enim plurimorū morborum eam esse ma-  
 lignantem & vehementiam, vt aut in principio  
 statim extremos ægris corporibus inferant la-  
 bores, aut temporis progressu adeò maligni fi-  
 ant, vt postea nullis remedijs expugnari pos-  
 sint, etiam si Chiron, Æsculapius, Podalærius  
 vel Machaon ijsdem præsentissimis antidotis  
 obuam ire & medicas manus inferre niteren-  
 tur. Eam ob rem neutiquam cessandum in ta-  
 libus malis, etiam si vel sensim oriri vel cau-  
 sas cognitu faciles habere existimentur, vt  
 propterea tutissimi appellari possent: Sed  
 principijs obstandum, cum serò medicina pa-  
 retur, quando mala per longas inualuere mo-  
 ras.

*Vidi ego, quod fuerat primò sanabile, vulnus  
 Auxilium medica post superasse manus,*



*Quando neglectum progressu temporis acce-  
contraxit, nullo subueniente, malum.*

*Ecclesi. cap.  
10.*

*In barbaros  
contemptores  
donorum  
DEI.*

Recentem enim & breuem languorem fa-  
cilius præcidit industrius medicus: sicuti ægri-  
tudo inueterata, quæ iam radices in corpore  
debilitato egit, admodum graui molestia affi-  
cit tum ægrum, qui aliàs impatiens est & optat  
citissimè ex periculo vitæ eluctari atque in pri-  
stinum incolumitatis viriumque statum redi-  
re: tum medicum, qui morosas festinantis ægri  
flagitationes sustinere & curis solitudini-  
busque multis affligi cogitur. Sed inuenias  
hoc nostro seculo homines ineptos & barba-  
ros, qui contemptu quodam donorum DEI  
flagrant maximo, & tantum pii prudentesque  
apud vulgus videri volunt, cum nihilo plus,  
quàm infantes, intelligant. Hi frequenter gar-  
riunt & media diuinitus humanæ infirmitati cō-  
cessa, ut iisdem sustentetur & iuuetur, eleuant  
atque contemnunt. Dicunt enim contra DEI  
arbitrium & voluntatem nullum hominum  
consilium, nullumque præsidium valere, qua-  
si boni medici hoc ignorarent, & quippiam,  
præter DEI nutum, de sua facultate sanandi æ-  
gros homines amplius promitterent, dum mu-  
nere suo ex ordinatione DEI apud ægros fun-  
guntur & exitum fauori eius benigno com-  
mittunt, qui medicum & medicinam creauit:  
Eam etiam ob rem in talibus afflictionibus po-  
tius ad DEVM piis precibus confugiendum &  
humi-



humiliter patienterq; expectandū, dū malum meritū transeat: quod qui non faciunt, meritò eos iram DEI sibi cumulare & medicorū inscitia atq; temeritate perire. Etsi itaque eiusmodi mysteriorū diuinorū contēptores in DEVM, creaturas & omnē bonitatē DEI nimis, quā decet Christianos, impii in suis erroribus relinquendi essent, cū sanorū hominū prudens consilium & tempestiuos monitus neque admittant, neque cognoscere velint, quid veritate verbi diuini imbuti alii scribāt: tamē iisdem *Stulto respōdendum, ne videatur sapere.*

ob gloriā immortalis DEI & reuerentiam erga artes honestas, quas vñbus vitæ humanæ contulit clemētissimus DEVS ex imperuestigabili suæ sapientiæ fonte, occinēdum est DEVM in mirabilibus suis, quæ omnipotente verbo in vñsum vitæ mortalis creauit atq; contulit, glorificari velle: hominib. mentem intelligentē dari, quæ variarū rerum, quib. vñsus inest multiplex ad vitæ societatem, cognitione imbui possit, vt sapiētia & porētia DEI in creaturis agnoscatur & pietas timorq; DEI maior in hominū animis erga creatorē sapientissimū excitetur. Nā sicuti agriculturā ad victum humanorum corporū benignus DEVS generi humano concessit: vt cōstitutiones imperiorū & rerum publicarum ipsosq; magistratus propter tranquillitatem publicā, & iustitię, honestatis, ordinisq; boni conseruationē, spiritu sapientiæ hominibus ostendit: Ita medicinam cōtulit eisdem, vt à variis infirmitatibus, quas eis quādoque im-

*In quem scientiam medicinæ à Deo data sit.*



mittit ira illius iustissima: quandoq; etiam propria imprudentia, temeritas, luxus, libido & intemperantia ipsis creat, liberari corpora hominum possint. Nihil enim esset vita humana, si perpetuis impedita morbis neque commodis priuatis, neque publicis vsibus seruiret. Vt autem propter nostra peccata interdum mala excitantur in mundo & certis præsidijs, quæ diuina misericordia ostendit & offert iusto tempore, quando nimirum homines ad pœnitentiam & vitæ emendationem redeuntēs his opus habent, rectissimè abiguntur: Ita morbis varijs hominum genus quandoque exercet DEVS: & ijsdem etiam antidotos medelâsq; profert per pios & eruditos homines, vt infirmitatibus hominum consuli & plures in vitæ fragilibus theatris diutius retineri ad laudē DEI, emolumentum Ecclesiæ Christianæ & clementum societatis humanæ possint. Hinc sapienter dictum putamus ab Ecclesiaste capite 38, delinquētes in conspectu creatoris sui incidere in manus medici, nimirū vt ab eodem virtute DEI & præsidijs cōuenientibus in pristinum sanitatis statum restituti grata mente misericordiam DEI cognoscant, mirabilem eius sapientiam & potentiam in rebus creatis perpendant, fidei animo DEVM colant & creaturis neutiquam abutantur, mulò minùs artes, propter gloriā DEI, emolumentum Ecclesiæ Christianæ & vsum societatis humanæ diuinitus inuentas ad sper-

*Finis restituta sanitatis.* nen-



nentur, quod impij & blasphemij faciunt, qui-  
 bus tandem iustissima improbitatis & cōtem-  
 ptus huius merces contingit. Pij itaque preci-  
 bus & humili subiectioni, qua placatur DEVS  
 in tanta malorum grassantium clade, quando  
 emendatio vitæ accedit, adiunxerunt & adiun-  
 gere debent pij omnes media, quæ humanis  
 vñibus à DEO collata sunt & quotidie ex fon-  
 te benignitatis amplissimo in nos abundant.  
 Quamquam itaq; hæc febris epidemia ob exi-  
 guam materie putrescentis copiam durabat  
 breui tempore & symptomata mitia habebat:  
 tamen in acutorum morborum numero planè  
 reponenda censebatur, eam ob rem, quòd in-  
 tra paucos dies ad statum suum contendebat,  
 & post se in pluribus hominū corporibus pe-  
 ctoris affectus, de quibus antè dictum est, re-  
 linquebat. Accedit & illud, quòd materiam  
 habebat subtilem & acutam, quæ in motu con-  
 stituta ferri per totum corpus deprehendeba-  
 tur. Ex quibus palàm fit, subita ei auxilia adhi-  
 beri debuisse. Alioqui enim fieri potuisset, sicu-  
 ti etiam pluribus accidebat agris, quorum cor-  
 pora impura habebant magnam peccantium  
 humorum copiam, vt febris illa cum suis sym-  
 ptomatibus exacerbata fuisset, & vel diutiùs  
 afflisset, vel planè è medio sustulisset corpora,  
 quæ ab eadem affligebantur. Nam febres con-  
 tinuæ si tertia die exacerbationē maiorem ha-  
 beant, magis periculosæ existimantur. Quo-

*Pios media  
 à DEO con-  
 cessa nō ne-  
 gligere debe-  
 re.*

*Febrem epi-  
 demiam fu-  
 isse acutā et  
 subita auxi-  
 lia postulasse.*

*Lib. 4. Aph.  
 part. 43.*

K



*Qua curā di-  
ratione &  
sus fuerit.*

cunque autē modo de malignitate ac vehemē-  
tia sua remiserint, periculo se vacare significāt.  
Ne itaq; in horum hominū corporibus, qui  
metu periculi & vitæ dulcedine adducti implo-  
rabant medicas operas in nostra republica,  
quippiam grauioris periculi ex ferocientibus  
humoribus generaretur: curabātur iidem tum  
conueniente victus ratione, tum medicatione;  
que morbo, causis morbificis, symptomatibus,  
viribus ætatiq; ægri hominis, anni tempori,  
cœli constitutioni & locis affectis compete-  
bant, vt ex sequentibus legenti facilē patebit.

## CAPVT SEXTVM.

*De victus ratione, in febre epidemia  
obseruari solita.*

*Victus ratio  
in morbi cu-  
ratione ob-  
seruari soli-  
ta.*

*Aër & habi-  
tatio.*

**Q**VI medica auxilia expetebant, iis præci-  
piebatur, vt post vniuersalem corporis e-  
uacuationem, de qua deinceps dicturi sumus,  
bona victus ratione vterentur. Cū autē mor-  
bus, causa morbi & anni tempus præ se ferrent  
caliditatem & siccitatem: principio quidem æ-  
gros nostros iubebamur vitare apricum solem  
meridianumq; aërem. Quod vt commodiùs  
fieret ab illis, contubernia septentrionem &  
occasum respicientia eis commendabantur.  
Qui verò talia non habebant, iis præcieba-  
tur, vt interdiu, præsertim tamen in meridie  
fenestras, quæ meridiani Solis radios alioqui  
reci-



recipiebant, clausas tenerent ac aperirent eas,  
 quæ Aquilonari aëri expositæ erant: noctu ve-  
 rò aërem intromitti liberum concedebamus.  
 Sic aërem, quo natura destituebamur, solertia  
 animi frigidum quærebamus, vt qualitates fe-  
 brilis caloris reprimi, causæ materiales faciliùs  
 alterari ac imminui, intemperiesque aëris illo  
 anni tempore corrigi posset. Dum tamen al-  
 terationi aëris intenti eramus, dandâ erat ope-  
 ra, ne in contrariû vitium delaberemur & ni-  
 mia alteratione plus pituitæ aquosæ in corpo-  
 ribus ægris generaremus, ex qua aliud & gra-  
 uius malum oriri potuisset. Aliàs in contuber-  
 niis aquâ frigidâ simplicem, aut ex rosis, vio-  
 lis, plantagine, lactucis, endiuiâ, solano, tara-  
 xicone & similibus destillâdo collectam, cum  
 aceto simplici aut ex rosis facta, in mensas, sca-  
 mna aut pauimentum in tali statu creberrimè  
 effundere iussissemus. Sparguntur etiam in ta-  
 li aëris, corporum & morborum constitutio-  
 ne capreoli vitium, ruborum, rosarum sylue-  
 striû, folia recetia nymphæ, salicis, semperui-  
 ui, lactucæ, endiuiæ, portulacæ, cucumerû, cu-  
 curbitæ, papaueris, melonum, vitium aut gra-  
 men ante Solis exortû falce recisum dum ad-  
 huc viride rore nocturno madet, in pauimen-  
 to contubernii, quod ægri homines incolunt.  
 Deinde in cibo & potu suadebamus abstinèn-  
 dū tū ab omnib. calefacientibus, acrib. & salis, *Quoniam al-  
 terationi  
 insistendum  
 erat.*  
*Gal. lib. 9.  
 & 10. Meth.*  
*Cibus & po-  
 tus.*  
 quæ facultate sua humores inflâmare, ad motû



incitare & febris qualitates intendere posse  
censebantur, qualia sunt aromata & cibi aro-  
matici, pingua, valde salsa & vinctuosa edulia,  
allium, porrum, raphanus, radícula, cæpe, sina-  
pi, anisum, cardamomum, piper, calamus aro-  
maticus, zedoaria, gentiana, zingiber, corian-  
drum, fœniculum, petroselinum, cuminum, ca-  
reum, daucus, menta, serpillum, ruta & alia, quæ  
facultate calefaciendi, incidendi & attenuandi  
pollent: tum ab ijs, quæ sua substantia & facul-  
tate in corpore humano humores pituitosos,  
crassos, lentos glutinososque producant, vel  
massam humorum crassam nimis efficiunt, ut  
ventositates obstructionesque in meatibus cor-  
poris humani morbo debilitati gignere atque  
ita morbi causam primariam augere posse æsti-  
mabantur. Talia autem sunt legumina, fructus  
præcoces, pisces omnes, præter saxatiles, carnes  
sale maceratæ, porcinae recentes & quæ, ac vete-  
res, frixa in butyro, rhiemata, placentæ & quæ-  
cunque ob dulcedinem suam facile intestinis  
venisque mesaraicis adhærent. Consulebamus  
verò, ut vterentur carnibus pullorum gallina-  
ceorum, agnorum & hœdorum cum limoni-  
bus aut modico aceto, quod non nimis acre es-  
set, coctis, lactuca cum modico oleo oliuarum  
immaturarum, admodum exigua quantitate salis  
& aceto macerata, vel etiam per se aut cum spe-  
nachia, blito, portulaca, endiuiâ, atriplice, ace-  
tosa & similibus herbis cocta. Ditiorum homi-  
num



num mensis potuisset non incommode adhiberi in ijs locis, vbi in promptu erant & facile are comparabantur, agresta cum carnibus cocta, aut succus eius iusculis carniū mistus, granatorum succus & vinum, acetositas citrij mali & similia. Pisces squamosi & in aquis petrosi durisque viuentes nulli medicorum in talibus morbis improbantur, siue elixentur siue assentur, modò neque nimium salis admittant, neque aromatis calidis condiantur. Fiebant etiam aliquibus iuscula ex emulsione seminis lactucae, papaueris, cucumerum, melonum, cucurbitae & citrulli. Præterea præparari iubeamus agris pluribus polentas & iuscula ex confrecto hordeo & auena omnino contrita aut saltè à corticibus emundata, ex cerasis acetosis & similibus, quæ vim roborandi ventriculum & refrigerandi feruorem biliosum reprimendique ardorem febrilem præ se ferunt. Quibus autem consuetudo erat longo usu recepta, vt biberent vinum, ijs dabatur vinum album, tenue aut probè aqua fontana, clara & bona, aut cum destillatis aquis acetosæ, taraxiconis, endiuie, cichorij & similibus dilutum. Eo utebantur in prandio & cœna: reliquo diei noctisque tempore facile à potu abstinebant. Non enim vehementi siti torquebatur ægri homines in hac febre propter causas suprà allegatas, quibus ad stipulatur etiam sententia Hippocratis. Ait enim ille lib. 4. Aphor. part. 5 4, si febris ar-

K iij



dentibus accedant tussis sicca, quæ leuiter irritentur, ægra hominum corpora non admodum siti torqueri. Qui verò à vini usu facile abstrahi poterant, ijs aqua hordeacea simplex aut cum iulebis & syrupis conuenientibus temperata dabatur: Pleriq; emulsione seminum frigidorum cum aqua hordei præparata delectabatur: plurimi nihil horum admittebant, sed contenti viuebant vulgari huius regionis potu, qui ex tritico & aqua fit, nec multum lupuli assumit, quæ ratio & causa est, quòd plus refrigerare, quàm calefacere hominũ corpora soleat: plus tamen calefacientis facultatis contineat, quàm aqua hordei, quæ cum mistura iuleborum, syruporum aut emulsione seminum frigidorum præparatur. Qui dulcia in potu auerſantur, ij in talibus temporum ac morborum statibus ad aquam hordei affundere possunt aquã aut succum acetosæ, endiuix, fumiterræ aut aliquantulum aceti. Lautioris fortunæ hominib. etiam cõuenit succus acetosus citrij mali, limonium, granatorum acetosorum & alia potus genera, quę in talib. morbis solertia & industria doctissimorũ medicorum cū magnis aliquãdo impensis ægris delicatis præparari præcipit. In his autem cautio & commonitio diligens adhibebatur, ne ægri homines nimium se cibo aut potu replerent, propter calorem, qui naturalis est hominum corporibus, tũ ex ambiētis aëris qualitatibus: tũ ex febrili ardore dissipatum ac debili-



debilitatum. Tertiò omnem motum omniâ- *Exercitium*  
 que exercitia intermitteri consultissimum erat. & *quies.*  
 Præcipiebatur itaque affectum febrilem susti-  
 nentibus, vt ocio & quieti, quantum per occu-  
 pationes fieri licebat, ijdem indulgeret: quan-  
 quam plerisq; hoc ipsum morbi molestia iniū-  
 xit, vt præter suam voluntatem ab omnibus a-  
 nimi ac corporis exercitiis cessare cogerentur.  
 Quartò somnū egris concedebamus sufficien-  
 tem, cū eundem neq; morbus, neq; sympto- *Somnus &*  
 mata admodum impedirent. Vtiliorem enim *vigilia.*  
 eundē vigilijs esse ratiocinabamur ex eo, quòd  
 Hippocrates lib. 2. de ratione victus in morbis  
 acutis Aph. 59. dicit ex vigilijs immodicis cru-  
 ditatē imperfectāq; alimentorū coctionem  
 prouenire. Somnus autē calorem naturalem,  
 qui tempore vigiliarū per totū corpus disper-  
 sus in externis membris munia nutritioni mē-  
 brorum singulorū necessaria strenuè perficit,  
 reuocat ad interiora, vt in naturalib. instrumē-  
 tis facultatum naturalium adminiculo alimentū  
 assumptū meliùs concoquat, humores rectiùs  
 præparet & vtilia ab inutilibus pròptiùs segre-  
 get. Tūc enim cæterarum facultatum actiones  
 quodā modo cessare & vires suas quiete recre- *Commoda*  
 are videtur: animi egritudines curæq; mulcen- *somni.*  
 tur: passionēs membrorū nonnihil corriguntur,  
 & vires exhaustæ diurnis laborib. atq; morbis  
 reficiuntur paulatimq; restituuntur: Naturalis  
 verò facultatis actiones fortiùs & rectiùs agūt.  
 Quam ob rem rectè ait Hippocrates lib. 2. de



ratione diætæ in morbis acutis : ἀχρυπνίη ἐν μὲν  
 πῖσι σιγῶσι βλάβη. ὕπνοι δὲ βεβρωκότα θερμαίνοντες  
 ὑγραίνουσι τὴν ψυχὴν ἐς τὸ σῶμα διαχέοντες. Vnde fit, vt  
 calor innatus, tempore somni nouo robore  
 munitus, per totum corpus alacrius aduersus  
 morbum luctetur & expeditius feliciusq; ma-  
 teriam morbi oppugnet. Nimia verò vigiliæ  
 calorem naturalem debilitant & præternatu-  
 rali ardori robur addunt, vt securius per mem-  
 bra languida vagetur & humidum naturale de-  
 pascatur, vnde non tantum maior languor, sed  
 etiam præsens vitæ periculum ægro homini  
 nascitur. Quintò tum morbi natura, tum anni  
 tempus docebant ægris corporibus noxâ crea-  
 ri, si ad satietatem alimentis replerentur. Da-  
 batur itaque eis mediocris cibi potusq; quan-  
 titas, quæ neque vasa nutritiua facultati serui-  
 entia, sua substantia lædere, copia multum ten-  
 dere & grauare, neque qualitatibus noxijs im-  
 buere, ac alterare nimium, neque denique vir-  
 tutem debilem amplius affligere posset. Nam  
 cum in acutis morbis, qui celeriter properant  
 ad statum, exquisitè tenuem victum requirat  
 Hippocrates, ne videlicet intempestiua nimia-  
 que nutritione vires debiles naturæ obruan-  
 tur, dum distrahuntur & calor naturalis à ma-  
 teriæ peccantis coctione ad alimentum assumpti  
 præparationem auocatur: illa regula in febris  
 epidemiæ curatione omnino non negligenda  
 erat, cum ob cœli constitutionem calor natu-  
 ralis

*Vigiliarum  
 nimiarum in  
 commodum.*

*Inanitio &  
 repletio.*



ralis dissiparetur & à febrili putredinalique calore ampliùs oppugnaretur. Nihilominùs tamen habebatur ratio virium, ætatis, vitæ generis, sexus & consuetudinis apud ægros homines, qui febre epidemia laborabant. Constat enim morbos biliosos nimij ieiunijs exacerbari & materiam eorundem augeri atque malignitate ferociâq; intendi tantò magis, quanto ægri hominis temperamentum naturale, ætas, vitæ genus, sexus, cōsuetudo, regio & anni constitutio proniora sunt ad productionem biliosorum humorum. Omnis etiam dabatur opera, vt euacuationes tam vniuersales, quàm particulares, quæ ægris corporibus & eorundem particulis in hoc morbi epidemij decursu competere videbantur, tempestiuè dextrèque adhiberentur. Nam cùm esset causa morbi *κακός* talis, quæ ex causis suprà recitatis non admodum coctione indigebat, cōuenienti pharmaco per aluum educebatur: deinde concocta reliqua materia, adhibebantur ægris corporibus auxilia, quibus particulares euacuationes magis promouerentur. Nam in quorundam languentiū corporib<sup>9</sup>, quibus humores ad fauces ac pectus ferebantur, locum habuerunt excreationes, vt per tussim ac sputum materia cocta educeretur: In quibusdam verò hominibus materia ferebatur per meatus vrinæ cum serosis humoribus ad vesicam: In quibusdam verò alij egestionibus superfluitates noxias extra cor-



*Lib. 1. Aph.  
part. 21.*

*Animi af-  
fectus.*

pus efferebant: Aliqui etiam sentiebāt euiden-  
tem copiam humorum peccantium per nares  
efferi: Et per aurium meatus non nihil de ijs-  
dem humoribus eductū fuisse creditu non ab-  
surdum est. Sicuti itaque in hoc intendendum  
esse censebamus, vt totum corpus perspirabile  
esset, atque ideo meatus excretioni superfluita-  
tum destinati haberentur aperti: Ita, quò natu-  
ra motu suo vergebat in expulsionē noxiarum  
humiditatum, modò locus ille conueniret, eò  
ducere omni studio nitebamur, ne quippiam  
aduersus motum illius moliremur. Noxium e-  
nim illud ac molestum fore censebamus, si ad-  
uersus morbum acriter pugnanti & consuetas  
vias excretionum sponte sua eligenti naturæ  
contrarium motum induceremus. Sextò i-  
ram & omnes animi motus perturbationum-  
que insultus, qui massam humorum inflamma-  
re & bilis flux ferociam intendere atque ad  
externa corporis agri membra liquando fun-  
dere valent, quantum dabatur, euitandos cen-  
sebamus. Id eam ob rem fiebat, ne humores  
biliosi augerentur, nè eorundem malignitas  
intenderetur & morbi qualitates atque sym-  
ptomata maius crementum acciperent.

#### CAPVT SEPTIMVM.

*De medicatione febris epidemie adhibita.*

CVM febris hæc epidemia in populo recēs  
vagaretur, plurimos inuadebat ingēs tre-  
pidatio.



pidatio. Quamobrem multi ægrorum hominum metu mortis & solitudine de incolumitate recuperanda compulsi medicorum consilia & operas implorabāt. Ex quibus aliqui cōtenti erant vnica humorum peccantium subductione: aliqui etiā à digestiuis, electiue purgantibus, alterantibus & roborantibus medicinis non abhorrebant. Posteaquam verò plurimum ægrorum reualescentia ostenderet morbum esse mitem & tutum ideo, quòd periculo mortis careret & facile periodum suam in corporibus ægris absolueret: plurimi hominū patienter affectiones febriles sustinebāt. Vbi tamen voces fractas & impeditas ex acris catarrhi descensu à capite ad pectus cognoscebant & per aliquot dies perferebant: tandem auxilia medica implorabant. Quam ob rem non omnibus eadem medicamenta conueniebant: sed mutanda erat medicatio in morbi temporibus, vt peritis medicis satis constat. Quicunque itaque auxiliis medicis in principio morbi cupiebant liberari ab eiusmodi malis: ijs ætatē iuuenilem atq; consistentem agentibus, si erāt virilis sexus, in forma boli cum saccharo preparati dabatur flos recens Cassiæ, electuarium lenitium, aut Diaprunum compositum in sufficienti quantitate. Hæc etiam diluta competentibus liquorib. exhibebantur ijs, qui liquidiori medicamentorum forma vti malebant, quàm bolis. Frequenter tñ offerebatur ijs, qui validiora corpora habebāt & purgāte medicamētovti

*Timor mortis multos compulsi & in medicamentis.*

*Eventus morbi postea multos securos reddidit.*

*Certam curandi methodum non observatam in omnibus ægris.*

*Vniuersalis euacuatio quibus fiebat.*



volebant, electuarij de succo rosarum in forma solida preparati pondus drachmarum quatuor in aurora: & præcipiebatur ijs, qui medicamentum sumebant, vt ieiunium trium horarum à sumptione medicamenti perferrent ac illa die aërem liberum vitarent. Aliquibus etiam Diaturpeti cum Rheu Barbaro compositi drachmæ quatuor exhibitæ sunt. Hic præterea locum habere potuisset electuarium Elescoph, Diaphœniconis, è psyllio & similis facultatis alia, si in iusta quantitate data fuissent ijs, ex quorum corporibus vnica purgatione radicitus peccantem materiam auferre voluissemus. De pilulis quoque, quas aureas, adgregatiuas, sine quibus esse nolo, Arabicas & Stomachicas Mesuæ cōmuniter appellamus, iustum & conueniens pondus in aurora offerri vtiliter solebat. Sicuti etiam electuariorū conuenientium pulueres in iusculis carniū & domesticis decoctis concedebantur ijs, qui delicatioris stomachi malebant domi præparatis potionibus vti, quàm pharmacopœorum artem atque operas fideles experiri. Obtinebat tamen apud pharmacopœos & vulgus hominum, qui malebāt vili mercede vitam à periculo redimere, quàm magnos sumptus in medicos ac medicamenta facere, locum & vsum frequentiorem in inclyta Olomucensium Rep. electuarium de succo rosarum Nicolai. Nam cū pharmacopœi aduerterent aliquibus personis illud feliciter



liciter per medicos exhibitum: studebāt etiam apud vulgus venari famam eruditionis & felicitis operationis. Eam ob rem non remittebant curam ægrorum hominum ad medicos: sed falcem inferentes in alienam messem vendebant omnibus viris & fœminis, quotquot remediū aduersus febrem epidemiam in myropolijs petebant, iustam quantitatem de electuario Nicolai, quod ex succo rosarum in forma solida prostat. Neq; sanè infelicitè operabatur, cū intra biduum vel quatrimum restituerentur in integrum sanitatis statum ita, ne vllum symptoma remaneret morbi, qui ita purgati laudabilem diætā obseruabant. Nam materia peccans, putredine febrili corrupta & in feroci motu constituta subducebatur per aluum, ne febris fomitem ampliùs haberet, neque etiam fluxionem molestā ad pectus facere posset. Fœminis verò, virginibus & intra pueritiæ adoleſcentiæve fines constitutis dabantur mitiora, qualia sunt flores Cassiæ, electuarium lenitium, Diacatholicon Nicolai, Diaprunum compositum, manna aut syrupus rosatus solutius ita, vt hæc liquoribus competentibus frequenter temperarentur, aut pro arbitrio ægri hominis in forma boli cum saccharo exhiberentur. Dilui enim hæc in talibus affectionibus possunt stillaticijs aquis acetosæ, endiuix, cichorii, rosarum, violarum, lactucæ, taraxiconis & similium: atut in earundem herbarū, seminum



radicūmve decoctis propinantur, sicuti medico videtur è re & commodo ægrotum hominum fore. Hac euacuatione peccantis materiæ feliciter peracta plerique ægrotum hominum contenti erant adeò, vt præter aquam hordei & diætā præordinatā nihil admitterent, cū releuatos sese non nihil sentirent, neque admodum opus haberent vltiore diuersione, præparatione vel educatione humorum. Nam naturæ robur, nil quidquā morbi violentia debilitatum, reliquā morbi materiam concoquebat & egerebat, ne quid noxæ corpori reualefcenti ampliùs accideret. Hoc fiebat faciliùs in corporibus ægris, quæ non multum de peccante materia coaceruarant: in aliis verò corporibus, quæ impura valde erant & materierum peccantium multitudine grauabantur, non tam facilis curatio fuit. Horum itaque aliqui, quorum res familiaris lauta erat, vnde impensas in medicos numerare & medicinas soluere possent, admittebant digestionem materierū, quæ post vniuersalem euacuationem qua plurimum de materia peccante auferri debebat necessariò, quòd illa statim ab initio morbi turgebat & feroci impetu de parte ad partem ferebatur, in eorum corporibus reliqua erat. Fiebat autem materierū peccantium præparatio frequenter per syropos de succo acetosæ, rosarum, de endiuia, de cichorio & si-

*Quibus digestis sosis fuerit.*



& similibus: rarò cum syrupo de iuiubis, de acetositate citrii mali, de limonibus, de granatis acetosis & aliis, qui instituto medici competere putabantur. Hi enim diluebantur aquis destillatis, quas suprà enumerauimus, & aliquoties in aurora tepidè offerebantur. Ita, quidquid de substantia humorũ biliosorum in corporibus agris superabundabat, minuebatur & alterabatur, ne putredine ampliore iidem corrumperentur, etiam si febrilis inflammationis semina quædam obscura superesse in membris debilibus aduerterentur, donec curationũ periodi absoluerentur. Quos interim ardor febrilis grauius affligebat, propter materiæ morbificæ multitudinẽ, aut intensas qualitates & *Localia adhibita.* habitum corporis febrili dispositioni magis aptum, illis non modò circa cor applicabantur epithemata, ex aquis acetosæ, adianti, rosarũ, violarũve facta, quibus addebantur species diamargariti frigidi, diatrion santalon, fragmenta lapidum preciosorum preparata, & alia, quæ præsentī negotio congruere censebantur: verũ etiam caput aduersus vapores calidos muniatur aqua rosacea, cui aliquando nõ nihil aceti rosati admiscebatur. Interdum etiã fronti oleum rosaceũ, cum aceto rosaceo mistũ, quod *ad Glaze.* ὀξυπόδρον Galenus appellat, admoueri solebat. Hæc fiebant, donec materia cocta & preparata euacuaretur radicitus purgante medicamento, qd̄ plerumq; sumebatur ex ijs, quæ cõmemo-



*Occasio & solertia artificis præceptis validiora sunt.*

*Symptomatum correctio & residui resolutione quomodo fiebat.*

rauimus paulò antè, vbi de vniuersali corporis euacuatione egimus. Obseruabatur tamen hæc regula, vt ratione quantitatis materie peccantis, virium, ætatis, sexus & consuetudinis ipsius ægri aliquando dos in medicamento augeretur, aliquando minueretur. In hoc enim negotio dominatur maximè occasio & solertia artificis, qui videre solet, quomodo, quando, vbi, quid & quantũ de humoribus in corpore humano peccantibus auferre debeat, cùm plerique robustorum hominum ne tentarètur quidem purgantibus medicinis, quas debiliores homines & ij, quorũ alius facile aperitur, cum prospero successu assumunt, si deberent æquale cum his pondus vsurpare. Norunt autem eruditi & exercitati medici facilèq; intelligunt ex consideratione circumstantiarum, quæ in curationibus ægrorum corporum expendendè veniunt, quid & quantum cuique ægro citra periculum exhibendum sit. Tandem ad symptomatum residuorum correctionē & remanentis materiæ resolutionem progrediendum erat, quæ potissimùm à medico in ijs fiebat corporibus, quæ aut nullis erant tentata medicinis in morbi principio, aut malā diætā post euacuationem præmissā adhibuerant. Nam sicuti hi, qui præceptis medicorum statim ab initio morbi parebant, facilimè in integritatis statum restituebantur, neque admodum indigebant medicinis, quibus residuum resolveretur



tur aut intemperies corrigeretur, cum diæta laudabilis id ipsum sufficienter præstaret. Ita illis corporibus, quæ intemperaturam debilitatamque in capite, faucibus ac pectore sentiebant post febrem victam & expugnatam, necessarium adhibebantur medicamenta, quæ materiam, in capite contentam & stillantem ad fauces ac pulmones, coquerent, incrassarent, absumerent aut educerent: membra denique spiritalia roborarent. Plerisque itaque, pro sistendo tenuium humorum ad fauces & pectus defluxu, sufficiebat confectio, quam manum Christi simplicem & compositam cum perlis vocatam myropœi præparant: alijs dabatur Diamargariton frigidum. Quibus verò materia iam fluxerat ad pulmones & cavitates thoracis, ijs non modò poterant exhiberi syrapi coquentes & præparantes materiam peccantem ad faciliorem educationem, quales sunt syrupus de iuiubis, de papauere simplex & compositus cum aquis stillaticijs vel decoctis competentibus: sed etiam adhibebantur lambiriua, *Pituitam in thorace digerentia.* ut puta Loch sanum, Loch ad asthma, Loch de pulmone vulpis, mel violatum, rosatum, & similia, ut asperitas faucium mitigari, acrimonia humorum educendorum obtundi & materia digesta per sputum facilius educi valeret. *Sputum educationia.* Præter hæc pectus exterius inungebatur oleo rosato, violato, & amygdalino. Hoc enim pectus dilatat & educationem humorum iuuat: illa su-

L



διερητικά.

Intemperiei  
correctio &  
loci affecti  
roboratio.

perfluitatum ad educationem præparandarum  
consistentiam incrassant, vt faciliùs screando  
reijci eadem possint. Qui humidorum illini-  
tionem atque assumptionem auersabantur: il-  
los contentos esse decebat electuario, quod  
Diatragacanthum frigidum dicitur, & trochi-  
scis Bechij albi. Hæc offerebantur ijs, quorum  
natura moliebatur educationem superfluatorum  
per screatum & tussim. Quorum verò natura  
videbatur humores tenues & acres ad renes di-  
rigere atq; cum vrina expellere, illis, febre ab-  
acta, mediocriter calida dabantur alimenta &  
medicamenta, vt vrinæ egestio rectiùs faciliùs.  
que promoueretur, donec materiæ noxiæ  
prorsus educerentur. Talia erant semina *διερη-  
τικά* in puluerem redacta & iusculis cibisq; ad-  
mista vel potionibus iniecta, Diaireos Salomo-  
nis, Dianisum, Diahyssopum, Diatragacanthon  
calidū, & plura, quæ huic instituto accommo-  
dari consueuerunt. Denique intemperiei reli-  
ctæ correctio & roboratio membrorum sæpe  
fiebat ijs præsidijs, quæ intra corpus sumeban-  
tur, vt alimenta, de quibus in victus ratione sa-  
tis egimus, & medicamenta, qualia erant con-  
seruæ rosarum, violarum, acetosæ, nympheæ,  
quibus interdum admiscebatur quippiam de  
trochiscis galliæ moschata, berberorum, rosa-  
rum, caphuræ: aut de electuarijs, vt species fri-  
gidæ de gemmis, Diarhodō Abbatis, Diatrion  
Santaloni, &c. Hæc enim subigebantur cum sy-  
rupō



rupō aut melle violato siue rosato, cum succo acetosæ, citrij mali, granatorum aut limonum. In curationibus opulentiorū ægrorum etiam adhibere potuissēmus fragmenta lapidum preciosorum præparata, si animus nobis fuisset, ut iisdē sumptuosas antidotos exhiberemus. Ex *Localia altæ rantia.* trinfecus etiam regioni epatis admoueantur epithemata, olea, linimenta, vnguenta emplastraq; quibus aliqualis refrigerandi & adstringēdi vis inest, ne videlicet humores à reliquijs febrilis caloris inflammati recidiuam excitarent, quæ peior morbo multis ægris extitit. Frequentissimo autem in usu erant oleum violarū, rosatum omphacinum, nymphæ, vnguentum rosatum Mesuæ, Infrigidans Galeni, cerotum fantalinum, & quæcunque similis efficaciam habebantur.

Diuina autem benignitas & inenarrabilis *Epilogus.* misericordia, quæ in iustissimo iræ cuncta creata deuorantis furore reminiscebatur humanæ infirmitatis, & temperans pœnas, peccatis multis ac horrendis nimum meritis, clementia atque affectione paterna, qua corripit suos, ne cum impio mundo in nefandorum scelerum via progredientes damnentur, adspirabat non modò operibus medicis benignum fauorem, ut felices operationum euentus experirentur: sed etiā in medio mali grassantis furore seruabat plurimos ex his, qui nullis medicinis vsi humili patientis animi obedientia sese flagello



164 DE FEBRE EPIDEMIA.

merito submittebant, & à Deo, creatore suo  
fontéque misericordiæ largissimo, liberatio-  
nem petebant atque expectabant, vt malum  
illud subito transitu vniuersum orbem Chri-  
stianū affligens paucos absumeret. Illius No-  
men & brachium fortissimum sit benedictum  
ac laude honoréque super omne nomen  
exaltatum in æuum,  
Amen.

FINIS.

Pag. 9. lin. 28. lege *ὁριστάς*.





FRANCOFVRTI

Excudebant hæredes And. Wecheli

ANNO SALVTIS M. D. LXXXII.



